


তিন মাহিয়া পত্ৰিকা




## বিষ্ণুপ্ৰিয়া মণিপুৰী সাহিত্য সভা, আসাম

২য় বছৰ, ৪ৰ্থ ও ৫ম সংখ্যা, বৈশাখ-হাওন, ১৪১১ সন - ১৬ ই এপ্ৰিল-জুলাই, ২০০৪ ইংৰেজী



শুভ উদ্বোধন, ১লা হাওন, ১৪১০ সন  
“ইমা ঠাৱ পুষ্টি পালক”- মণীন্দ্র, ১৯৯৯ ইং



The first ever magazine in Bishnupriya Manipuri language from Sahitya sabha.

মুখ্য সম্পাদক

শ্ৰীগোপেন্দ্ৰ কুমাৰ সিংহ,

ফোন : ০৩৮৪২ - ২৬৪৮৫৪

পত্ৰিকাৰ দাম ৰূপা - ৪০ হান

ডাক মাণ্ডল ৰূপা - ১০ হান



চেয়াৰম্যান

বোৰ্ড অব মেনেজমেন্ট

শ্ৰীমণীন্দ্র কুমাৰ সিংহ

ফোন : ০৩৬১ - ২৫১৪০৪১

০৩৮৪২ - ৫২১২৩

Bishnupriya Manipuri Sahitya Sabha Patrika. A quarterly magazine in Bishnupriya Manipuri language published by the Bishnupriya Manipuri Sahitya Sabha.

H.O. Kathal Road, Zero Point Lane, Silchar-788005, Assam, Phone-03842-241140

Printed at : The Choudhury Printers, Tarapur, Silchar and Angelica Imprint, Ganeshguri, Guwahati. Cover Designed by : Shri Shankar Sinha, Net Education Brotherhood, Rajgarh Road, Guwahati-781007

**সম্পাদক মণ্ডলী :**

মুখ্য সম্পাদক - গোপেন্দ্ৰ কুমাৰ সিংহ, এচি.এচ (অবসরপ্ৰাপ্ত)

সম্পাদক (নাটক, গল্প, উপন্যাস) - ইন্দ্ৰকুমাৰ সিংহ, নবসিংহপুৰ

সম্পাদক (কবিতা) - নৰেন্দ্ৰ চন্দ্ৰ সিংহ, সিঙ্গৰী, শিলচৰ

কোষাধ্যক্ষ - অনিল কুমাৰ সিংহ, কোটি, শিলচৰ

**পৰিচালক মণ্ডলী**

চেয়ারম্যান - মণীন্দ্ৰ কুমাৰ সিংহ আইএফ.এচ (অবসরপ্ৰাপ্ত), গুৱাহাটী

সঞ্চালক (পৰিচ্ছন্ন) - ড॰ অশোক কুমাৰ সিংহ

সঞ্চালক (প্ৰচাৰ) - মণিকান্ত সিংহ, বি.এচ.চি. বি.এড

সচিব (বাণিজ্য) - শ্ৰীসুৰেন্দ্ৰ কুমাৰ সিংহ, কাঠাল ৰোড, শিলচৰ

সহ সচিব - শ্ৰীভানু সিংহ, তৰাপুৰ, শিলচৰ

**উপদেষ্টা মণ্ডলী -**

ড॰ বসন্তীপ্ৰসাদ সিংহ, পি.এইচ.ডি, ডি.লিট.

অধ্যাপক বিমল কৃষ্ণ সিংহ, এম.এম.সি.

শ্ৰীসুশীল কুমাৰ সিংহ, সঞ্চালক (প্ৰাক্তন), SCERT, নাগালেণ্ড

অধ্যাপক বৰীন্দ্ৰ কুমাৰ সিংহ, এম.এ., বি.এড

শ্ৰীৰঞ্জিত সিংহ, শিক্ষক, দুৰ্গভূঞা

শ্ৰীমতী সুখজ্যোতি সিংহ, এম.এ. (ডকল) এল.এল.বি, প্ৰাক্তন ৰাজ্যিক বিষয়া, সমাজ কল্যাণ

অধ্যাপক জেনু কুমাৰ সিংহ, এম.এ.

অধ্যাপক নামদেব সিংহ, এম.এ.

অধ্যাপক ড॰ নলিনী কুমাৰ সিংহ, পি.এইচ.ডি

অধ্যাপক ড॰ স্মৃতি কুমাৰ সিংহ, পি.এইচ.ডি



## সম্পাদকীয়

আহিন বৈশাখ। অভিমেক ঐশ ১৪১১ সনর। পুরানা বছররে হুদিমৌপা বিদ্যায় জানেইয়ার। ১৪১০ সন আমার মনে চিরস্মরণীয় ঐশা থাক। তিন মাহিয়া বিশ্বপ্রিয়া মণিপুরী আহিতা সভা, আসাম, পত্রিকাহানরে জরমদিয়া, পোষণ-পাণন করিয়া ভাষা জননীৰ মেবাত ব্রতী করিয়া, নুমা বছররাং ভারহান সিল্করে দিয়া, বিদ্যায় নিগ্ণা।

নুমা বছররে হার্দিক প্ৰভাষণ জানেইয়ার। মাহিমায় শান্তি। গাও-ঘর, শহর-নগর, তার বৌ-বুণুনীয়ে শান্তি বারি বহিয়া আনিয়া, ছিটা দিয়া, তিঙেইয়া ইঙকরিয়া থ দিয়া দেক। দূরেই অক, দুঃখ-নিরাশা-বিষাদ, বিচ্ছেদ। দূরেই অক, বাঁধা-বিপত্তি, তপঃক্লিষ্ট তপ্তা ধূলি, নিঃশীম শূণ্য আকাশে, বৈশাখর ধূণী-স্বৰ্গায় আবর্তিয়া, আণোড়িয়া ঝাকারেইয়া, পুছিয়া পাছিয়া। পাতেদেক, নীল নভতলে, চাংখল-চেষ্টাচিবি, শান্তি বারি-সিক্ত উরুণী আচল। জরা-মৃত্যু-ভক্-টাটি চিত্তায় বিকল, লক্ষ লক্ষ বেয়াপা-বেইবুনি, ধুমজাকা ওমাইপাঙৈয়া, দেকা শান্তির ধুম। দক্ষ অক, হিংসা-নিন্দা-ধেম। ছাশি ঐশা উড়ে যান্না, বিভেদ-ভাবনা রাশি রাশি। অদৃশ্য নৃত্যে মত্ত, শব্দহীন নিদারুণ মাদানকার লে লে করা বৌয়ে, দূরেই অ-যাক্কা, অন্তরর মালিন্য-কালিয়া যত। ভাগেদেক আশিমার কালিরা গোপ্যায় জিঞ্জুর। মুক্ত করেদেক, গাজ-ভয়-ডরে গবে-কোনে-মাংকণে বৈয়া থানার বন্ধন, তার বজ্রাঘাতে।

বারো রহক বাঁশি। বারো সুটক হাহি। আঁকে দেক, কঙালা নিরাণে, হোনার ছনি, বিমানকার জাণো আহের হোনার মিঙাণে। আয় হে নতুন আম, গণে করে আম, তোর পুখ তোর এণা, তোর তলে তোর নাচ। নুমা প্রাণে আনে দে, আশার জোয়ার। উত্তরে দক্ষিণে, পূর্বে-পশ্চিমে এ প্রান্তেত্ত হৌ প্রান্তে, পারা ভূণোকে, সিতারিয়া থাক, ঝলকিয়া থাক হারৌয়ে-পিয়মে তোর স্নেহ-মমতার রূপাণী জোনাক।

দিক-দিগন্ত, পাহক চুটয়ে চুটয়ে, ভাষা উঠক ঘাট-খং-বিল-মাগর পাহিয়া। টেঙারা-টিংটিং, লপুক-লাম্ণাক, পত্র-পুষ্পদল, তরুণাখাবর উঠক হাজিয়া। হোনার ভাষার লেখা ছাণক জগৎ ব্যাপিয়া। দেশ-দেশান্তরে, উদ্যম-পাগাণা-মুক্ত বৌয়ে, পুখাগন্ধ মধুর ভাষা মোর, ছড়াক, ছিটাক। নুমা না পুরানা, এদেশ-বিদেশ, পুগম-দুর্গম, স্বজাতি-বেজাতি, যেপেই-মেপাদে আছি ভাষা মোর হবি নর-নারী, উচ-নীচ আতুর-পিতুর, গেইরা-বরা, বুড়া-বাণা, খাণনেই, বাছ নেই, স্নেহপাশে, আশিঙ্গনে, উরে, করক হাবিতারে। হমাক ঘরে ঘরে, গুহায়, পর্বতে, কন্দরে। অতীতর অনাচারে অনিশ্চিত ভবিষ্যতর ভয়ে ডরে, বর্তমানর বিচারে, বিশ্বব্যাপী নিদারুণে নিঃশব্দ, নিষ্কম্প প্রতিজনে, ভাষামোর, চলে দেক, জীবনর পঞ্জীবনী পুখা। হে বৈশাখ, তোর জ্বি-মেইপুণ রৈদর লেহা জোহানেই, জুলা, জ্বিগাদে, অজ্ঞানর নিগুঢ় আঁধার-অরণ্য-অটবী। আম বিজ্ঞানীচরণে, বরাদে বজ্র নিনাদে, কর্ণ-বিবরে, ভাষার অমোঘ মস্ত-জ্ঞান। আম অশনি-পংকতে, মেগাদে জিপেছি আহি, দিয়াদে দৃষ্টি নয়ানে। দৌ জিলি কেইয়া পৃথিবী দেহাদে, রূপে পুখ অক আহি। দেহকা, হারপাকা, হোমাদহান পাকা, পৃথিবীর মাটর কাননে, খুটে আহের রসময় বীজর অঙ্কুর। পিয়কা, অন্তরে জড়ের অহিনিশ

অমৃতৰ জীৱন ৰস ধাৱা। দেহকা, আহি-পটমেণে, নব পত্ৰ-পুষ্পদণে, ঠাৱে ঠাৱে, খুটে আছে, ৰৌদ্ৰকৰোজ্জ্বলে পুণিকিত  
প্ৰেম সুধা ৰসময় সুখৰ হপনে মাটিমাছে, সদাহাসি এ বসুন্ধৰা। অশেষ বৰ্ষণে, পড়ের আনন্দৰস, কতশতৰূপে, নানাদিকে  
নানা দিশে বিচিত্ৰ আনন্দ ছবি, তোর নবনব হৃদয়ৰ ৰঙে, আঁকা আছে, আকাশ ধৰণীতলে, বিমানকাৰ আণোৰ মিঙালে।  
ৰঞ্জিমা আছে, নব বৈশাখে, নব বসুধা, সহস্ৰ সুখে। প্ৰাণস্নোতে জীৱন-সমাজ, কৰেদেহে সৰ্ব্বাঙ্গ সুন্দৰ।

এ নুমা বছৰে, ব্যাপিমা পড়গা বিখে, দেশে, মহাদেশে, দূৰ-দূৰান্তৰে। তিলেগা জগতৰ জ্যোতিষ্ক সমাজে। দুৰ্গম, দুৰ্গতি,  
কিতা আছে ধৰিত্ৰী মাঝাৱে। চিৰ শিশু নাথায়ো আৰ মাণকৰ উৱে। বিছাড়েইমা চেইমা গৈ নিজ নিজ স্থান। নুমা  
আশা বুকবুজে, পাংকালে পাম্পণ টিংদে, ছুটে যেইগা জীৱন-সংগ্ৰামে। ধৰ এড়, গাও এড়, ছুড়েই বিশ্ব-সংগ্ৰামে।  
বাৱৈমা তেৱৈমা চেই, বৌ-বুলুণী, বৌ-বৰণ চেই, আনেদেহে বৈশাখে, খুণে-দেহে হাবিধাৰ, মুক্ত কৰেছে তোমাৱে।  
আহি মেণে হাণে চেই, পাহিমা পাৱেঙ, বৰদিমা মিতাৱাগা কুম্পেইংত কুম্পেই। উড়েইমা নেছেগা চেই, কাণা-কৃষ্ণ-  
ঘনাক্কাৰ মেঘ মাণা ৰাশি, গুপ্ত কৰেছে, ঘন-ঘোৱ-ঘটা। ইজাণ জাণ কৰেদেহে গগন মণ্ডল, হাজা দেহে পুঞ্জ পুঞ্জ ৰূপ।  
দৌ জিলিকেইমা, কাণা মেঘ চিৰে চিৰে, কৰেদেহে পথ। বজ্জিনিদে, ধমকে ধামকে, ছোচা দেহে পথৰ আছিল বাধা।  
আট পথ, দূৱেই কৈ, পৃথিৱী আজি কাদা।

মেপথে, অনন্তলোকে, যুগ যুগ ধৰে, বজ্জালোকে, চণেছি মনুষ্যহাবি, মহা মৰণৰে কৰিমা জন্ম, ওঁপথ, আমাৰতাউ পথ।  
আজি বৈশাখে জাগ, উঠ, ত্যজ নিদ্রা। হাট বাইৰে নুমা এ বছৰে, খুণিমা দোমাৱ। পড়িমা থাক, ধৰ-বাড়ী, মামা-মোহ,  
আত্মীয় কুটুম, জঞ্জাণে। আকদিন, আমা পিছে, দিতাজাই সামাল। ডাহেৰ বৈশাখ, আণিমা আঠুম্পা ধুম, বেণেইমা  
উঠিমা চেই, বৰণে খুণে বুজে আছে বিমানকাৰ বিশ্বৰ নন্দন-কানন।

প্ৰতিষ্ঠাৰ পথ গোলাপ খুণৰ নাগৈ। কণ্টক কিৰিটী। কণ্টকাৰ্ণীৰাজ সিংহাসন। কণ্টকেইনৈব কণ্টকম্। মহাসম্পদৰকা  
হৰু হাৱকাও সম্পদ খোয়ানীতে লাগতে। না ভাগিমা নাউ হঙৰ। হৃদয় পিণ্ড মুজুৰিমাহে জীৱন পিণ্ড গঢ়ন গৰ।  
কবিতুৰু ৰবিঠাকুৱে তাৱো মাতেছে -

‘জীৱন পপিমা জীবনেশ্বৰ  
পেতে হবে তব পৰিচয়  
তোমাৰ ডকা হবোমো বাজাতে  
সকল শঙ্কা কৰি জন্ম।’

নুমা বছৰৰ হিমাতৱা পাদৰ পঙ্কাজন হাবিৰে জানেইমাৱ।

শিলচৰ  
১লা বৈশাখ, ১৪১১ সন।

শ্ৰীগোপেন্দ্ৰ কুমাৰ সিংহ  
এ,সি,এচ (অবঃ প্ৰাপ্ত)  
মুখ্য সম্পাদক



## সূচীপত্র

১) পত্রিকা পরিচালক মণ্ডলীর চেয়ারমেনের কথা আকৃষ্টা	১
২) জতুগৃহ	৩
৩) কনভেন্ট গার্ল	৮
৪) ধ্রুব-জ্যোতি	১১
৫) অনীতা	১৫
৬) স্বর্গর সভা	১৮
৭) দোল উৎসব	২২
৮) নাটক বারহু আমি	২৪
৯) জীবন জিনার আরাক নাও	২৫
১০) নিংশিং ঘটির যারী	২৭
১১) ভাগ্যবতী	৩০
১২) কাজিরাজাত দ্বিদিন	৩৯
১৩) কিয়াকা আমি হাচাত্ত মিছারে যাম গুরুত্ব দিয়ার	৪৪
১৪) পুন্নিং অলাংগী	৪৫
১৫) কলঙ্কিনী	৪৫
১৬) মোর দেশ মহান	৪৬
১৭) সাহিত্য সভা পত্রিকা	৪৭
১৮) নাউ পাছরতৌ, চিরদিন তৈতৌ, খোনা নান্নি পিদিয়া	৪৮
১৯) তরুণোদয় সমিতি	৪৯
২০) প্রশান্তি সঙ্গীত	৫০
২১) ছৌ-ছুমারার প্রতিবেদক ব্যবস্থা (এ্যালোপ্যাথিক)	৫১
২২) পিত্ত পাথরী- মূত্র পাথরী (হোমিও প্যাথিক)	৫২
২৩) অন্ন পিত্ত - মূত্র পাথরী (আয়ুর্বেদিক)	৫৪
২৪) চক্ চক্ বক্ বক্ (স্বাস্থ্য-সৌন্দর্য্য)	৫৪
২৫) জ্যোতিষর আহিত মানু	৫৬

যথাতি

ডঃ মণি সিং

শংকর সিংহ

বিভূতি সিংহ

নহস

বলদেব সিংহ

সুশেখর কুমার সিংহ

দৃষ্টিকোণ

সুখজ্যোতি সিংহ

মিৎলাউবা

মণীন্দ্র কুমার

ব্রজগোপাল সিংহ

সেনারূপ সিংহ

রবীন্দ্র কুমার সিংহ

সুজিৎ সিংহ

মণিহার সিংহ

সুজিৎ সিংহ

কুলেন্দ্র কুমার সিংহ

মহেন্দ্র চন্দ্র সিংহ

ডঃ সুকুমার সিংহ

শ্রীহোম


কবিরাজ চন্দ্রবর্তী

আর, ডি,

দেবল

# নীল যমুনাৰ পাৰে

মণীন্দ্র কুমাৰ



বিষুপ্ৰিয়া মণিপুৰী সাহিত্য সভা প্ৰকাশন : আসাম

\*পুণ্ডৰীকানন্দ শৰ্মাৰ জীৱনী বাৰো বৃন্দাবন পৰিক্ৰমাৰ যাৱী পাকৰিক

দামহান্ - ৰূপা ৫০ হান



## তিনমাহীয়া বিশ্বপ্ৰিয়া মণিপুৰী সাহিত্য সভা, আসাম, পত্ৰিকাৰ পয়লা বছৰ পূৰ্ত্তিত পত্ৰিকাৰ পৰিচালক মণ্ডলীৰ চেয়াৰম্যানৰ কথা আকচুটী

এহান বেমিশাল সেতাহান - তিন মাহীয়া পত্ৰিকা, বিশ্বপ্ৰিয়া মণিপুৰী সাহিত্য সভা, আসাম, প্ৰকাশ কৰাণিকৰ আমাৰ চাংখল বিশ্বপ্ৰিয়া মণিপুৰী সমাজে আমাৰে না মাতেছি। এহানৌ সেতাহান - বিশ্বপ্ৰিয়া মণিপুৰী সাহিত্যিক গিৰিগাথানীয়ে সাহিত্য সভায় পত্ৰিকা নিকাললে লেখা দিতাঙাই বুলিয়া না মাতেছি। এহানৌ নিৰ্জলা সেতাহান - বিশ্বপ্ৰিয়া মণিপুৰী সাহিত্য সভাৰ কোন কৰ্মকৰ্তা বা সদস্য বিশ্বপ্ৰিয়া মণিপুৰী সাহিত্য সভাৰ পক্ষে পত্ৰিকা আহান নিকালানিৰ কা নামাতেছি। এহানৌ অতি সেতকথাহান - আমাৰ সাহিত্য সভাৰ কোন আঞ্চলিক কমিটিয়ে পত্ৰিকাহানৰ বিলি বন্টনৰ দায়িত্ব নিতাঙাইগা বুলিয়া নামাতেছি। আৰাকৌ আৰুপী কথাহান - বিশ্বব্যাপী ছড়েইয়া ছিতাৰেইয়া আছি আমাৰ বিশ্বপ্ৰিয়া মণিপুৰী কোন ব্যক্তি বিশেষে, আমাৰ সাহিত্য সভাৰে বা সাহিত্য সভাৰ কোন কৰ্মকৰ্তাৰে, বিশ্বপ্ৰিয়া মণিপুৰী ভাষা চৰ্চাৰকা, ভাষাৰ বিকাশ, বিস্তাৰ বাৰো উন্নতিৰকা, বিশ্বপ্ৰিয়া মণিপুৰী ভাষাৰ পত্ৰিকা আহান নিকালানি লাগেৰ বুলিয়া না মাতেছি।

১৯৯৯ ইংৰেজী৭ বিশ্বপ্ৰিয়া মণিপুৰী সাহিত্য সভাৰ তদানিন্তন সভাপতি শ্ৰীযুক্ত মণিকান্ত সিংহ গিৰকে (ভকতপুৰ) জোৰ কৰিয়া মোৰে তাঁৰ সাহিত্য সভাৰ কাৰ্য্যকৰী সভাপতি কৰিয়া লাঙ্গলৰ জোয়লহান মোৰ লেম্পালে পিদাদেছিল। ১৩ই জুলাই ২০০৩ ইংৰেজী৭ যেদিন মোৰে সাহিত্য সভাৰ সভাপতি পাতেছিল, ঔদিন এহান মাতিয়াই মি সাহিত্য সভাৰ সভাপতিৰ পদফাম স্বীকাৰ কৰেছিল, - 'মোৰে সভাপতি পাংলে, সাহিত্যৰ শ্ৰীবৃদ্ধিৰকা পত্ৰিকা আহান নিকালানি লাগতৈ। সাহিত্য, কলা, সংস্কৃতি বাৰো ভাষা ছড়া অন্য কোন সামাজিক কৰ্মে সাহিত্য সভা আত নাদতৈ। সাহিত্য সভা, সমাজৰ কোন সংস্থা, সভা, সমিতিৰ পৰিপন্থী বা প্ৰতিদ্বন্দ্বী নাইতৈ।

এ পৰিস্থিতিত, তিন মাহীয়া পত্ৰিকা, বিশ্বপ্ৰিয়া মণিপুৰী সাহিত্য সভা, আসাম ১ লা হাওন, ১৪১০ সনে জৰম অছিল।

সাহিত্য সভায় দেখিলা কথাহানি অতি সযতনে অক্ষৰে অক্ষৰে পালন কৰেছি।

অতি হাৰৌপা কথাহানি, অতি গৰ্ব-গৌৰৱৰ কথাহানি, আমাৰ বিশ্বপ্ৰিয়া মণিপুৰী, সমাজ-প্ৰেমী, সাহিত্য-প্ৰেমী, স্বজাত্যাভিমানী, (ইমাঠাৰকা) সৰ্বস্ব আশোৎসৰ্গকাৰী, ইমাৰ-সুযোগ্য ছৌ-জিপুং হাবিয়ে অকুণ্ঠিতচিত্তে পত্ৰিকাহানৰে বানা নুংশিলো গ্ৰহণ কৰলা, পাংলাক কৰলা। হৃদিবান সাহিত্যিক গিৰিগাথানীয়ে তাঁনুৰ মূল্যবান হৃদয়গ্ৰাহী লেখা-গল্প, প্ৰবন্ধ, নাটক, রম্যৰচনা, কবিতা, উপন্যাস, ছড়া, আদিলো, ৰূপে-ৰসে-গন্ধে-বৰনে পত্ৰিকাহানৰে হাজেইয়া তুলেদিলা। বাৰো সহৃদয় পাঠক পাঠিকায় হাৰৌ এয়া পত্ৰিকাহান গ্ৰহণ কৰলা। এহান অতি আশাব্যঞ্জক জাতীয় চৰিত্ৰহান।

কিন্তু পত্ৰিকা পৰিচালনাৰ ক্ষেত্ৰে পত্ৰিকাৰ পৰিচালক মণ্ডলীৰ অশেষ ভ্ৰটি-বিচ্যুতি থাইল। পত্ৰিকাহান সময়মত ছাপেইয়া প্ৰকাশ কৰানি নুয়ারলাং। পত্ৰিকাহান বিশ্বপ্ৰিয়া মণিপুৰীৰ প্ৰতি গাঙে-ঘৰে, শহৰে-নগৰে আতে আতে ফৌকৰে দিয়া নুয়ারলাং। এ ভ্ৰটি-বিচ্যুতি হানি আমি পৰিচালক মণ্ডলীয়ে মূৰ নঙেইয়া স্বীকাৰ কৰিয়াৰ। পত্ৰিকাহান এ কাৰণে আঁধাৰে বুৰে গেলেগা দায় দায়িত্ব হাবিতা পৰিচালক মণ্ডলীৰ। বিশ্বপ্ৰিয়া মণিপুৰী, গ্ৰাহক-গ্ৰাহিকা, পাঠক-পাঠিকা, লেখক-লেখিকা, ইমাঠাৰ নিংপা, সমাজ-নিংপা, বিশ্বপ্ৰিয়া মণিপুৰী সমাজৰ নাগৈ।

এ বিচাৰে পত্ৰিকাৰ পৰিচালক মণ্ডলী ভাষা-জননীৰ সেবাদাৰী অনা মনেইলে, ভাষাৰ শ্ৰীবৃদ্ধি, বিকাশ, বাৰো প্ৰসাৰ মনেইলে,

এ ট্ৰাটি-বিচ্যুতি অতি সযতনে দূৰেই কৰানি থকৈতৈ। যদি দূৰেই কৰে নুযাৰিয়াৰ বাৰো পত্ৰিকাখন প্ৰকাশ নার, উতা এলে বিষ্ণুপ্ৰিয়া মণিপুৰী সাহিত্য সভাৰ ভাবমূৰ্ত্তি বিনষ্ট ঐতে। সাহিত্য সভাৰ ভাব-মূৰ্ত্তি বিনষ্ট এলে, সাহিত্য সভা থানা, নাথানি সমাৰ্থক ঐতে। পৰিচালক মণ্ডলীয়ে যেহানি কৰেছি প্ৰসংশাৰ্হ শ্বৈনেই, কিন্তু কৰ্ম্মোন্নতি বাৰো প্ৰচেষ্টাৰ আৰাকৌ ফাম আছে।

পত্ৰিকাৰ মাধ্যমে ভাষাজননীৰ সেৱাৰ দায়িত্ব বহিয়া আমি আনন্দিত। সাহিত্য-সভা নিজৰে বিষ্ণুপ্ৰিয়া মণিপুৰী সমাজৰ সেৱাৰ সুযোগ পেইয়া কৃতজ্ঞ ও ধন্যমনে কৰেৰ। তিনমাহিয়া বিষ্ণুপ্ৰিয়া মণিপুৰী সাহিত্য সভা, আসাম, পত্ৰিকাৰ পৰিচালক মণ্ডলীৰ চেয়াৰম্যানে নিজৰ বাৰাংত বাৰো পৰিচালক মণ্ডলীৰ বাৰাংত বিষ্ণুপ্ৰিয়া মণিপুৰী সমাজৰে হৃদয়োপা কৃতজ্ঞতা জ্ঞাপন কৰেৰ।

গুৱাহাটী

১লা বৈশাখ, ১৪১১ সন

মণীন্দ্ৰ কুমাৰ সিংহ

চেয়াৰম্যান

বোৰ্ড অব মেনেজমেণ্ট

তিনমাহিয়া পত্ৰিকা, বিষ্ণুপ্ৰিয়া মণিপুৰী সাহিত্য সভা, আসাম

ইস্কুলৰ লেইৱিকৰ লগে  
অন্যান্য লেইৱিক, লেইছৌ, পত্ৰ-  
পত্ৰিকা পাকড়ানি হান হোভা  
অভ্যাস। জ্ঞান-পিপাসা বাড়েৰ।  
মানসিক বিকাশে পাংলাক অৱ  
পাকড়ানিৰ অভ্যাস আহান থাইলে



কোন সময় 'বোৱ' নাইয়াৰ।

বিশেষ কৰে অবসৰ সময়,  
বুড়াকাল, কাৰিড়ল অভ্যাস থাইলে  
নুঙেই কৰে কাটেৰ। পাকড়ানিৰ  
অভ্যাস হাবিৎত হোভা অভ্যাস।



## জতুগৃহ

যযাতি

সমানী ব আকৃতিঃ সমানা হৃদয়ানি বঃ।

সমানমস্ত বো মনো যথা বঃ সুসহাসতি।।

ভরদ্বাজের প্রার্থনা দেওবনের বোয়ে-বানায় ধ্বনি-প্রতিধ্বনি  
এয়া বুলে বুলে সংগীতার কর্ণ-বিবরে হমেইলগা। কথাহানি ছনিয়া  
সংগীতায় খালকরিরী সহস্র সহস্র বছর আগেউ আমার আপা-  
বপায় ভগবানরাং প্রার্থনা করেছিল। মনুর হৃদি-মন-আশা-আকাঙ্ক্ষা,  
আকতা অক। মত আকহান্ অক। কিন্তু, আজিযো নাইল। সীমাহীন  
আশা-আকাঙ্ক্ষা-লোভ-লালসায় এবাকাউ আমি হিংসা-দ্বন্দ্বলো  
পৃথিবীহানরে অশান্ত, ভয়ঙ্কর করিয়া থছি। নাইলে, আমার পৃথিবী,  
দেওবনের ডেকি শান্ত, কঙালা, স্নেহ-শান্তির বাসভূমি ঐলৈছ।  
ভরদ্বাজে বেদাবৃষ্টি করে —

কথা গ্রামং ন পৃচ্ছসি ন ত্বা ভীরিব বিন্দতি

ন বা অরণ্যানিহঁস্ত্যশ্চেন্নাভি গচ্ছতি।

স্বাদোঃ ফলস্য জগদ্বায় যথা কামং ন পদ্যতে।।

আজ্ঞন গন্ধিং সুরভিং বহুশ্রাম কৃষিবল্যাম্।

প্রাহং মুগানাং মাতর মরণ্যানি শংখিসম।।

বারণা বতর ৩০/৩২ মাইল দূরেইং বৈয়া জতুগৃহ দাহ আছে  
লাক্ষ্য মণ্ডলেদে চেয়া দুঃখ করের ভরদ্বাজ। পৃথিবীর পৃষ্ঠ রূপ  
পরিবর্তন আছে। মানুর মন পরিবর্তন নাছে। সাড়ে চারি পাঁচ লিখিং  
বছর আগে আর্য্যঋষি, কপিল, গৌতম, কণাদ, বশিষ্ঠ, বেদব্যাস,  
যেবাকা আশ্রমে বৈয়া পৃথিবীর ঐক্য, সাম্য ভাব, শান্তির প্রার্থনা  
করেছিল। উবাকাউ আকবেদে হস্তিনাপুরে দুর্যোধন, ধৃতরাষ্ট্র  
রাজ্যলোভে, জরম জেরতাকর জীপুং পঞ্চ-পাণ্ডবের বারণাবতে  
জতুগৃহ হংকরিয়া জ্বিং পুরিয়া মারানিরক পঞ্চপাণ্ডব বারো  
রাজ্য-ধন-দৌলতর লোভে দেশে দেশে মারামারি কাটাকাটি,  
চলেছে। মন উর্ধগামী নাইলে আধুনিক বিজ্ঞানর বিকাশ, বিশ্ব  
শান্তি আনে নুয়ারতৈ। সংগীতায় মতিরী —

- শাস্ত্র-নীতি-নিয়ম-ধর্ম-জ্ঞান, রাজনীতিত এতর ফামনেই।

তি আশ্রানে খাল করে করে নিজরে হিন নাদি। হাবি-চিন্তা-ভাবনা  
ভগবানরাং এড়েদিয়া মহাকাল যেরপে আহের ঔরুপে মানিয়া  
নেনাই যুগধর্ম। মানলে শান্তি। না মানলে অশান্তি।

ভরদ্বাজ নীলুয়া হাকহানাদে ভাহিয়া যারগা সূতার ডলা পারা  
বরণ চেয়া চেয়া মাতের -

- 'কালরিব কুতো সংসার, বায়ুবির কুতো মেঘ।' ভীষ্ম  
মাতেছে কথাহানি অতি যুক্তিপূর্ণ। তোরকথা হায়হান ঐলেউ মন  
হানেতে হয়ভর না কারের।

হিমালয়র দশহাজার ফুট উচ দেওবনে হর-পার্বতী মন্দিরর  
বারান্দাহানাং বৈয়া ভরদ্বাজ দম্পতি অন্তরে সংসারর শান্তি  
বিছাড়তারা। ভরদ্বাজে মাতের -

- সংগীতা এপথেই পঞ্চপাণ্ডব হস্তিনাপুরেংত স্বর্গারোহণে  
গেছিল। তানু মেঘনাদ পর্বত, ক্রৌঞ্চ পর্বত বদরিকাশ্রম,  
চন্দ্রকালী পর্বত, নন্দীঘোষ পর্বত, সোমেশ্বর, নৈমিষ কানন,  
গন্ধমাদন পর্বত, শতশৃঙ্গ পর্বত, কৈলাস পর্বত, হৈমবতী, ঐয়া  
হিমালয় ঐয়া স্বর্গারোহণ করেছিল।

ভরদ্বাজ, সংগীতা বারো কৌশিক দিল্লীংত হরিদ্বার, হাষিকেশ,  
লহমনুলা দর্শন করিয়া, দেবাদূন ঐয়া চক্রাতা বেলেইয়া দেওবনে  
আছেছিল। ভরদ্বাজে মাতের -

- চৈত্রথ পর্বত বা চক্রাতা দেবাদূনেংত ১১ মাইল উত্তরে।  
৬৯৫০ ফুট উচ্চ। Col. Hume, ১৮৬৬ সালে চক্রাতাংত বৃটিশ  
আর্মিরকা কেন্টনমেন্ট আগো হংকরেছিল। চক্রাতাংত দিল্লী,  
মুসৌরী, সিমলা, যানা যাকরের। দেওবন চক্রাতাংত ৩৬ মাইল  
উত্তর-পূবে। দেওবনর ১৭ মাইল পশ্চিমে বারণা বা বারনাবর্ত।  
ধৃতরাষ্ট্র বারো দুর্যোধন গাছিয়ে ষড়যন্ত্র করিয়া বারণাবতে  
লাক্ষ্যমণ্ডলে জতুগৃহ হংকরিয়া পুড়িয়া মারানিরক পঞ্চপাণ্ডব বারো  
মাতা কুন্তীরে দিয়া পেঠা ছিলাতা। পঞ্চ পাণ্ডবের ধৃতরাষ্ট্রয় -  
পাঁচহান গাঙ দেছিল। ইন্দ্রপ্রস্থ, কুশল, বারনানগর, সুকান্তি বারো  
পাণ্ডব নগর। বারনাবত ও পাচ গাঙর গাঙ আহান। কৌশিকে  
ভরদ্বাজর কথার হাদিং মাতল -

- এ চৈত্রথ পর্বতে পাণ্ডু বারো কুন্তীরে, ধর্মরাজরে আরাধনা  
করিয়া যুধিষ্ঠির; পন্দবেরে আরাধনা করিয়া ভীম; ইন্দ্ররে আরাধনা  
করিয়া অর্জুন, বারো কুন্তীর আরাধনায় অশ্বিনীকুমার দ্বিযোগীরাংতো  
মাদ্রীয়ে নকুল, সহদেব এ পাঁচগ ছৌ পাছিল। পাণ্ডুরা নুয়ারা ঐয়া  
স্ত্রী-সাহচর্য্যে পাণ্ডুর মরণ অবধারিত আছিল। বংশ রক্ষারকা  
পাণ্ডুর যাতাংলো কুন্তীরে দৌ এতা কামনা করিয়া ছৌ পাছিলাতা।  
ভরদ্বাজে মাতের -

- চৈত্রথ পর্বতে স্বর্গর দৌ-দুক, ইন্দ্র-বরুণ, অগ্নি, অপ্সরা,

উর্বশী, মেনকা, কৈলাসেত হর-পার্বতী, ত্রিলোক, বুলেকুরা নারদ, হাবিয়ৌ আইলা বুলেছি। আমার কাব্যে দেওবনরে এসাদে মাতেছি -

মহাবণ-দেওবন ভূবন মোহন  
নিত্যকৃত্য কর তারা হাবি দেবগণ।  
মহাতীর্থ দিব্যলোক স্বর্গ সমাণা  
অমর কিন্নর আদি খার সর্বজন।

কবিয়ে দেওবনর প্রাকৃতিক শোভা এসাদে বর্ণনা করেছি -

নীল নভোমণ্ডলঃ বিদারিণী অমলঃ ধবলঃ শৃঙ্গম  
শ্বেত শুভ্র কিরিটীনি হিমগিরি মণ্ডলম।  
তরুণর সুশোভিতঃ তরীদেহাঙ্গোবসুষ্ঠম  
হীরক-কাঞ্চন রশ্মি শশীকিরণ কমলম।  
হরতি নয়নম তুষারাবৃতঃ পিনোন্নত বক্ষম.....।

কৌশিকে মাতের -

- দাদা, এ তিরুমল ভেঙ্কটেশ্বামী অনন্তলিঙ্গম, বছরে বছরে দেওবনে আইয়া কিতা বিছাড়ার্তা। ইউনিভারসিটির ছুটিহন এবতায় আহের।

সংগীতায় কথাহান কারো লৈয়া মাতিরী -

- গেল্গা কালি আঙকরতে মাতেছিল - ব্রহ্মবর্ত, আৰ্য্যাবর্ত, বক্ষাৰ্শিদেশ, মধ্যদেশ দ্বতী - ত্রিশা রাজ্য, কুরু-পাঞ্চাল, ইন্দ্রপ্রস্থ, হস্তিনাপুর, ভোজ, মৎস্য, মদ্র, চেন্দী, কাশ্মোজ, অবন্তি, গান্ধার, কাশী, মগধ, কোশল, বিদেহ, বৎস্য, হিরান্ধি, একচক্রা, কৌসুন্তী, বিরাট, এতা বৈদিক যুগর কতি আগেত আছেতা এহান হারপানী মনার। ঋকবেদ, অথর্ববেদ, ছান্দোগ্য, চরক, শ্রুতি স্মৃতি, পুরাণ মনু, ভগবদ্ পুরাণ, সূর্য্যবংশ, চন্দ্রবংশ, ভরতবংশ, কুরুবংশ, পুরুবংশ, এতার সামঞ্জস্য, যোগসূত্র, নিদর্শন বিছাড়ার।

কৌশিকে মাতের -

- খৃঃ পূর্ব ১৪ ই অক্টোবর ২৪৪৯ অব্দে কুরুক্ষেত্রর যুদ্ধহান আছে বুল্‌তারা। মাঘ শীর্ষ মাসে, মঘানক্ষত্রে যুদ্ধ যাত্রা অছিল বুলেছি। এবদে, শ্রুতি, স্মৃতি, ঋক্, অথর্ববেদ ১২০০-১০০০ বছর খৃঃ পূর্বাঙ্গে ইকরেছি বুলতারা। আকতায় গৌতমর ন্যায়শাস্ত্র, কপিলর সাংখ্য দর্শন, পতঞ্জলীর যোগ, কনাদর বৈশেষক, জৈমিনীর পূর্ব মীমাংসা, বেদব্যাসর উত্তর মীমাংসা, বেদাঙ্গ, পানিনী অষ্টাধ্যায়ী, সূরত সূত্র, ধর্ম সূত্র, বর্ণাশ্রম, এতা ৭০০-২০০ খৃষ্ট পূর্বাঙ্গে ইকরেছিল মাৎতারা। বালগঙ্গাধর তিলক, জাকবী, গাছিয়ে ৬০০০-৫০০ খৃষ্ট পূর্বাঙ্গে বুলিয়া মাৎতারা। আরকিও লজিকেল গবেষণায় কুরুক্ষেত্র যুদ্ধ খৃঃপূঃ ১৫০০-৯০০ বছর আগে অছিল বুল্‌তারা।

বৈদিক যুগর দশাদবতীর সরস্বতী এবাকা নেই। নাঙ, সাং, পরিবর্তন এতে এতে খেইচা খেইপক, জোড়াতালি দিতে দিতে বৈদিক যুগর রাজ্য, জনপদ আকতারউ চিন্‌ ছাপ নেই। অত সহজ এব নিঙ নাকরুরী। সংগীতায় মাতিরী- পঞ্চ-পাণ্ডবর স্বর্গারোহণর কথা অনন্ত লিঙ্গমরাংত হনবাং নাই। কৌশিকে, ভরদ্বাজে কথাহান য়াকরলা। আইব কালি বেলুকা ও বাজি, বুলিয়া সময়হান ঠিক করিয়া, তিরুমল ভেঙ্কটেশ্বামী অনন্ত লিঙ্গমরে জনানীর ভারহান কনাক পারা, কৌশকরে দিলা।

পিছেকার দিনে, অনন্ত লিঙ্গমে - 'স্বর্গারোহণ য়ারীহান পিছেদে মাতিং এবাকা বারণাবতে লাক্ষ্মণমণ্ডলর কাদাং আছি হনতে জতুগ্‌হ দাহর য়ারী হনিক বুল্‌ল। সংগীতা, কৌশিক দ্বিয়োগীয়ে য়াকরলা। ভরদ্বাজে আক্‌তাউ না টটরেইয়া থাইল অনন্ত লিঙ্গমে য়ারীহান অকরল -

- রঙ্গভূমিত অস্ত্র-শিক্ষা প্রদর্শনর পিছে যুধিষ্ঠিররে কুরুরাজ্যে যুবরাজ অভিষেক করলা। পঞ্চ-পাণ্ডবর অস্ত্র কৌশলে দুর্যোধন, দুঃশাসন, সূত-পুত্র রাধেয় কর্ণ, মনে হীন পেইলা। পিতামা ভীষ্ম, কুলগুরু কৃপাচার্য্য, অস্ত্র শিক্ষাগুরু দ্রোণাচার্য্য, ধর্মপুত্র বিদুর, হারৌ এলা। পঞ্চ-পাণ্ডবর যশ-কীর্তি, বিশেষকরে যুধিষ্ঠিরর সুখ্যাতি, কুরুপতি ধৃতরাষ্ট্ররেউ মনে হীন দিল। তার পুতক দুর্যোধন আর রাজানা পালৈতৈ, এ নিঙে জন্মান্ধরাজা ধৃতরাষ্ট্র, মন-বুদ্ধি-বিবেকর আহি হাবি হারা বেল্‌ল। রাজানা পালৈলে, দুর্যোধন জিংতা এয়া থানা না মনেইল। বাপকর মুঙে আইয়া মাংল -

কিং ন জীবিতেন রাজকিরিটীম্ বর্জ্জিতম।

শ্রেয়ঃ প্রাণ বিসর্জ্জনম রাজ্য বিহীনম।।

পুত্র স্নেহান্ধে বুদ্ধি-লৌশিঙ মাঙছে ধৃতরাষ্ট্র, শকুনি, দুর্যোধন, দুঃশাসন, দলর দুষ্ট মন্ত্রী হাবিরেল শিব চতুর্দশীর রাত্তি বুদ্ধি তাল করিয়া বৈলা। ভীষ্ম, দ্রোণ, কৃপাচার্য্য, বিদুর, কর্ণ, কারেউ না ডাক্‌লা এ হীন কর্ম তানু না করতায় বুলিয়া। পঞ্চ পাণ্ডব লগে মাতা কুন্তীরে - যতদিন মনেইতারা বারণাবতে আনন্দ বিহারে গিয়া থানারকা ঠিক করলা। লগে, লাগের ধন দৌলং, আশ্চি-ঘোড়া-বথ, খানা-পিনার উপাচার, রথী-সিপেই সামন্ত দেনা ঠিক এল। হাবিরে জুয়েইলা লালফামে, অশ্বমেধ যজ্ঞ করে, হীন পাছি হনতে, কুন্তীসহ পঞ্চ-পাণ্ডব ভূবন-মোহন বারুণাবতে হীন কাটেইয়া দেহ-তন-মন হরতানির কা আনন্দ বিহারে যিতারাগা। ভিতরে ভিতরে ঠিক করলা, বারণাবতে রাজকন্ডোঙে জিং পুড়িয়া সবংশে মারিয়া কুরু রাজ্য বারো কুরু সিংহাসন দুর্যোধনরকা নিষ্কটক করাণি। রাজ কন্ডোঙ ঘি-খৌ-লা দাহ্য পদার্থলো ইন্দ্র সরালেলর কন্ডোঙ



পাৰা মনোহৰ, বারো ধৰে নুৱাৰানি পাৰাক চেক্‌ছিল এয়া হংকৰানিৰ  
কা মন্ত্ৰী, পূৰ্তবিদ্ পুৰোচন গিৰকৰাং ভাৱহান দিলা।

অন্তৰে কপট, থতাহানাং মধুৰ, দেহগত বিনয়, ধৃতৱাস্তৱ  
দুৰ্য্যোধনৰ কথা ছনিয়া যুধিষ্ঠিৰে ডাহিয়া মাংল -

- ততঃ শ্ৰবনমোক্তা দুৰ্য্যোধনম স্নেহাকৃষ্টা যুধিষ্ঠিৰম  
ধৃতৱাস্তৱ প্ৰপূচ্ছ মহাত্মনঃ মহাতীৰ্থ দেবলোক দেওধাম  
গন্ধৰ্ব-কিল্লৰ-দেব সৰ্ববাধিষ্ঠানম অনুপমোদ্যান  
পত্ৰপুষ্প ফলাহাৰং মৃগয়ানন্দং যদমন্যসি তদ্বাস ভবান।

সংগীতায় কথাহান থেং কৰিয়া মাংলী -

- এতা পাৰা কুৰুৱাজ, সমগ্ৰ আৰ্য্যাবৰ্ত, ব্ৰহ্মবৰ্ত আংশিক  
মধ্যদেশ বারো ব্ৰহ্মৰ্ষি দেশৰ অধীশ্বৰ ৰাজা আগয় স্বয়ং  
জ্যেষ্ঠাৰেয়কৰ জিপুতৰে এসাদে জঘন্য ষড়যন্ত্ৰ কৰিয়া মাৰানিৰ  
ওয়াখাল, কিসাদে য়াকৰলতা লাভ-লজ্জা-মানুৰ নিন্দা খালকৰে  
নুৱাৰলতা। অনন্ত লিঙ্গমে ব্যাখ্যা কৰে -

ৰাজনীতি এহান ৰাজশক্তি পালকৰিয়া থনাৰ নীতি শাস্ত্ৰহান।  
ৰাজনীতি, সমাজবাদ, মনশিক্ষা, নীতি-শাস্ত্ৰ, এতা থেইথেই।

জ্ঞান পথে পাপ বারো পুণ্যৰ কল্পনা

হাবিতা বৃথা এতা মনৰ ভাবনা।

পুত্ৰ-স্নেহ মায়া মোহ নাউ অৱ দূৰ

আত্মজ্ঞান নাউ কানা শাস্ত্ৰ বিধূৰ।।

দুৰ্য্যোধন মৱতৈ বুলানিয়ে ধৃতৱাস্তৱ পথি বিছাড়লো। কুৰুক্ষেত্ৰৰ  
হাবিৎত বয়োজ্যেষ্ঠ বুড়া বামন মন্ত্ৰী কণিকৰে ডাকল। হাবিতা  
বাগেইয়া ৰাজনীতিয়ে কিহান মাতের আঙকৰল। কণিকে ঔদিন  
ধৃতৱাস্তৱে ৰাজনীতি বাগাদিল -

- দোষ যদি নাউ থাৱ তেবো দিছ দণ্ড।

আত্মবশ কৰে থৈছ হাবি ৰাজ্য খণ্ড।।

আত্মবশ লুকাইথৈছ অতি সযতনে।

পৰৱৰ্ত্ত পেইলেই ধৰিছ চেতনে।।

দুৰ্ব্বল ঐলেউ শত্ৰু দয়া না কৰিছ।

শৰণ লৈলেউ শত্ৰু মাৰাণি তালকৰিছ।।

ব্যাধি, জ্বি, অৰি-ৰিপু ঋণ স্ৰবশেষ।

থৈলে বাড়তৈ, দিতৈ যাতনা অশেষ।।

পাংকাল্পা শত্ৰুৱে সদা দেখুয়েইছ বিনয়।

অপমান-বহু ক্ৰেশ ঐলেউ হৃদয়।।

লেম্পালে কাকৰে তাৰে থৈছ তুলিয়া।

সুৰাক পেইলে তাৰে মাৰিছ আছাড়িয়া।।

বলিৰে লৌশিঙে জিঙে মাৰানি বলে।

লোভীৰে ধন দিয়া মাৰতেই ছলে।।

মায়ায় পতিত উগোৱা নারনা বিকাশ।

মানুয়ে না দেখ্তাৱা নিদ্রায় আকাশ।।

দয়ামায়া স্নেহ এতা হৃদিগৰ কথা।

ভগ্ন-হৃদিং প্ৰীতি পুণ্য নাহানিৰ কথা।।

- ব্ৰহ্মা, যে গিৰকে এ সৃষ্টিহান ৰচেছে ঔগিৰক ঔগয় নিজে এ  
মায়া মোহ এতা জৱমদিয়া অনাসৃষ্টিয়ৌ ৰচেছে।

- উহান বারো কিসাদে? কৌশিকে লুমপাঙ এয়া অনন্ত লিঙ্গমৰে  
প্ৰশ্ন কৰে। অনন্ত লিঙ্গমে মুক্সি আহান দিয়া মাতের -

- এহানেই সৃষ্টিৰ হাৱপা-নুয়াৰা বিস্ময়। জোনাক, বেলী, হাগ,  
বৌ, জ্বি-পানী-জীৱ-জন্তুলো পৰিপূৰ্ণ উপজীব্য জগৎ আহান  
হংকৰিয়া ৰাছ-কেতু-বৌ-বৰণ-ভূমিকম্প, নুয়াৰা-পানী, মায়া-মোহ-  
লোভ, হিংসা-নিদ্ৰাউ সৃষ্টি কৰেছে। জোনাক-বেলী, ৰাছ গ্ৰাসে  
গ্ৰহণ অৱ। হাকহান বৰণে গুড়ৈৰ, বৌহান অৱ ভয়ঙ্কৰ বৌ-  
বুলুনিয়ে ভয়ঙ্কৰ অৱ জ্বিগয় পানীৰে নিবাৱ, ঘৰ জ্বি লাগাৱ, গুলাৱ  
পানীয়ে মানু-জীৱ-জন্তু মৱতাৱ। জীৱ জন্তু আগয় আগৰে  
থেইতাৱ। চা, ব্ৰহ্মাৰ পুতক অধৰ্ম্ম। অধৰ্ম্মৰ মৈলক-মিছ। তানুৱ  
পুতক দন্ত, জিলক-মায়া। এ বেইবুনি দ্বিযোগীয়ে বিয়া কৈলা।  
জৱম দিলা পুতক-লোভ, কন্যা-শঠতা। লোভে শঠতায় বিয়া ঐল।  
জৱম ঐলা পুতক-ক্ৰোধ, জিলক-হিংসা। ক্ৰোধে হিংসাৰে বিয়া  
কৈল। জৱম ঐলা, পুতক-কলি, জিলক-দুৰুজি। তানুৱ পুতক-  
ভীতি, জিলক মৃত্যু। মৃত্যু ঐলে নৱক বারো যন্ত্ৰণা। এতা না থাইলে  
সৃষ্টি এহান কতি হোভা ঐলৈছতা।

- এতাতে uncle, ৰূপক নাই। এতাতে দশেমন্দ্ৰিয়ৰ উপবাচ্য  
কথা নাই। এতাতে জ্ঞানলো উত্তীৰ্ণ অপাৰিয়াৱ। সংগীতায়,  
অনন্তলিঙ্গমৰ কথা য়াকৰানি হীন পেইৰী। অনন্ত লিঙ্গমে যুক্তি  
দেখাৱ -

- কিন্তু জগৎ হানতে মানুয়ে চালেইতাৱা থাঙ? জগৎ হান, এ  
দশেমন্দ্ৰিয়ে তৌৰীগ কৰে বুলেইয়া চালেইতাৱানাই। সংগীতায়  
য়াকৰলী। মাতিৰী -

- হাইহান! সন্ত গুণলো, দয়া-মায়া-প্ৰীতি-স্নেহ-মমতা, দান-  
ধৰ্ম্ম এতা বয়স ঐলে, আচৰণ কৰানি লাগেৱ। এহান মাতিয়াৱতা।

- হাই। পেইলেগা। নুয়াৰা নুয়াৰা দিয়া, নুয়াৰাৰ লক্ষ্মণৰ  
পৰিবৰ্ত্তন চেইয়া, সময়ে সময়ে হজক বদলেৱ। কথাহানি মাতিয়া,  
অনন্ত লিঙ্গম য়াৱি হানাং পড়িলগা -

- দুৰ্য্যোধনৰ আদেশ, মন্ত্ৰণা, পৰামৰ্শ, ইলৈয়া পুৰোচনে  
ৱাৱণাবতে ঘি-লা-খৌ বুজিয়া জতুগৃহ হংকৰল। জন-প্ৰাণী

অলেক্ষে হমানি, চরেদে নিকুলিয়া গিয়া নারানি, হাবিরকমর সতর্কতা থৈয়া, পঞ্চ-পাণ্ডবর শুভাগমন প্রতীক্ষা করিয়া থাইল। যুধিষ্ঠির, ভীম, অর্জুন, নকুল, সহদেব, মালক কুন্তীরেল বারণাবতে ছাঁলৈলা। প্রজা দেহা করাৎ আইয়া কাঁদিয়া লগ লৈলা। ধৃতরাষ্ট্র, বিদায়দিতে কপট আহির পানী বেলল। দুৰ্যোধন, শকুনি গাছি কতহান পথ আগ বারাদিলা। হীন না পেই, কতদিন আনন্দ ঐয়া থাইগা, বারোতে আইতারাই নাই, বুলিয়া বিদায় দিলা। ভীষ্ম, দ্রোণ, কৃপাচার্য, আকতাউ নামতিয়া থাইলা। ধর্মমতি বিদূরর মনে খটকা লাগিল' অনন্ত লিঙ্গমে খানিপর খালকরিয়া বারো মাতের —

- যুবরাজ্যে অভিষেক ঐয়া যুধিষ্ঠির, চারিযো বেইবুনি, মাতা কুন্তী, এমাটিক হারৌ ঐয়া আছিল, এতায়, হঠাৎ আজি বারো, কিসাদে হারৌ পানা মনেইয়া নুয়া গাঙ আহনাত যানা মনেইলাতা? চিন্তাকুল বিদূরর রাতি ঘুম নেই। তাপথা নিঙশিঙ এল। অভিষেকর দিন দুৰ্যোধন, দুঃশাসন, শকুনি হারৌ নাছিল। অভিষেক লমনির আগে নিকুলিয়া গেছিলগা। ধৃতরাষ্ট্রর আহিগীত আনন্দ, মেইথঙে হারৌর মিঙাল, নেয়ছিল। গেলা কালিৎত দুৰ্যোধন গাছি জবর হারৌ অছি। তারেউ মর্যাদালো মাতেইতার। যুধিষ্ঠির, বারণাবতে যানার পৌহান দিয়া আহির পানী বেলছিল। মাতেছিল- রাজা ধৃতরাষ্ট্রর মাতের হানতে যারগাত। বিজ্ঞ, ধীর, স্থির, মতিমান বিদূর চৌরিয়াল দিয়া পেঠেইল। হঠাৎ মাতা কুন্তীরেল পঞ্চ পাণ্ডব বারণাবতে যানা এহান বিদূরে অন্তরে হিজা নুয়ারল। চৌরিয়াল ছাড়া এ পৌ পানা নার। বিদূরে কণিকর কথাহান নিঙশিঙ এল -

‘পণ্ডরে গতে হারপার বেদে দ্বিজবরে।

মনুষ্যয় দেহিয়া হারপার রাজায় হারপার চরে।’

রাতি নঙেইং চৌরিয়ালে পৌ আনলা, পুরোচন, ঘি-খৌ-লা, মেন্তরী, খননক, অস্ত্রশস্ত্রলো বারণাবতে গেছেগা। বিদূরর সন্দে গাঠৈল। হঠাৎ তার মনে এল, জ্বি আগ দাউ দাউ করে তার ঘরর মুঙর চালহানাং লাগেছে। বিদ্যাবতী, মাদ্রীয়ে পানী হিচিয়া নিবাত লাগেছি। বিদূর বিয়ান বাছেইয়া ফামে গুইয়া থাইল গা। বিয়ানে যুধিষ্ঠির গাছিরাজকমোঙ বেলেইয়া পথ আধাক্রোশ ঐলাগা উপেয়, রথহানলো যুধিষ্ঠিররে পেইলগা। যুধিষ্ঠিরে হমারহা দিয়া উঠতে, বিদূরে আশীর্বাদ করিয়া মাংল -

- স্বযোনী অন্তক সং শীতলস্য অরি। তস্মাৎসংরক্ষত্বম চারিঃ।

বিদূরে যবন ভাষালো কথাহান মাতেছিল হানতে যুধিষ্ঠির ছাড়া অন্য কোনগয় না বুঝলা। কৌশিকে আচরিত ঐয়া মাংল -

- এ যবন ভাষা এহান না হারপেইলু। ঔবাকা ব্রহ্মবর্ষে, আৰ্য্যাবর্ষে, ব্রহ্মর্ষিদে, মধ্যদেশে, কি কি ভাষা আছিল। কুরু-

পাঞ্চগল-মৎস্য-শূরসেন-মগধ, ভোজ-মদ্র, চেদী, কুশল-বিদেহ, বিরাট - পাঞ্জাব, কাবুল, কাশ্মীর, কান্দাহার, হাবি রাজ্য কোন না কোন সূত্রে সমন্ধ থছিল। বিশেষ করে স্বয়ম্বর সভাত, অশ্বমেধ যজ্ঞত হাবি রাজ্যর রাজা রাজেশ্বর তিলৈলা। কান্দাহারৌ উবাকা ভারত ভূমে আছিল। গান্ধারীযৌ গান্ধার রাজ্যর রাজকুমারী আছিলী। কিহান এ যবন ভাষা হারপানি থক।’

- এবাকা যেসাদে ভারতে বিভিন্ন ভাষা আছে, উবাকাউ আছিল। বিশেষ করে দক্ষিণাবর্ষ, পূর্বদেশ, এতাত-নিজস্ব আঞ্চলিক ভাষা আছিল। কিন্তু অধিকাংশ শাস্ত্রে বৈদিক যুগে দেব-ভাষা বা সংস্কৃতে আছিল। কিন্তু টটরলা ঠারতে নিজর নিজর মাতৃভাষা বিদূরে কথাহানি দেব-ভাষা সংস্কৃতে মাতেছিল, যেহানে অন্যতায় না হারপেইলা। হাবিয়ে না হারপেইলা বুলিয়া সংস্কৃতরে যবন ভাষা মাতে থাইবা। তি মাতর পারা, এ দিশাহানাং আমি চর্চা করানি থক। অনন্ত লিঙ্গমে য়ারীহান থুঙকরানি মনেইল। মাংল -

- বারনাবতে ফৌএলে পুরোচনে পঞ্চ-পাণ্ডব, বারো মাতা কুন্তীরে সাদর সম্ভাষণ জানেইল। রাজকমোঙে যথাস্থানে হাবিরে যথারীতি আপ্যায়ণ করল।’

- পঞ্চ-পাণ্ডব কিতা চক্রাতা ঐয়া বারনাবতে গেছিলগাতা? সংগীতার প্রশ্ন।

- এ পথ তানু আগেৎত চিনেছিল। এপথে বিরাট রাজ্যে নেপাল পেয়া গেছিলগাতা। তানুর আনা যানা আছিল। হস্তিনাপুরেৎত তুপসাম ১০০ মাইল ঐতে পারে।’ অনন্ত লিঙ্গমে প্রশ্নোত্তর দেল।

- মাত্র কতদিন থানারকা, এমাটিক হোভাক জাক জমকলো মণিরত্ন পালকরিয়া ইন্দ্রপুরী পারা হংকরেছি রাজকমোঙ দেহিয়া যুধিষ্ঠিরর সন্দে গাঠৈল। বৃকোদর ভীমরে ঘরগ পরীক্ষা করানিরকা মাংল। ভীমে পরীক্ষা করিয়া বাগেইল, ঘরগ ঘি-খৌ-লা বুজিয়া বুজিয়া হংকরেছি। হারপেইয়া যুধিষ্ঠিরে হাবিরে হুশিয়ার করল।

লৈলাট-লালফামে যুধিষ্ঠির স্থির-ধীর অর। আকতাউ নাছে ভাবহানলো, বনভ্রমণ, মৃগয়া করিয়া থাইলা। পুরোচনরে হারপানি দিলা, তানুর কোন সন্দেহ নেই। মনে মনে কৃষ্ণচতুর্দশীত পুরোচনে ঘরগ জ্বি দিতে, উহান বাছেইয়া, কিসাদে হাবিগীরে জিৎতা করানি, চিন্তা করিয়া সাবধান ঐয়া থাইল। যেসাদে বিপদ আহিলে পাহিয়া পাখ হাপদিয়া হাদিগোং বরেয়া থৈরী শৌ জাপদিয়া উসাদে যুধিষ্ঠিরৌ, মালক বারো বেইবুনি চারিযোগীরে কলকরিয়া থৈল।

এবেদে বিদূরর চিন্তা। কিসাদে পঞ্চ-পাণ্ডব, মাতা কুন্তীরে রক্ষা করানি। বালাপারা সুডুং খুদেকরা আগ পেইল। উগরে



সাংকেতিক পরিচয়দিয়া যুধিষ্ঠিরবাং বারনাবতে দিয়া পেঠাদিল।  
খননিকে ঘরর ভিতরেত সুডুং খোদিয়া গঙ্গাহানার পশ্চিম পারগ  
কৈয়: নিয়া জঙ্গল আহানর হাদিং নিকাল দিয়া গেলগা। এবেদে  
বিদুরে গঙ্গাহান লালনি পারবা ক নৌউলী আগ নৌল দা পেঠাদিল।

- চতুর্দশী আহিল। কুন্তীয়ে চতুর্দশী ব্রত করিরা। ভীমরে  
ব্রাহ্মণ-ভোজন করুয়ানিরকা মাংলী। শ'য়ে শ'য়ে ব্রাহ্মণ ভোজন  
করলা, গেলাগা। সেকা-সেকাত মুনি জীপুত পাঁচগলো নিষাদ-  
গৃহিনী আগ কুন্তীরাং অন্নভিক্ষা মাগলী। আহারান্তে রাতিকার আশ্রয়  
বিছাড়লী। কুন্তীয়ে আশ্রয় দিলী। এহনাং সংগীতায় ঠাচা না করিয়া  
প্রশ্ন আহান আঙকরলী -

- উত্তর হিমালয়ে গঙ্গাতে ভগীরথী গঙ্গা বুলিয়া মাংতারা।  
বারো বারনাবতেত ভগীরথী গঙ্গার পার, কমেউ দিন আহানার  
পথ। বারো টেঙার খং কিতায় বুজেছে। উতার গজে দরা হিল  
মহি। খননিক আগয় এতাপারা দীঘল সুডুং আগ রাতি আহানাং  
খোদানিহান কিসাদে সম্ভব। এতাহাবিতা গরৈপা য়ারী পারা  
লাগের।'

- ঐতে পারে। য়ারীতে য়ারী নাই। ঐলেউ বুদ্ধি-লৌশিঙ  
খাটেইয়া যুক্তি পূর্ণ করেছে। আসুটা ঠাচা নেই য়ারীতে নাগে।'  
অনন্ত লিঙ্গমে যুক্তি দেখয়েইরা মাতের -

- রাতি চিকৈয়া হাবি ঘুমে পড়লে ভীমে পুরোচনর ঘরর  
দোয়ারে, অস্ত্রগারে, জতুগুহে জ্বি-দিয়া, মালকরে লেঙ্গালে তুলিয়া,  
বেইবুনীগিরে মুঙেদিয়া সুডুঙ্গ পথে হমেইল গা। বিয়ান ফুয়ানির  
আগে কালা চিংখেই গঙ্গার পারে বন হানাত নিকুল্লা। কতহান  
আটিয়া গিয়া গঙ্গার পারে আইলা। গঙ্গার অথে পানীহান দেখিয়া  
লালনীর চিন্তা করতারা মাপাহানাত নৌউলীগ ধলা ফিরাল-টাঙা  
নৌগল কাদাং আয়া উবাএলী। পরিচয় দিলী। বিদুরে গঙ্গাহান  
লালকরে দেনারকা দিয়া পেঠাছে মাংলী।

নৌগং কাইয়া গঙ্গাহান লালৈয়া বন আহানাং হমেইলা। যি-  
থৌ-লা লো হংকরা লাক্ষাগৃহ বা জতুগৃহ বোয়ে বানায় দাউ দাউ  
করে লাগিয়া উঠিল। কালান্তক জ্বি-গং পুরোচন গাছিবারো নিষাদ-  
গৃহিনী লগে তেইর পাঁচগ মুনিছৌ জ্বিত পুরিয়া মরলা।

- বিয়ান্ত পৌহান বৌর আগে আগে, গাঙে গাঙে, ঘরে  
ঘরে, ফৌএলগা পঞ্চ-পাণ্ডব, মাতা কুন্তী জতুগৃহে দাহ এয়া মরলা।  
হস্তিনাপুরেউ পৌহান গিয়া ফৌএলগা।

- ধৃতরাষ্ট্রর আহির পানী পড়িল। অন্তরগ মুজুরিয়া ছুমেউ  
কাঁদল। হাজার ঐলেউ বংশর বহক, জীপুতর ডেকি বেয়কর জীপুত।  
কুরুবংশ নাই। কুন্তি বুলিয়া নিষাদ গৃহিনীর পুড়া দেহগ, পঞ্চ-  
পাণ্ডব বুলিয়া নিষাদ জীপুং পাঁচগীর দেহগী হস্তিনাপুরে আনিয়া  
রাজকীয় মান মর্যাদালো দাহকার্য করলা।

ভীষ্ম, দ্রোণ, কৃপাচার্য ঠাচা না করলেউ দুর্বল হৃদয়ে ঐতেউ  
পারে বুলিয়া মাঙহান মানেইলা। বিদুরে না মরেছি হারপা হারপাউ  
মাঙহান মানলো।' সংগীতায় ঐ বৈদিক কালর সাহিত্যিকর বুদ্ধি  
লৌশিং দেখিয়া মাতিরা -

- বলিহারি দেনা লাগতে য়ারী লেঙ করে কুরা গিরকরে।  
বেদব্যাস অক বা যেগৌ অকা। য়ারীর প্লট এহান হাজাছে  
লৌশিংহান। নিষাদ-গৃহিনী বারো পাঁচগ জীপুতর অন্ন ভিক্ষা,  
রাতিকার আশ্রয় জ্বিং পুড়িয়া মরানি। মানুরে, পঞ্চ-পাণ্ডব বারো  
মালক কুন্তীর জ্বি লাগিয়া পুড়িয়া মরাশি, এহানরে বিশ্বাস্য, অকাট্য  
প্রমাণসহ য্যাকরুয়ানীর হেইনান গভীর বুদ্ধি বারো লৌশিংল  
রসোত্তীর্ণ করেছে। লেখক অতি চিন্তাশীল সুক্ষ্মবুদ্ধি লৌশিংপা  
বারো বিচক্ষণ সাহিত্যিক তথা রহস্য সাহিত্যে পারঙ্গদ বুলিয়া মাতনি  
লাগতে।' অনন্ত লিঙ্গমে মাতের -

- এহানেহে মহাভারত আজিযৌ অমরএয়া থাইল। মহাভারতর  
চরিত্র উতা টেইপাঙ মানু আটতারা, কাঁদতারা, আঁহিতারা পারা।  
অমর এয়া থাইল মহাভারত রচয়িতা শ্রীকৃষ্ণ দ্বৈপায়ন বেদব্যাস।  
লগে অমর এয়া থাইলা কুচক্রী মনর মানু ধৃতরাষ্ট্র, দুর্যোধন, শকুনি।

- কৌশিকে তিরুমল ভেঙ্কটেশ্বামী অনন্ত লিঙ্গমরে আঙকরল-

- Uncle, পঞ্চ-পাণ্ডবর স্বর্গারোহনর য়ারীহান কুংদিন  
ছনতাঙাই।

- 'কার্তিক মাহাং' মাতিয়া ভেঙ্কটেশ্বামী, অনন্ত লিঙ্গম, ভরদ্বাজ,  
কৌশিক, সংগীতারাংতো বিদায় মাগিয়া ধরমশালাং গেলগা।



## কন্ভেন্ট গার্ল

ডঃ মণি সিং

বসন্ত বিহার

ঃ বদাগ না লালৈ। আলথক্ অ। য়াম হাংকাং নাই। আ-কুবালা লৈয় পরতাউ গা। ইহে! মাথতে না হুনিরী। ইমে লাম হেলৈরী! দে তা, জাংহান্ আক্খুরুম্ নিকালেইয়া চা। আজি, হয় তোর আক্তুপ্, নাইয় মোর আক্তুপ্। কংত মুনি ঘোড়াগ মালো পড়েছংগা। মোর গজে ফালদিউরীতা। আইংতে, চাঙহান, হারপাবেল তাউ। ই মে, বদাগ, লালৈয়াহে চা। আক্ছটে হেটক ঐতেই ছাড়া, কথা নেই। ধরেছু এহানলো দ্বি-তুপ্ করে বেলেইম্ তা না কিতা! টুপীচরায় লৌদে লৌদে বেলীটিকহান মুরগং কাকরেছে। আহিগী কড়িগী পারা করেছে। আঁধা কাচা ধলা চুল, সেঠমুরিয়া, শুয়োরর চুল পারা উবা, উবা আছে। তিন দিনকার দাড়ি, নুয়া আলি খেং মেলেছে পারা। 'কুকিস্' পারা বেকা, দীঘল খাসীয়া' দা উহান, হিল আগং পানী দিয়া দিয়া তাক্ করে। তাক্ করে তাক্ করে মৈলকরে গুজুরাং লাগেছে।

ঃ আইংতে টুপী চরা এগ ছলেছে। হএম্মা, ঝড়ক ঝড়ক করে দা আহনৌ আত হানাং ধরেছে। আজি যে সাদেউ আক্তুপ্ করতৈ। মাটিগ পারা, না ছলের মানুগ। যেইংগা, সাজৌবাকারে বাগা দিঙ্গা। কাকা আইলে যেহানৌ আহান করতৈ। তা-ছাড়া নাইতৈ। বুলিয়া খালকরে করে বাতেদে ঘর তিন গ বেলেইয়া সাজৌবা খুড়ার ঘরে লেইমাচাউবী খড়ি খড়ি দাপ্হনলো গেলিগা।

ঃ হা! লেইমা চাউবী! বেলীটিক হানাং কিতা এয়া আইলেতা। ফ - ফ - করুরীতা কিয়াকা। দাপ্দিয়া আইলে থাং। ভিতরে যাগা। ছেয়াগং বৈয়া খানি ঠাণ্ডা অগা। সাজৌবা পণ্ডিত। বুজনে পণ্ডিত বুলতারা। কনাক ললে সাজৌবাকা বুলতারা। বয়স ৬৮-৭০ ঐতৈ। ফোজে 'সুবেদার মেজর' এয়া 'রিটার' করিয়া আছেছেগো। কি-য়া, গাঙড় বুজন, কনাক, ছৌ হাবিয়ে নিংকরতারা, মান্যতা দিতারা। তা কথা আহান মাংলে উচ্চ-বাচ্য না করতারা। মুর নলৈয়া য়াকরতারা। লেইমা চাউবীয়ে ফ-ফ যেইয়া মাংলী -

ঃ খুড়া! আইংতে অন্থক্পা আহান অনাং পড়েছে। ঔনা নেই মানু আগ ছলেছে। দা-আহান দারা-দারা গুজুরাং লাগেছে। জ্বি

গ্ ফরদের। ডরহানে খুড়ারে বাগেইংআ বুলিয়া দাপ্দে দাপ্দে আইলুতা। খুড়ায় চালাক্ক আয়। আইংতে কিহান আহান ঐতৈ। মোরতা মুরগ না করল। মি যিংগা! - বুলিয়া লেইমা চাউবী তেইর ঘরে যানারকা বুলন্ দিলী।

ঃ কুং টুপীচরা? ঔরে আফিম্পা সেল্কমীর জেঠা বেয়ক? দোহার ঙাবার পুতক? সিবেইংত রিটার এয়া এমারী আহেছে উগ? উগতে আজি ৭/৮ বছর ঐলা বিয়া করিয়া ছৌ-ছুমারা আগৌ নায়া আছে গ-না! - হাই, তি যাগা, মি আউরী! বুলিয়া সাজৌবাকা ঘর ভিতরে হমেইল্গা। লেইমা চাউবী পৌহান বাগেইয়া চিত্তর বক্চাহান, সাজৌবা কার উঠানে লামাদিয়া ঘরে গেলিগা।

ব্রজনন্দন গুজুরাং লাগেছে -

ঃ বর বাগরর বি. এ পাশ জেলাগো আহেছে! করবে নাই! তোর মক্তুর থাইলে কর। শালোয়ার কামিজ পিদে বেলেইয়া, অটে রং গছে বেলেইয়া, অ, -হাই! বাই-বাই! সী - ইউ - টুমরো। অ, ইয়েস, থ্যাক্স ইউ। বুলে বেলেইয়া ইংরেজী কতহান তামকরে বেলাছং দেখয়াউরীতা। বর, সেক্রেটারীনিং আহেছে। রাত-মাদান খাল-নেই, থাংচা নংমাইচিং বনধ্ নেই, মিটিং। নিক্কা মিটিং। আজি SHG, কালি NGO, পৌর Aam Way, চৌট্টা গোয়ালা, পঞ্চমে রানাদা। ঘরগতে হলি, হতরং। চা- আক্ছিটা, পানী আক্ছিটা দিবা মানু আগ নেই। কব, - হবা আছে! নাউ থিন্তক্ দেউরী। কিন্তু ঘরবারা চা-ন-না-পা পাহুরলে না-র নাই। নিজর ঘর-দোয়ার ছাঙে কাকরিয়া, মানুর-ঘর-দোয়ার হাজানি, এহান্ নাইতৈ, নাইতৈ। আজিংত নাইতৈ। ই-মে-নিকুলিয়া চা! কিতা অরতা .....

ঃ ব্রজনন্দন! সোজৌবাকার ডাকহান হুনিয়া ব্রজনন্দন খাঙ্তা ঙাকৈল। কথা হানি থুং করে নুইলো। সাজৌবা-কা কুম্বাকা উঠানে আয়া উবা আছে ব্রজনন্দনে না হার পাছে। হারপেইল কথাউ নাগে। মানুগরতা বুদ্ধি-লৌশিং হাবি গুজুরতে গুজুরতে চুলর আগাং কায়া হদাছে। নারগ হুনিয়া মুরগ তুলিয়া দেহিয়াই বেম্তাল্ লাগে পড়িল্গা। ফিঙোয়া তুপিং না-পিং এয়া আক্ফালে মাংকলেংত উঠানে-

ঃ স্যার।' বুলিয়া সুবেদার মেজর সাজৌবা পণ্ডিতর মুণ্ডহানাৎ উবা ঐলগা। হমা দিয়া লাজপেয়া মূর তলেদে দিয়া মাংলো -  
ঃ স্যার, ঘরে বহিক গা। বৈদহান্ জবর সারছে। হে কৈতে।  
ছনৌরীতা! কাকা আহেছে। ঠাণ্ডা পানী, সরবৎ কিতার ব্যবস্থা কর। মি আত হান ছাউয়া আহিঙ। কাকা বহিকগা। বুলিয়া ব্রজনন্দন পথুরীগৎ গেলগা।

দাউ, দাউ, জ্বিগ, অরংক পানী খাং আহান পড়িয়া ফুৎক মুতৈল পারা। রীণা, মানে ব্রজনন্দনর মৈলক, সাজৌবাকারে সোফাহানাৎ বহুয়েইল, নলৈয়া, নস্রতালো, জাঙর ধূলি মূরে লৈয়া হমা দিয়া তাপয়া নুংশি ঠুম, তেইর নারগলো মাতলী -

ঃ আংকল, গুড্ মণি! গারীগতে কিমে! হিন্‌পারখাং!

রীণার ঠুম, কঙালা, ইপুখোং ঠাক থৈয়া নাতিনকর নুংশিপা, 'আংকল' ডাকহান সাজৌবা পণ্ডিতরে আকসাটে বেরেইলীর অফিসার কমাণ্ডিং ব্রিগেডীয়ার জেনারেল রানা নরেন্দ্র প্রতাপ সিংর জিলক 'নিনা'রে নিঙশিঙ করুয়া দিল। বাংলাগোত যানায়, নিনায় গুৎকরিরী! কেথক করিয়া, ওঠগী বেকা করে করে আহিগী জিপা জিপা মাংতৈ -

ঃ আংকল! কাম অনু। আইয়ে না! বৈঠিয়ে না। পিতাজী ঘর পর নহী হেঁ। আঁপকো কহনে কে বোলী - হাঁ। বৈঠিয়ে না - নহীত নেহী বাতাউঙ্গী। বোলিয়ে কিয়া লেঙ্গে আপ। ঠাণ্ডা - ইয়া চায় কফী। উঃ, হু, কুছ নেহী সুননা মুখে। বৈঠিয়ে 'সাজৌবা পণ্ডিত বেরেইলীং 'নিনা'র মুণ্ডে বহেছে পারা পেইল।

ঃ বৈদহান জবর অছে। দিনহান সারছে। ঠাণ্ডা সরবৎ ফুটি পীক্।' বুলিয়া নিনা ঘরে হমেইলীগা। ট্রে আহানাৎ পানী গিলাচ আহান, সরবৎ গিলাচ আহান বারো কালাঘন, রসগোল্লা প্রেইট আহান সোফার কাদার টী টেবিল হানাৎ থৈয়া উবা ঐয়া থাইলী।

ঃ আপ্ কৈসী হাঁয়! আপভী বৈঠিয়ে না! মাতিয়া সাজৌবা পণ্ডিত নিজেই গাক পড়িল গা। 'আংকল' মধুর রবহানে বিভুলা ঐল বারাদে 'রিনারে 'নিনা' নিষ্করিয়া থতাথাতাৎ হিন্দী আহে পড়েছোতা। লাজ পেইল। সোফাহানাৎ খানি লড়িয়া বহিল।

ব্রজনন্দনো আহিল। সাজৌবাকারাৎ খানি দুয়েই ঐয়া আরাক সোফা আহানাৎ বহিল। সাজৌবাকা য় রিনারে বনালো কল্করিয়া কাদার সোফাহানাৎ বহুয়েইয়া মুরগ মাঠিয়া দিয়া দিয়া মাতের -

ঃ আজি মোরতা নুয়া জীকন আহান হমেইল। নুয়া - দৃষ্টি আহান পেইলু। আরাকৌ দ্বি-কুড়ি বছর জিংতা ঐয়া থানা মনাউরী।

তি-মোরে আক্‌কুড়ি পন্দর বছর বয়সে নিয়া বেল্‌লেগা। তোর সাদানে 'নিনা' বুলিয়া আমার O.C. গরতা নিঙলছৌ আগ আছিল। O.C. র বাংলাগত গেলেগাই তেই মোরে ঠিক তোর এসাদে, ঠুমকরে 'আংকল' - বুলিয়া গুৎকরলী। জলপান খোয়েইয়া বিদায় দিলী। মি হারৌ ঐলু। আমার তাউ 'নিনা' জরম ঐলা। ঘরে ঘরে তোর ডেকি 'রীণা' জরম অকা। ভগবানরাং এহানেই মাগুরী।

ব্রজনন্দন, তেরাদে আক্‌খুরুম রীণারে চেইল। রীণা মুরগ তুলিয়া আহিগীল ব্রজনন্দরে নাউ চেইলেউ হারপেইলী, ব্রজনন্দন তেইরে তেরাদে চাছে। রীণা, সোফাহানাৎ উঠিয়া সাজৌবা কার জাঙর ধূলি লৈয়া উবা ঐলী। পানী গ্লাসহান থদিয়া প্রেইট, গ্লাস হাবিতা ট্রেহানাৎ কাকরিয়া ঘরে হমেইলীগা। পানার সেলপাক হানাৎ এলাচি, লং কতগ আনিয়া সাজৌবা পণ্ডিতর মুণ্ডে থদিয়া বহিলী।

ঃ ব্রজনন্দন! 'সাজৌবাকায় বাণা-নুংশিলো ডাকল।

ঃ কি গো কাকা। ব্রজনন্দন শ্রদ্ধা ভক্তিলো হাত জোড় করিয়া উবা ঐল। তারতাতে 'স্যার'। পয়লা চাকুরীত, মাছিম পুরে ড্রীল বাগা দেখেগো।

ঃ দাড়ী কিয়াকা না খুরাছৎতা! পাছরলেতা! 'হর সুবা সুরজ নিকলতা সাফ সুতরা জোয়ান, সুরজ উঠতা, সাম্‌চলতা, চলতা ফেরতা জোয়ান।' তুম জোয়ান হ, খাপ সুরং হ, বাছমে বল হায়, মনমে আশায়ে হায়, পর ত্র্যা বেরাগী বনকে দাড়ী পহনকে কিয়ো বৈঠেহ। সাজৌবা কাকার কথাত লাজ পেইয়া ব্রজনন্দন উঠিয়া দাড়ী খুরানীত যানারকা করলে সাজৌবা কায় খানি ব বুলিয়া বহুয়েইল। বারো মাংল -

ঃ লেইমা চাউবীয়ে মোরে বাগেইলীগা - তি জবর ছৌ অছত। ছৌয়েয়া রীণারে হাইতা-নাগৈতা গুজুরেছৎ।

ঃ অঃ, নো, নো। আংকল, নাথিং রং। নো প্রোবলেম এট্‌ অল। রীণায় লাজ পেইয়া সাজৌবাকারে বাধা দিলী। মাংলী-

ঃ আংকল, তা নাউ ছৌ অছে। নাউ গুজুরেছে। বারো মোরতাউ খানি দোষ আছে। একয়দিন, কামর জেলাছৌ গুগৌ, মালকর নুয়ারা বুলিয়া ঘরে বেলেইয়া গেছেগা। মোরতাউ দোয়াদে আর্জেন্ট কাম খানি থাইয়া প্রায়েই যানাৎ পড়ানিয়ে হি হেড্‌ লটস্‌ অব ইনকনভেনিয়েন্সেস। টু ডে বিং সান্ডে, নেচুরেলী হি ওয়ান্টেড্‌ মি টু বি উইথ্‌ হিম। আজ S.H.G. কা এক বোর্ড মিটিং থা ম্যায় উস্কী চেয়ারমেন। আজ নেহী জাউঙ্গী।

রীণার সহজ, সরল লাল স্বীকার করাণি হেইয়কর



তুলো তিলেয়া হেইয়কর কথা ইলৈয়া চলানির সহাবস্থানে, ঘরগর ব্যরস্থা করিয়া থনার আগ্রহ বারো ইচ্ছা, সহযোগিতা, সাজৌবা পণ্ডিতরে আরাকৌ মুঞ্চ করল। তা কুনো কথা টটরা নুইল। আহেছিল, ব্রজনন্দরে গালেইয়া গুজুরিয়া ঠাণ্ডা বাণ্ডা করাণীং। রীণার কথা-বার্তা, আদব-কায়দা, বুদ্ধি-লৌশিং দেহিয়া তায় পাণ্ড পড়িলগা। মুর্তি-মতী লক্ষ্মী, সরস্বতী, জগত্তারিণী ভবানীর ঘরে তা কারে কিতা বুঝেইতো। মাংল -

ঃ ব্রজনন্দন মোর হবা কেডেট আছিল। লগরতায়, হাদি হাদিৎ ছৌ অর বুললা। মি নাদেহেছু। Army জোয়ান হানতে, তারেউ তোর কামে লগে নিছগা। কাম করলে হারৌ ঐয়া থাইতে। তাউ শিক্ষিত B.A. পাশ, স্মার্ট ছৌগ। তোর কাম....

ঃ আংকল, মি আজিৎ ত উহানেই ঠিক করেছু। 'Made for each other' হাবি কামে হাবি ফামে, দ্বিযোগীয়ে আকতা ঐয়া থাইতাঙাই। রীণায় সাজৌবাকর থতার কথা কারলৈয়া মাংলী -  
ঃ স্বাভাবিক। মুনিগ হানতে তার স্বাভিমনে লাগের। এদিন হাবি সারভেন্ট, মেইড, আছিল হানতে তা মিয়াম নাউ খালকরেছে, হিনৌ না পাছে। এ কয়দিন মেইড নেই হানতে হীন পেইতৈ এহান মোর খেয়াল অনা থকছিল। মোরতাই ভুল হান অছে। আর নাইতৈ। আমি সদায় দ্বিযোগীয়ে থাইতাঙাই। বারো হেইয়ক নায়া মৈলক অক্খুলী অক্খুলী আটলে পাতালা অপরিয়ারগা, এহান আজি কতদিন এল হারপাউরী। রীণা লাজে ডরে মাটিয়েদে চেইয়া মাংলী।

রীণার কথাত ব্রজনন্দনৌ পাঙেয়া চার। কাম হানতে করে বেলেইয়া এবাকা লাজ পার। এমাটিক বুঝ থায়া চলিরা টটরেইরা জেলা এগরে, কিস্তাউ নেই কথা আহানলো কতি গুজুরলুতা। লাজ পেইয়া, সাজৌবাকর জাঙড় ধুলি-লৈয়া মাংল -

- ঘরে মিয়াম কামৌ নেই। দ্বিযোগীয়ে হাবিতা করতাঙাই।

সাজৌবা পণ্ডিত খানি আহিয়া মাংল -

ঃ Made for each other. আমার হাবির ঘর এসাদে 'Made for each other' ঐলৈ আমারতা কিতার হীন।

ঃ Uncle! আমি বহু আগ বারলাং। হুদা নেইল পালিশ, লিপস্টিক, আই সেপিং, আইক্র প্লাকিং, সেডিং, ফেইস, টোনিং, মেহেন্দি রচি হাতমে নাগৈ, ইংলিশ মিডিয়াম স্কুলে, আইন-আদালত কম্পুটার, পুলিশ, নেভী, এ্যাড মিনিষ্ট্রেশন, হাবিতাত হমানি অকরলাং। হাবিত্ত আগ বাড়েছিহান - এম.এ পাশ নিঙল ঐলেউ, বি.এ., বি.এচ.চি, পাশ বর লইতে মনে হীন নাউ পেইতারা। শিক্ষিত নিঙলপী চাকুরী না করতারা বরর তুলো বিয়াত আপত্তি না করতারা। কনভেন্টে, কলেজে, ইউনিভারসিটিং পাকড়লা নিঙলপীয়ে ঘরর কাম কাজে মজজুদ অছি। রীণায় কনভেন্ট যুগর নিঙলপীর বাখান করিরা।

সুবেদার মেজর, সাজৌবাকা - সাজৌবা পণ্ডিত সোফাহানাৎত উঠিয়া রীণারে, ব্রজনন্দনরে, দ্বিযোগীয়ে কল্করিয়া মাতের -

ঃ তোমার মন, তোমার বুদ্ধি-লৌশিঙ হাবি ঘরে ঘরে হাবি জেলেই মুনিরাঙ সিলক, বর্ভক। মন চাংখল অকা কামে লাজ না পাকা, আগোরে আগোয় আহানি নেই ররং আগর হবা আগয় হিককা, হবানেইতা বেলাকা, আগোরে আগোয় পাংকরকা, ঘরে হেইমাক তিলেয়া-তাঙেয়া, কৌলী-খান্না নাইয়া তোমার সাদানে Made for each other ঐয়া থাকা - বুলিয়া আশীর্বাদ দিয়া বেলেইয়া গেলগা।

লেইমা চাউবীয়ে, সাজৌবাকারে, ব্রজনন্দনে উঠানে হমা দিয়া জাঙড় ধুলি লৈতে দেহিয়া ডর বাগিয়া লেইরাঙ পূজাং হমাছেগা।

ঃ হাটনে, যিক্কা তোমার মিটিঙে। এবাকাতে কামৌ হাবি লমৈল। ব্রজনন্দনে, রীণারে আতহানাং ধরিয়া নিজে বদাগ লালৈয়া মাঙকলে নিকুলিয়া আছল দিল।

ঃ না, বাবা, না। আর বদাগ না লালৈতো। - রীণায় আহিয়া নাকরিরা।

ঃ অইত্বে - বুলিয়া ব্রজনন্দনে রীণারে বুকগোং হাপদিয়া থৈল।



## ধ্ৰুৱ-জ্যোতি

শ্ৰীশংকৰ সিংহ

আজি সুধাময়ৰ সম্বৰ্ধনা। হোটেল গ্ৰেট্‌ ষ্টপাৰ্ণ নিয়ন লাইট, টুনি ল্যাম্প, ফিলামেণ্ট বাল্ব, ৰোভাৰ ৰোমিং লাইট আদিলো বৰক বৰক কৰে হাজাৰি। চাৰিওবাৰা বিজুৰীলো ঝলমল কৰেছে। ইণ্ডিয়ান এসোসিয়েশন অৰ্‌ হিন্দুইজম, কনসাসনেস্‌ এ পাতেছি সভাহান। কনফাৰেনস্‌ হলগ কলিকাতাৰ গণ্যমান্য মানুহে গিজ্‌ গিজ্‌ কৰতারা। আই. এ.এইচ.সি.ৰ ইউৰোপ, আমেৰিকা, জাপানৰ বিশিষ্ট বিশিষ্ট কৰ্ম কৰ্ত্তাউ আহেছি। সুধাময়ৰ জিপুত দ্বিয়োগী ধ্ৰুৱ বাৰো জ্যোতিয়ো আহেছি। বহুকলকেই, অপৰ্ণা, সুপাৰ্ণাউ আহেছি। লগে ধ্ৰুৱৰ পুতক ধীমান, জ্যোতিৰ জিলক জীয়াৰীয়ো আহেছে। জিলক কান্তি হেইয়ক সুমনৰ তুলো খানি-দুৰেইত বহেছে।

বিশাল ডাইনিং হলগৎ খানা-পিনা চলেছে। চামচ-কাটা, ছৰি, পৰসেলিন প্লেটে টকটাক্‌ শব্দ তাল-সম-লয়-নেই বাজনা বাজিয়া চলেছে। ক্যাসেটে বিস্মিল্লা খনৰ সানাই, এয়াৰ ইণ্ডিয়াৰ ফ্লাইট হান নিংশিঙ কৰাৰ। অতিথি-অভ্যাগত হাবি নীৰব নিশ্চল।

আই.এ.এইচ.সি.ৰ কলিকতাৰ সেক্ৰেটাৰী জয়দীপ মুখাৰ্জীয়ে মাইকগৎ মাতের -

- ইওৰ এটেনশন, প্লিজ! আজি আমি 'শিকাগো-বিবেক-বেদান্ত' প্ৰোজেক্টৰ চিফ্‌ একজিকিউটিভ, নৰ্থ-বেঙ্গলৰ 'হৈমবতী কমপ্লেক্স' ওৰ মালিক মাল্টি-মিলিওনেয়াৰ শ্ৰীসুধাময় সিংহ চৌধুৰীয়ে আমাৰ ইণ্ডিয়ান এসোসিয়েশন অব হিন্দুইজম্‌ কনসাসনেস্‌এ 'শিকাগো বিবেক-বেদান্ত' কমপ্লেক্সৰ সফল ৰূপায়ণৰ কা সম্বৰ্ধনা জানেইয়াৰ।

সুধাময় সিংহ দক্ষিণ আসামৰ গাঙ আহানাৎ জৰম অছিল। মেট্ৰিক পাশ কৰিয়া আসাম পুলিছে কনষ্টেবলৰ চাকুৰী হানাৎ হমাছিল। নিজৰ কৰ্ম কুশলতায় চাকুৰীৰ ধাপে ধাপে প্ৰমোশন পেইয়া ডেপুটী সুপাৰ অব পুলিছে পদোন্নতি পেইয়া ৱিটাৱাৰ্ড অছে। চাকুৰী জীবনে গৌহাটীৎ ঘৰ-দোয়াৰ হংকৰিয়া ছো-জিপুত পালিয়া-পুথিয়া আছিল। চাকুৰীৎত অবসৰ পানায় পিছে জেঠা পুতেকৰে বি.এচ.সি পাশ কৰুয়েইয়া আসাম ফৰেষ্টে, ফৰেষ্ট ৱেঞ্জাৰৰ চাকুৰীত বৰা দেছিল। দ্বিতীয় পুতক

জ্যোতিৰেউ বি.ই. পাশ কৰুয়েইয়া, নেপ্‌কোত এসিষ্টেণ্ট ইঞ্জিনীয়াৰ হংকৰেছিল। আকখুলী জিলক, কান্তিৰে গৌহাটী বিশ্ববিদ্যালয়েৎত এম.এ. পাশ কৰুয়েইয়া এম.বি.বি.এচ ডাক্তৰ আগৰ তুলো বিয়া দেছিল। জিপুত দ্বিয়োগীৰেউ তানুৰ বানা-নুংশিৰ পাৰ্ভী অপৰ্ণা, সুপৰ্ণাৰ তুলো বিয়া দেছিল।

ধ্ৰুৱ, জ্যোতি, অপৰ্ণা, সুপৰ্ণা, কান্তি, অতিথিৰ হাদিং পয়লাকাৰ পাৰেঙ দুহানৰ পিঠিত তিন নম্বৰ পাৰেঙে বহেছিল। জয়দীপে নাঙহানি মাংতে আকখুকুম উবাঐয়া ডায়াসে বহেছি বাপক সুধাময় বাৰো মালক হৈমবতীৰে আত দ্বিয়োহানি জোড় কৰিয়া হমা জানেইয়া বাৰো বৈলা। তনু বৈলে জয়দীপে বাৰো মাতের -

- সুধাময় অতি সৎ পুলিছ অফিসাৰ আগ আছিল।

উহানে, পেইল বেতন হানিলো ঘৰ-সংসাৰ চালেইতে হীন পেইল। চাকুৰীত থাইতে কান্তিৰ বিয়া দেছিল। প্ৰভিডেণ্ট ফাণ্ডৰ ৰূপা তুলেছিল। ৱিয়াটাৰ্ড অনাৰ দ্বি-বছৰ পিছে ধ্ৰুৱ বি.এস.সি. পাশ কৰেছিল। আক বছৰ চাকুৰী বিছাড়েইয়া ঘৰে বৈয়া আছিল। জ্যোতি ইঞ্জিনীয়াৰিং পাকৰিয়া আছিল। এ সময়হানি সুধাময় অতিহীন পেইয়া চলেছিল। কোনপধ্যে নুন-ভাতৰ যোগাড কৰে পাৰেছিল। পিছে ধ্ৰুৱ ফৰেষ্ট ৱেঞ্জাৰ ঐলে খানি নুঙেই অছিল। কিন্তু অপৰ্ণাৰে বিয়া কৰিয়া ধ্ৰুৱ বাপক-মালক-বেয়কৰে বেলেইয়া গিয়া আলাদা কৰে গৌহাটীৎ উদয়াচলে মানিকচান্‌ৰ ঘৰে আছিলগা উপেই জবৰ হীন পাছিল। তেবৌ না বাগেছিল। পেনসনৰ পয়সা, ইনভেষ্টমেণ্টৰ খানি আয়, ঘৰৰ ধান-চৌলৰ খানি ৰূপালো জ্যোতিৰ ইঞ্জিনীয়াৰিং তামকৰানিৰ পয়সা দেনা হিন পেইল উপেয়, 'আসাম ৰোড, ওয়েজে, সিকিউৰিটি অফিসাৰৰ প্ৰাইভেট কাম আহান লছিল। তিন বছৰ পিছে জ্যোতি বি.ই. পাশ কৰিয়া নেপ্‌কোত চাকুৰীহান পানায় দ্বি-বছৰ আহান খানি নিংশা বেলাছিল। কিন্তু জ্যোতি যেবাৰা অপৰ্ণাৰ বনক সুপৰ্ণাৰে বিয়া কৰিয়া উমরাংগুত গেলগা উপেইৎ বাৰো হীন পাছিল।

ধ্ৰুৱ বৰো জ্যোতি জয়দীপৰ কথা এতা হুনিয়া লাজপেইলা পাউৰী উঠানিৰকা কৈলা। কিন্তু অপৰ্ণা বাৰো

সুপর্ণা উঠে নুইলা হানতে বৈয়া থানাৎ বাধ্য ঐলা ধীমান বারো জীয়ায় ববাক-বপাকরাং যানারকা মিয়াম পীড়া পীড়ি অকরলা। ধ্রুব বারো জ্যোতি তানুরে তেমজানিং লাগেছি। জয়দীপে মতিয়া যারগা -

- অবশ্যে ছোয়ে বাপক-মালকরে নাচাছিতা নাগৈ। হাদি হাদিৎ তানু মারুতি গাড়ী আকেই হান্‌লো আইলা। ধ্রুব বাপকরে, বারো জ্যোতিয়ে মালকরে নিয়া তানুর ঘরে থানারকা মাংলা। ঘরদোয়ার, দ্বিয়োগী জিপুতেই হবাক হংকরেছি। আধুনিক ত্র্যামেনিটিজ লাগাছি। সুধাময়ে, হৈমবতী হিনপেইয়ী দেহিয়া জ্যোতির তুলো যানারকা মাতেছিল। হৈমবতীয়ে, সুধাময়ে হিনপার দেহিয়া ধ্রুবর তুলো গিয়া থানার কা মাতেছিল। পরন্তু বুড়াকালে হেইমাকহান আগোয় আগোরে ছাড়ানি না মনেইলা পাউরী, না গেলেগা। বুড়াকালে হেইমাকর প্রেমহান যৌবন কালেৎত খানি মিয়াম গাড়র পাউরী।

কথাহানি মতিয়া জয়দীপে সুধাময় বারো হৈমবতীরে চেইয়া মুক্সি, মুক্সি দেব। সুধাময়ে হৈমবতীরে বাংগুরীবারার আতহান্‌লো লেম্পালে আক্‌খুরুম ছঁকেল। লেম্পালে বেলাছিল আচালাহানর পট আগলো আঁহির তল পুছলো। আঁহির পানী আহে থাইব। হৈমবতী নাতিয়ক দ্বিয়োগীয়ে জিঙ ধরিয়া চেইয়া থাইলী। আঁহির পানীয়ে আহিপট ভাহিয়া, আহিকুল পাহিয়া ফোটা ফোটা পড়ে, তেইরখিয়াল নেই। জয়দীপে আঙুলীগিলো আঁহির পট পুছিয়া বারো মাতানি অকরল -

সুধাময় উবাকা তিনকুড়ি হাত বছরে পড়েছে। খানিযৌ হিনপার। তাঁর মারুপ আগরাং কন্যাচলর ঘরগ গীরোদিল। ইনভেস্টমেন্টর রূপা তুল্‌লো। আসাম রোড ওয়েজ, কোম্পানী এড়াইয়া হৈমবতীয়েল সুধাময় শিলিগুড়িত আহিল। রূপা হাত লাখলো অশোক ল্যালেণ্ড বাস আহান লৈল। সেভক বোডে ঘর আগ ভাড়া লৈয়া বাসহান চালানি অকরলো। বাসহান শিলিগুড়ি-ক্যালকাটা, শিলিগুড়ি-দার্জিলিং, শিলিগুড়ি-পাটনা আনাযানা করের। পিছেকার বছরে আরাক বাস আহান লৈলো। দেখতে দেখতে ৪/৫ বছরে 'হৈমবতী ট্রেন্সপোর্ট কোম্পানী' বারহান বাসলো উবা ঐল। সেভক রোডে ৫ বিঘা মাটি লৈয়া 'হৈমবতী কমপ্লেক্স' উবা ঐল। 'হৈমবতী কমপ্লেক্স'এ যাত্রীখানার 'রাধা-কুঞ্জ' হইঙল। যাত্রীর খানা-পিনার 'শ্রীকৃষ্ণ-ভোজনালয়' বহিল। লগে 'হৈমবতী পেট্রোল' 'হৈমবতী সারভিসিং সেন্টার' বহিল। সুধাময় 'রাধা-কৃষ্ণ'র মন্দির হংকরিয়া

নাঙহান দিল 'সুধা-কুঞ্জ'। চকিষ ঘটনা কৃষ্ণ সুধামত বিলার। অহরহ, অতিথি, বামন, ভক্ত, অনাথ সেবাত মন-প্রাণ-ঢালে দিলো। দোঁর লেইফাম, মন্দির-মসজিদ, গীর্জা, ইস্কুল, হাসপাতাল, অনাথ আশ্রম এতাৎ যথাসম্ভব দান-ধর্ম করের। 'হৈমবতী কমপ্লেক্স' র নাঙ ভারতবর্ষ ছাড়িয়া গেল্‌গা। সুধাময়-হৈমবতীর গুণগাথা, স্নেহমমতা, আতিথি বাৎসল্যর কথা ভক্ত মণ্ডলীর থাতয় থাতয় ইউরোপ-আমেরিকাত ছুড়েইয়া পড়িল। আমার শিকাগো-বিবেক-বেদান্ত এসোসিয়েশন, শিকাগোৎ 'বিবেক-বেদান্ত কমপ্লেক্স' প্রোজেক্ট হংকরে দিয়া প্রোজেক্টহান রূপায়িত করা নিরকা তাঁরে মাংলাৎ। তাঁর যাকরিয়া শিকাগোৎ আমার 'বিবেক-বেদান্ত-কমপ্লেক্স'গ হংকরেদিলো মাত্র আহৌ মিলিয়ন ডলার পারিতোষিকলো। ও দেব-প্রতিম গিরক শ্রীসুধাময়ের বারো তাঁর সহ-ধর্মিনী হৈমবতী গিথানকরে আমি সম্বর্ধনা দিয়ার - তানুর আয়ুষ্কাল আরাকৌ ঠৈয়ক, স্বাস্থ্য হোবা অক্‌, ধর্মে আরাকৌ মতি অক, 'হৈমবতী কমপ্লেক্স' হৈমবতী ট্রেন্সপোর্ট আরাকৌ চাংখল অক। এবাকা মি শ্রীসুধাময় সিংহ চৌধুরীয়ে হেইচা করুরী - তাঁর জীবনর মূল্যবান যারী জীবনে প্রতিষ্ঠিত অনার মূল্যবান শিক্ষা, জনগণর আত্মোন্নতিরকা মহামূল্যবান উপদেশামৃত আমারে দেক।' জয়দীপ সুধাময়রে মাইকগৎ উবা করে দিয়া কাদাৎ উবাঐয়া থাইল।

সুধাময় মাইকগ ধরিয়া আক্‌তাউ না টটরেইয়া খানি আহান উবাঐয়া থাইল। কন্ফারেন্স হলগর অতিথি অভ্যাগত হাবিরে চেইল। দ্বি-আত জোড় করিয়া হাবিরে হমাদিল। হৈমবতীয়ে আঁহির পট পুছলী।

ধ্রুব বারো জ্যোতি বাপকরে চেইয়া থাইলা। কিহান মাতের ক্লানিরকা কান হিঙরেইয়া থাইলা। জ্যোতিয়ে মাতের -

- দাদা! আহৌ মিলিয়ন ডলার এতা কতি রূপা। প্রায় পাঁচহৌ কোটি ঐতৈ না। বাবায় এতাহাবি রূপা কিতা করতৈ তা। হাবিতা দান করিয়া যিতৈগা পাউরী।

- কিতা মাংতু। 'হৈমবতী কমপ্লেক্স', 'হৈমবতী ট্রেন্সপোর্ট কোম্পানী'য়ৌ কম করে হাজার কোটি রূপা ঐতৈ। আমারে নাদলেউ নাতি নাতলগীরে দিলে দিতে পারে। ইমায় নাতি নাতল গীরে জিঙ ধরে চেইয়া আছে।' ধ্রুব মাত্‌লো। মতিয়া চুপ থাইল।

- তোরে কত বার মাংলু ইমা বাবারে লগে নিয়া থৈক্‌গা। তি হুদা বাবারে নেনা মনেইলে। এবাকা উতা খাল্‌করিয়া কিহান



কনা। বাবা-ইমার জাঙে ধরিয়া ক্ষমা বিছারেইক্গা। বাপক-মালক ছৌ-ছুমারার দোষ না ধরতারা। তানু আমারে যেসাদেউ ক্ষমা করে দিতাই।' অপর্ণায় ধ্রুবরে বুঝেইরী।

- আমি আরাক আক বছর দিবছর বাবা-ইমার তুলো থাইলে হবা অছিল। অন্ততঃ কন্যাচলর ঘরগ বাবায় গীরো নাদলৈছ। ঘরেনা থাইলেউ হাদি হাদিৎ বাবা-ইমার তুলো দেহা সাক্ষাৎ করলে হবা ঐলৈছ। অন্ততঃ এতাহবি রূপা-পয়সা-সম্পত্তির বাট আহানতে পেইলাংঐছ। এবাকা জিয়াবীরে ইমার উড়কে থাদিক। ইমা নাই অরেতে। নাতিনকরে কুবাং বেলা পারতৈ তা।' সুপর্ণায় জ্যোতিরে বুঝেইরী।

- ধ্যেৎ। চুপমারিয়া ব। এবাকা ইমা-বাবার বানা-নুংশি না দেখেই। ইমা-বাবার তুলো থানা নুয়ারতেই বুলিয়া কতি পীড়লেতা। তুমি দ্বিয়ো বেইবুনীয়ে হীন পেই তারাই বুলিয়া আমারে বাবা ইমার তুলো থানা নাদ্লায়তানা। জ্যোতিয়ে সুপর্ণারে ধমক আহান দিলো।

সুধাময় মাইকগৎ টটরাগি অকরল -

- বাপক-মালক যশমান, ধনবান, কীর্তিমান ঐয়া থানা লাগের। আমরগ আত্মনির্ভরশীল ঐয়া থানা লাগের। অন্ন-বস্ত্ররকা ছৌ-ছুমারার গলগ্রহ অনা না লাগের। বুড়াকালে ছৌয়ে খোয়েইতাই, ছৌয়ে চেইতাই, বুলিয়া ছৌ-ছুমারার গজে ভরশা করানি থক্ নেই। পরিবারে নির্ভরশীল ঐলে, কি বাপক, কি মালক, কি বেয়াপা-বেইবুনি আগয় আগরে নাউ চেইতারা। উসাদে জীবনর কোন মর্যাদা নেই। বাপক-মালকে জিয়া-জিপুত জরম দিয়া পালিয়া-পুষিয়া ডাঙড় করতারা উসাদে লম্বেলগা দিন পেইয়া দিয়া থৈয়া যানা পারলে শৌ-ছুমারার বাপক-মালকর আদর যত্ন থার। জীব-জন্তু পশু-পক্ষীয়ে তানুর ছৌ-ছুমারা ফর হিকিয়া কুংগ কুরাং গেলাগা নাউ হারপেইতারা। ছৌ-ছুমারা উতারোঁ, তানুর, মালক-বাপক কুংগ কুরাং থাইলা, খেইলানে, মইলানে নাউ হারপেইতারা। মানু যদি এসাদে ঐতারা উতা ঐলে পশু পক্ষী, জীব জন্তুর তুলো ভেদাভেদ কিতা থাইতৈ।' খানি আহান জিরণ-লৈয়া পানী গিলাচ আহান পিয়া, আচালার কাদা আগৎ থতাহান পুছিয়া বারো মাতের -

- জিপুতর প্রতি পিতৃ-মাতৃর কর্তব্যতে আমি পালন করেছি। জরম ঐয়া বহে নুয়ারলা, আটে নুয়ারলা দিনে, ককে, উড়ে করিয়া থৈলাং। লেইরিক লেইছৌ তাম করুয়েইয়া ডাঙর দীঘল করলাং মানু হংকরলাং, সংসারে প্রতিষ্ঠা করলাং। কিন্তু এহান কি বিধান, উপযুক্ত ছৌয়ে আটে নুয়ারতারা, লরে নুয়ারতারা

বুড়া বাপক মালকরে তানুর পাংকাল্পা আত আহানৌ আগ বাড়েইয়া আটোয়া নুয়ারলাতা। আমিতে ছৌ তিনগ-চারিগ ঐলেউ খোয়েইলাং পিউয়েইলাং, ভরন-পোষণ করলাং কিন্তু ছৌয়ে বুড়া-বাপক-মালক দুগরে দ্বি-মুঠি ভাত দিয়া নুয়ারতারা।' আচালার পট আগলো আহির পটগী পুছিয়া বারো মাতের -

- আমিতে ছৌ বিয়া দিয়া, হেইমাক হানরে জোড়া দেহিয়া আজীবন হারৌ থাইলাং। বুড়া ঐয়া না মরেছি পেইয়াউ বৌয়েই-জিপুত, নাতি নাতললো আকপেই থানা মনেইলাং। এহান কি নীতিহান, আমার ছৌয়ে আমারে বাটিয়া থনা মনেইতারা। বুড়াকালে হেইমাক খেইকরাগি মনেইতারা। ছৌতে হেইমাক ঐয়া থানা, বাপক-মালকতে খেই খেই থানা, কিসাদে খালকরে পারতারা।' সুধাময় আহিগী সেঙকরিয়া হৈমবতীরে চেইয়া মাতের -

- জোয়ান কালে চলা-বৈঠা-খানা-গিনারকা সাহায্যর মিয়াম দরকার নেই। বুড়াকালে আটানি-বহানি-খানা-পিনা হাবিতাতে অর্হিনশে আগ না আগর সহায় লাগের। ছৌ ছুমারা নিজর কামে ব্যস্ত থাইতারা। বৌয়েই তানুর ছৌ-ছুমারা, হেইর কামে ব্যস্ত থাইতারা। বুড়াবুড়ি আগয় আগয় সহায় ঐয়া চলতারা। অতীতর বানা-নুংশির য্যারীপরীদিয়া, ছৌ-ছুমারা, আত্মীয়-কুটুম-কাষার য্যারী নিংশিঙ ঐয়া ঐয়া আগয় আগরে অনুয়েইয়া সময় কাটেইতারা। এ বয়সে কিসাদে ঠেগয় পারিয়া বুড়াবুড়ির হেইমাক খেইকরতারা। তাঁনুর কথা, তাঁনুর স্মৃতি, এতার, কোন মূল্য জিপুতরাং না থাইলেউ আমি বুড়াবুড়িরাং আছে। উতায় আমার সময় কাটেব, আমার হীন ককর। সুধাময়র হক্গ আহিল পারা। খানি জিরেইল। জিরেইয়া মাতের -

- যে উপযুক্ত ছৌয়ে বুড়া বাপক, বুড়ি মালক পালানি না করিয়া ঘর দোয়ার বেলেইয়া যিতারাগা তানুরে পিতৃ-সম্পত্তি দেনা থক্নেই। সহায়-সম্বল নেই, হীন পেইতারা বুড়াবুড়ি, অনাথ, আতুর-পিতুর এতার ভরণ-পোষণ বারো থানারকা সম্পত্তি এতা দান করে দেনা লাগের। মি এহানেই মাতানি মনাউরীয়ে সংসার এহানাং, নুঙেই ঐয়া, শান্তি পেইয়া, আত্মমর্যাদা বারো স্বাভিমানলো লম্বেলগা দিন হানি পেইয়া কাটানি মনেইলে, হাবি বাপক-মালকৌ নিজর নিজর ভরণ-পোষণ, অন্ন-বস্ত্র-চিকিৎসা, সামাজিকতার ব্যয়ভার নিজে নিজে লনার যোগ্যতা থনা লাগতৈ। পরাম্ভ ভোজনর ডেকি লাজ, মানসিক নির্যাতন আর নেই। তারো বুড়াবুড়ি ধনবান, যশবান, কীর্তিমান থানা লাগের। সেবার মনোভাবলো বুড়াবুড়ি, বাপক-মালকরে ছৌ-জিপুতে

পাল্লে অমর্যাদা নার। বরঞ্চ বাপক মালকে স্বর্গসুখ পেইতারা।

সুধাময় কথা এতা মাতিয়া হৈমবতীৰেলো উঠিয়া ডায়াসগোত লামিয়া যানা অকব্ৰল। ছৌর কাদাফৌ ঐলে, বৌয়েইয়ে জিপুতে জাঙে পড়িয়া ক্ষমা ভিক্ষা বিছাড়া। ধুব-জ্যোতিয়ে বাপকরে তানুর তুলো থানার কা হেইচা করলা। সুধাময়ে না করল। মাতলো -

- তোমার মালকরে মাতিয়া চেই।

ধুব-জ্যোতি, অপর্ণা, সুপর্ণা হৈমবতীর জাঙে পড়িয়া তানুরে ক্ষমা করেদিয়া তানুর তুলো থানারকা মাংলা। হৈমবতীয়ে মাতলো -

- মালকগ হিসাবে তোমার প্রতি মোর কর্তব্য আহান আছে। বারো মৈলকগ হিসাবে স্বামীর প্রতি আরাক কর্তব্য আহানো মোরতা আছে। যেবাকা মাতৃ-কৰ্ম্ম বারো পত্নী-কৰ্ম্ম অকনা-অকনি অর উবাকা পত্নীকৰ্ম্মই গজর থাক্হান পার। তারো মি তোমার বাপকর তুলো থাইতৌ।

- হৈমবতী কমপ্লেক্স'এ তুমি, বুড়া-বুড়ি ঐয়া তোমার ছৌয়ে না চেইলে তুমি থাইযোগা। সুধাময়ে এহানি মাতিয়া, হৈমবতীৰেলো নিকুলিয়া গেল্গা।

(য্যারী এহান ইকরতে হিন্দী বারো বাংলা সিনেমা দুহানর প্রেরণা আছিল।)



IT IS BETTER TO WERE OUT  
THAN TO RUSH OUT.

ভক্তিই মুক্তি। সমর্পণই জয়। সদালাপ-সদাচিত্ত আনন্দময়।  
শিষ্টবচন, শ্রিয়বচন, হিতবচন, সৌম্য-মৌন-প্রসন্ন ভাব সদাসুখময়।।

বিদ্যা মিত্র প্রবাসেচ, গৃহে মিত্র গৃহিণী।  
অমুখে ঔষধি মিত্র, সর্বোষাক জনাৰ্জন।।

## অনীত

শ্রীবিভূতি সিংহ

- কানা দৌ এগয় মোরে নাউ নেরগা। তাঁরাং কি হান অপরাধ করেছুতা? জনম এহান তাঁর সেবা পূজা করতে করতে এবাকা কুরু সুমৈলু। এবাকাউ মনারতা মি সেবা করানি। লড়ে চড়ে নুয়ারলু, আহিগীলৌ হবায় না দেখরী, কিসাদেতে তোর পূজা করতু? আক্গ পেইলু ছৌগৌ দিল্লীং গিয়া আর নাহের। কোরাঙকার হিন্দুস্থানী জেলা আগ থৈয়া আছগা বুল্তারা। হৌ যে মেলেটারীং গেল্গা এগ্ আর আলৈয়া নাহিল।

সেনারেদ্বীয়ে চুহির তলে জাঙহানি দিয়া দারিগৎ বৈয়া সেকাহানাৎ বিলাপ করাতে লাগেছে।

ঃ বুড়ীমা! মি দুপ-থংমেই দিয়া দিতৌ নয়! কিয়াকা হীন পাউরীতা। ত্রি সেকা হানাং আহির পানী না বেলেই। ছৌ-ছুমারার অমঙ্গল অর বুলতারা। অনীতা কাঁদার পাপলুর ঘরর খুলি বহকগ। তনুর ঘরর দুপ-থংমেই দিয়া হদেইয়া সেনারেদ্বীর ঘরর দুপ-থংমেই দিয়া দেনাং আছেছেতা। নিক্কা নিক্কা সেকাকার দুপ-থংমেই তেইয়ে দিয়া দিরা।

পাপালুর পুতক সুদর্শন বি. এস. সি. পাশ করিয়া এম. এস. সি.ত ভর্তি অনা নুয়ারেছিল। অঙ্কত অনার্সে মার্কস কম পাছিল। তা এম.সি.এ. বারো এম.বি.এ. পাকরিয়া দিল্লীত বিদেশী কোম্পানী আগৎ চাকুরী করে। পয়লা বছর হাত লিশিং বেতন পাছিল। এবাকা আক্কাড়ি দ্বি লিশিং পার। গেলতি বছর বিয়া করেছে। অনীতা এম.এ. পাশ করিয়া গাঙর ইংলিশ মিডিয়াম ইস্কুল আগত মাষ্টারী করিরা। সুদর্শন দিল্লীত ঘর-দোয়ার যুগৎ করে নুয়ারিয়া তেইরে ঘরে থৈয়া আক্খুলাগ দিল্লীত আছগা। দিল্লীত খরচ মিয়াম হান্তে না কুলার। পিছেদে বেতন খানি ঠৈয়েলে তেইরে নীতৈগা বুলেছে।

- ইমারো ! মিনিট আহান ব। মি দৌ হমা দিয়া বেলেইং।' বুলিয়া অনীতারে বহুয়েইলী। দৌ-হমাদিয়া সেনারেদ্বী ঘরে হমেইলিগা। বারনর নামফগৎত মজা চাম্পা কলা চারিগ আহান আনিয়া অনীতারে দিয়া মাতলী-

- কলা এগী খা। গেল্গা হাণ্ডাং তম্বকসেনারেলো কলা জাকহান কোন মতে কাপুয়াছিলুতা। এরে কান্দা এহান তোর হৌরক হৌরিয়কর কা ঘরে নিয়া দিছগা।

- বুড়ীমা ! তি হে খা। কিয়াকা আপ্রানে হীন পাউরিতা। আমারতাতে আছে নাই। মাতিয়া অনীতা কলা আগ থৈলী।

- সুদর্শন তে ঘরে আহের তা। আমার এগতে ঘর নিংসিঙ নার। কিসাদেউ আইত। মৈলক হিন্দুস্থানীগয় আহানি দিলেহে নাই। সেনারেদ্বীয়ে দুঃখ করিরা।

- বুড়ীমা! হীন নাপেই। আজি কালি অতি কঠিন যুগ আহান পড়েছে। ছৌ-ছুমারা এতারে বিয়ান হাত বাজিৎ ইস্কুলে ফৌকরাপি লাগের। মাদানে তিন চারি বাজিৎ বারো আনানী লাগের। ঘরর পড়া এমাটিক মিয়াম অর, ছৌরেলো সেকাহান লেরিক বাগা দিয়া বহানি লাগের। ছৌ এতা পরীক্ষাৎ হবা নম্বর না পেইলে হবা ইস্কুলে ভর্তি অনা নুয়ারতারা। উতারগজে ইস্কুলর ভর্তি ফিস্ মাসিক বেতন, আনা যানার গাড়ীর খরচ, লেইরিক লেইছৌর খরচ, পোষাক-আশাক, টিফিন, কিতা-কাতা যোগাড় করিয়া চালানি অতি কঠিন অপড়েছগা। কামর মানুষো পানা হীন। পেইলে ধন-মাহী মাগতারা। উতাউ কাম হবা করে না করতারা। জেলাগয়-মুনিগয় আত না লাগেইলে ঘর চালানি হীন। গাড়ী আহান নাইলেউ, স্কুটার আহান ছাড়া পথ আটানি চিল। সিটিবাসে ভীড়, বাসৌ কম। সিটিবাস বাছেইলে, ইস্কুল, অফিস যানা ডিলব। অটো রিক্সাত পয়সা য্যাম। মোহনদাতে পেনসন্ পাছে হানতে পয়সা কম পার। অন্য অন্য কাম করানি লাগের। - অনীতায় সেনারেদ্বীয়ে আজি কালিকার দিনকালর অবস্থাহান বুজেইরা।

- ঐলেউ বছরে দ্বি-বছরে আকেই খুরুম ঘরে আইলে হবা। আমরাউ দেখলো গাঙ-ঘরর মানুর তুলৌ তিল-পারল। সেনারেদ্বীর অন্তরগ অনীতার কথাং সায় দেনা হীন পার।

- এবাকা ছৌ এতা ছুপকরেউ সময় না পেইতারা। ইস্কুল কলেজর পড়ার চাপহান জবর। হাণ্ডায় হাণ্ডায় পরীক্ষা, মাসে মাসে টেষ্ট। বছরে বছরে নুয়াকরে ভর্তি অনা লাগের। বিষয়হান লেহে মাষ্টর থৈয়া রাতি-মাদান, দিনে দশ-বার ঘণ্টা করে না পাকরলে নুয়ারতারা। উতার গজে কম্পুউটার, ড্রইং, এলা-নাছ, এম্বডায়েরী, স্পোর্টস্ মাসে মাসে আউটিং। বিচিত্র শিক্ষার জগৎ। আগেকার ডেকি নাগৈ। মানু-কমছিল। শিক্না কমছিল। চানা-পানা কমছিল। ইস্কুলে ভর্তি এতে ডনেশন নেয়ছিল।



ধরাধরি নেয়ছিল। চাকুরী পেইতে ধন-দেনা না লাগেছিল। এবাকতে কোন আহান তামকরতে, পরীক্ষা দিতে, কোটিং ক্লাশ করতে, দালাল ধরানি লাগিল। ট্রেনিং আকেইহান লৈতে রূপ লাখ - দ্বি লাখ লাগে। উতার গজে, ভর্তি ঐতে, চাকুরী পেইতে, রূপা লাগে। উতাউ কম করে নাগে। রূপা পাঞ্চাশ হাজারেত পাঁচ ছয় লাখ পেইয়া লাগে। ছাত্রছাত্রী এতা মনেইয়াউ মনেইতারা বিষয় উহান পাকরে নুয়ারতারা। পাকরিয়া উঠিয়া বারো চাকুরীর চেষ্ঠাৎ বছর পিছেদে বছর বাছনি। কোন কোন গরতা চাকুরীর বয়স লালৈয়া য়ারগা। পিছেদে বেহা-বেপার, প্রাইভেট কোম্পানীত চাকুরী, এসাদে ঐয়া ছৌ ছুমারার ছাত্র-ছাত্রীর মনো ভাগে পড়েরগা। কিসাদেউ হবা মন আহানলো থাইতা। পাগল নাইয়া আছি এহানৌ বাল। এতাহাবি পাকরিয়া লপুকের খেতি-বাতির কামৌ কিসাদে করতা। তেবৌ করতারা। যেকোন কাম আহান করতারা। তারো নিঙলছৌয়ৌ মুনিছৌয়ৌ বয়স ঐলেউ বিয়া না করতারা। কাম-কাজ আহান নৈয়েলে, ধন পয়সার আয় আহান নৈয়েলে, বিয়া করিয়া কিতা খৌয়েইতায়। ছৌ ছুমারা ঐলে কিসাদে পালিয়া পুথিয়া ডাঙর করতায়। পেইতারা ধনহানিলো নিজরতাউ নারগা, কারে খৌয়েইতাই, চেইতাই। তা আরো, ঘর-দোয়ার বাপক-মালক বেয়াপা-বেইবুনি আত্মীয় কুটুম এতাৎত দুরেই ঐতারা। আজি কুংগ আছিতা, কুটুম-কাষা, নিংশিং ঐতারা, কয়গ আছি, বিদেশ-বাড়ী, দুব্বের কুটুম, থুঙেতারা। পথ-আটানির খরচ এইপাৎ, খুন্তল, মাছ আকচারা, ভাত আকচারা খৌয়ানির খরচ জারে পারানি চিল অছে। মকা-পুঠি এবাকা কিলোত রূপা আহৌহান। বোয়াল, চিতল, রৌ, বাউ, রূপা আহৌ য়াংখেইৎত রূপা সাড়ে তিনহৌ চারি হৌ ফৌঐল্গা। কলা কান্দাহানাৎ রূপা দশহানাৎত রূপা পঞ্চাশ পেইয়া। বাসর ভাড়া, ট্রেনের ভাড়া, তোমার দ্বি-আনার ফামে এবাকা রূপা দশহান। তারো বুড়ীমা, এবাকা ছৌ-ছুমারারে দোষ নাদি বরং ভগবানরাং বরহে মাগেদে, যেসাদে করেউ তানুরে সংসার এহানাৎ বর্তিয়া থানার, হিম্মত, মনর উৎসাহ, চেষ্টাশক্তি বারো পুথি দেক। ঘরেদে নাউ চাকা, তানুয়ে হবা ঐয়া পালৈয়া থাকা। চিন্তায় চিন্তায় আমারতা ঘুম নার। কনাক বয়সেৎ হার্টর নুয়ারা, প্রেসার, ডায়েবিটিস, অল্শূল, পিড্শূল, ষ্টোন, সুগার, ক্যানসার, বাত, কিডনীর নুয়ারা, মুর, কামাডানি কাকালী দোহানী, লারিকটা, উরৎ, থরোয়া, মুদা দোহানী, এতালো ভর ফাচি। 'নারসিংহোম' আক্তা আছে ওতাত চিকিৎসারকা বরানিয়ে, টেষ্ট, ফিজ হজকর দাম দিতে দশ-বার

হাজার লাগে। কিতাপারা অপারেশন কিতা ঐলে রূপা দ্বি-লাখ, তিন লাখ লাগে। ডাক্তরর ফিস্ চানা হান লেহে অহৌৎত আহৌ য়াংখেই। আজিকালি নুয়ারা আগ সেমটানি মানে রূপা দ্বি-তিন লাখর কম নাগে। এতার চিন্তাত আমার ছৌ, আমার মানু আরোহে জিংতা ঐয়া আছি। তারো বুড়ীমা, মোহনদারে না গুজুরিছ। তাহে হবা ঐয়া থাক।

কথাহানি মাতিয়া অনীতা উঠলী। যানারকা করতে, সেনারেদ্বীয়ে আতহানিলো ধরিয়া খাম করিয়া বারো বছয়েইলী। বছয়েইয়া মাতিরী -

- অনীতা ! তি এবাকাৎত এমটিক খাল করৌরীতা। হবে তোরতা আটাইশ-উনত্রিশ বয়স অথাই ব এবাকা নৌ-নৌ করে হৌ আগ উড়ে, করিয়া হারৌ-তিয়াম করিয়া, চিন্তা ভাবনা না-করিয়া আটবে ফিরবে সময়হানাত্ কতি খাল করৌরীতা। বুড়ীগ ঐলে পারা। মি এবয়সেউ এতার বিন্দু আগ খালকরে নুয়ারেছ। তোর এ বয়সে মোরতা মুনি-ছৌ আগয়, জেলাছৌ আগয় অছিল। দৌয়ে নিয়া দিলাগা। নাইলে এবাকা নাতি নাতল বিয়া দিয়া ঘরগ ঝম্ ঝম্ করিয়া থাইলুঐছ। খেতৎ পন্দর-ষোল বছরে কলেরাই মরে পড়িলগা। মাগোতে বিয়ার পিছে ছৌগ জরম দিতে গেলিগা। এমটিক না খালকরি। ভগবানে আশ্বাসেউ করতৈ।

- বুড়ীমা ! মাতুরীহান চুম। কিন্তু আগেৎত না খাল করলে পথতে কিসাদে পেইতাঙাই। য়েগরতা ভাবনা নেই উগরতা ভগবানৌ নেই' বুলতারা। 'যেগো ঘুমজিয়া থার উগোর কপালহানৌ ঘুম জিয়া থার'। মহিষাসুর এগোরে দুর্গায় দ্বি-হান আতলো মারে নুয়ারতৈ দেহিয়া দৌএতায় আরাক আত আটহান দিয়া, আতে আতে খুজু-খুচ্ছেই দিয়া দেখিলাতা। দুর্গা গিথানকে আত দশহানলো লালফাম করিয়া মহিষাসুররে জিঙেছিলীতা। আজিকার সংসার এহনতে মহিষাসুর মাল। আমি চিন্তা ভাবনালো পথি না নিকাললেতে এ মহিষাসুর এগরাংত কিসাদে জিংতা ঐতাঙাই। চিন্তাতে করানি লাগতৈ, পথি নিকালানি লাগতৈ, মন-প্রাণলো কর্ম করানি লাগতৈ। সংসার এহান কঠিন অছে। জটিল অছে। আগেকার, ডেকি লপুকে খেতি করিয়া, বিলে মাছ ধরিয়া, ঘরে খানি-মানি ফুতি-ফালি বুনিয়া, বাড়ী-কলে হৌ-পাত খানি কয়েইয়া তুমি চল্লায় উহান নাছে। এবাকা লপুকে কিয়ার আহান খেতি করলে ধান দশ মন নার, খং-ঘাট-বিল নেই মাছ-মারানির, থাইলেউ মাছ নেই। বাড়ী খেতিত ফসল নার। কাদা বারার টেঙরাৎ বাহা-

কুক-দারো-ছন নেই। হৌদিন গেলগা। এবাকা নুয়া নুয়া কল-কাৰকনা বেহা-বেপার, ফুতি-ফালি, রং-তামসা নিকুলিয়া মানু উতার গদে বেরছি। পৃথিবী এহান এবাকা ফর দিয়া ছালছে। ঔ নিত্য নূতনর তুলোনা দাব্ দিলে আমি অতি পিঠিত পড়িয়া থাইতাঙাই। এবাকা পিঠিৎ পড়িয়া থানার কাল নাগৈ। এবাকা দাব্ দিয়া আগে যানা। আগে খানা। এবাকা, 'আগে গেলে বাঘে খায়, পিছে গেলে হোনা পায়' নাগৈ। এবাকা 'আগে গেলেগা আগে যানা, পিছে গেলেগা পিঠিত থানা।' বুড়ীমা! এবাকা বিঙগা। রাতিকার ভাত রাধানি আছে। ইমা আজি ঙালকরে খাছে হানতে ভকপা থাইব। বাবাউ গারীগ খানি নুঙেই না পার বুলেছে। বুলিয়া উঠিয়া গেলিগা। যেইতেগা যেইতেগা মাতলী-কালি বার আইতৌ নাই।

সেনারেশ্বীয়ে খালকরিরী পাপালুয়ে তম্বক আগ বহকগ করে আনেছে। কতি খালকরিরীতা। নিজরকা, হৌ-জীপুতরকা, বুড়া হৌরক হৌরিয়করকা। কিত্তাউ সম্পর্ক নেই, মোর কাউ। ভগবান! এছাদে নিঙলছৌ ঘরে ঘরে জরম দিয়া দে।

সেনারেশ্বী রাত ভাত না খেইরী। সেল্কম গ্লাস আহান, কাপক-বারো চিড়া-মধুর-কলালো ফলার খেইরী। আজিয়ে উতা খেইয়া ফামে হমেইলীগা। খানি থাইয়া ঘমুজে পড়লীগা। হপন আহান দেহে দেহে নুঙেই ঐয়া ঘুম জেছে -  
- মোহন আছেছে। বহক আছেছে। নতিয়ক আগয় নতিনক আগয় আছেছি। মোহন চাকামে হমাছে। ভাতর যোগাড় করের।  
তেইরে আংকরের -

- ইমা কিতা খানা মনাউরীতা। ইলিশাউ আনেছু, কালিকার বোয়ালৌ আছে। রাতি বোয়ালে লেউএ নাউ খেই। কালি মাদানে তেই হবাক রাধে দিতৈ। তাপ্থা ঐয়া খেইছ। এবাকা ইলিশায় মুখীয়ে রাধে দিং। মাছ টুমা আকেইহান বাজে দিতৌ। আরাক টুমা আকেইহান হৈরলো হিজা দিয়াদিং। ঐতৈ নাই, ইমা। ফামহানার কাদাৎ আইয়া আত-জাং মাঠিয়া দিল। দরিয়াহান গারগ পেইয়া আচুলে দিল। মহরিহান হবাক খালকরে দিয়া ডাঙ্গর লাইটগ নিবা দিয়া হরকাং লাইটগ লাগাদিয়া চাকামে ভাত রাখাত হমেইল্ গা।

বহকগয় ছৌ দ্বিয়োগীয়ে লেরিক বাগাদিরী। ঘন্টা আহান পারা ইংলিশ বাগা দিলী। আরাক ঘন্টা আহান পারা অঙ্ক বাগা দিলী। পিছে বাংলা বাগাদিলী। উতার পিছে ভাত খোয়েইয়া ঘুমজা দিলী।

খানি পিছে খানার ঘরে মাটিহান লেপিয়া ফিটা আহান পাতেদিলী। ভাতর চাংলুকহান হাজেইয়া আনিয়া থৈয়া তেইরে উঠেইয়া নিয়া ভাতে বহা দিলী। কাদাৎ বৈয়া ইলিশার কাঁটা বাছে দিয়া পুকামে থদিরী। হৌ-ভাত ঐবগা করে আংকরে আংকরে খোয়েইয়া থাত-আত ধদিয়া, খুংতেই হনলো পুছে দিয়া ফামহানাৎ ঘুমজা দিলী।

মোহনে-তেইয়ে, তানুর ভাতগী নিকালেয়া খেইলা। মোহন উঠিয়া গেলেগা তেই ঘর চাকাম লম্ করিয়া তেইর কাদাহনাৎ ফামহানাৎ ঘুমজিয়া থাইলী।

বিয়ান পাঁচ বাজিৎ উঠিয়াই ঘর দোয়ার হুরিয়া পুছিয়া হিনেইয়া আইলী। তুলসীবুঙে দুপ-থংমেই দিয়া পাকঘরে গেলিগা। সাড়ে ছয় বাজিৎ রাধিয়া পুড়িয়া ছৌর-ইঙ্কুলর ভাত টেবিলে থদিলী। টিফিন বকস দুগ, পানীর বোতল দুগ কাদাৎ থদিলী। ছৌগীয়ে উঠয়েইয়া হিনাৎ দিয়া পেঠেইয়া তানুর ইঙ্কুলর লেরিকর ব্যাগ দ্বিয়োগী হাজেইয়া টেবিলে থদিলী। হিনেইয়া ফু তি পিদিয়া আনায় ভাতে বহা দিলী। মোহনরে ছৌগী ইঙ্কুলে থিঙ্করে দেনারকা উঠা দিলী। খানি থাইয়া মোহন স্কুটারহান উঠানে নিকালেইয়া উবা ঐল। বহকগয় ছৌদ্বিয়োগীয়ে নিয়া স্কুটারে কাকরে দিলীগা। পিঠিৎ ইঙ্কুলর ব্যাগগী, হাতে পানীর বোতলগীলো ছৌ-দ্বিয়োগী বহেছি। মোহন স্কুটার হানাৎ কায়া ছৌগীরেলো গেলগা।

বহকগ ঘরে আইয়া তেইরে উঠেইলী। আত-জাং-মেইথং সেঙনির তপ্তাপানি, য্যাখিল আগ, খুংতেই তুপ্ আহান কাদাৎ থদিলী। দাঁত দারেইয়া আহি মেইথং দৈয়া বিয়ানকার চাপানী পিনারকা মাতিয়া চাকামে গেলিগা।

তেই ফামহানাৎত উঠিয়া মাংকলে গিয়া দোয়াৎ গেলিগা। আইয়া, দাঁত কিতা দারেইয়া পুছিয়া ঘরে হমেইতেগা বদাগৎ উসুট্ন্ খেইয়া 'অনীতা' বুলিয়া চীকারি আগ দিলী। ঔবেদে মাং ফৌঅ পাড়লীগা।

বিয়ানহান হুতুমুমেউ ফুবাছিল। পুববারা ঙালছিল। সেনারেশ্বীর চীকারিগ হনিয়া, পাপালু, পাপালুর মৈলক থৈবী, পুতক অর্জুন, বহক বসুন্ধরা বারো অনীতা ধাবদে আইলা।

- বুড়ীমা ! বুলিয় অনীতায় সেনারেশ্বীরে ধরলীগা। আংকরলী-

- বুড়ীমা, হপন দেহিয়া ডর পেইয়া চীকারিগ দিলেতা ?

- না হে! বদাগৎ উসুট্ন্ খেইয়া বুড়ী আঙুলিগীৎ দোহেইলু হনতে তোরে চাকামেৎত ডাকলুতা!

- কে, চেইং কুমপেই দোহেইলেতা' বুলিয়া জাংহান চেইতে বরফ পারা ইং জাংহানি তেইর আত হানাৎ ঠেকতেই অনীতায় লৌদিলী -

- বুড়ীমা নেই !

## স্বর্গ সভা

- নহুস

শ্রীকৃষ্ণ মাতের -

- তিল দেখি রাজর্ষি, দেবর্ষি, ব্রহ্মর্ষি, মহর্ষি, বরেণ্য সমাজ নিংপা গিরিগিথানী। হাবির শ্রীচরণে ভক্তি কাংকরুরী। আপনা গাছির শুভাগমনে আজিকার মহতী সভাহান ইঙাল ঙালৈল। সত্য, ত্রেতা, দ্বাপরে স্বর্গরাজ্যে এসাদে সমাবেশ কোনদিন নাছে। বার ভবিষ্যতে ঐব বুলিয়াউ নিং নেই। তারো, আজিকার সভাত মৈর্ত্যর মনুষ্য এতার কর্ম-ধর্ম আচরণ বিধি নির্ধারণ করে দিক্।'

সভাপতি ব্রহ্মায় শ্রীকৃষ্ণর বক্তৃতা হান কৃপকরে ছনের। মনে মনে খালকরের পিছলা কুঞ্জালিকাগ! তারেউতে কাগজর ফটোং, হিলে, মাটিয়ে, পিতারেই, এমন কি রুকে রং ছাংকরিয়া মৈর্ত্যর মানুয়ে থদেছি। এগোয় বারো কিহান করাণি মনেইলতা। মোরতাউতে প্রজাপতিগ ছোচা দিয়া তনুয়ে তনুয়ে স্বাক্ষীথায়া কাগজে ইকরা-ইকরি করিয়া যোগো-হাদা উগোরে বিয়া করিয়া লেহা লেহা ছো-ছুমারা জরম দিতারা। জেলাছোং না মুনিছোং ঐতে উহানো মি ঠিক করানির আগে তনুয়েই ফটো চেইয়া হারপেইতারা। তাতে, পাকানা ছইয়া মোরেই সৃজন করেছে বুলের হানতে কিহান মাতের হনিক।' খালকরিয়া ঝুম মারিয়া চিন্তা করিয়া থাইল।

দৌ-অসুর, রাম-রাবল, কুরু-পাণ্ডব যুদ্ধ এতায় পেল নাইয়া বার কুং যুদ্ধহান লাগারতা। মৈর্ত্যর মানু এতা ঘর-ঘরন্তে ধন-পয়সা মাগিয়া আমারকা দৌর লেইছাং হংকরে দিয়া আমারে উতার ভিতরে বরা দিয়া তালা-চাবি লং করিয়া, পূজা করিয়া থছি। দেবাদিদেব মহাদেবরতা যেসাদে আলাদা ঘর, ব্রহ্মা, বিষ্ণু, দুর্গা, হাবিরতাউ আলাদা আলাদা ঘর। আমারে হবাকরে খানারতা দিতারা। তনুতে নাখেইতারা। ইমে থিন্ এরাকটর বিষ্ণুট আহানে, পানীগিলাচ আহান পিয়া থাইতারা। এমাটিক ভক্তি। চকৈয়া কটিগি অযিতারাগা। আমি আজি বিধান আহান দিক্। আমার লেইছাং হংকরাণির কা, আমারে পূজা করানিরকা ঘর ঘরন্তে যেতা ধন-পয়সা মাগিয়া আনতাই উতা নিজে খানি খাকা-পিকা। অবশ্যে, কামহান যত ইজ্জু খালকরিয়ার তত নাগৈ। মৈর্ত্যর মানু অতি ধূর্ত। তারো এসাদে করাণিরকা সল্লা দিক্। ধন-পয়সা লৈলে খাতার পাতাহানাৎত আধা আহান পাতা দেনার পিছে মুরাগত থার বাকী আধা পাতা

হানাত নামছা বার সুরাণীগ য়েকরে দেকা। দিয়া কন্ত বছর ঝুম মারিয়া থাকা। খাতাহনতে জমা না দেকা। মাত্তে মাত্তে ঠু-ঐলে আজি খানি, কালি খানি করে রুপা জমা দিলে ঐতে। বার অতি টানা-টানি করলে মুরাগ মাঙেল বুলিয়া দায়মুক্ত করাণির কা 'প্রেরার' পিটিশন আহান দেকা।

ব্রহ্মায়ঃ শ্রীকৃষ্ণর বিধান এহান হুনিয়া মনে মনে সল করের। শ্রীকৃষ্ণ নাইলে এসাদে সংবিধান বেন্ড করানি পারাক কালোপযোগী বুদ্ধি দিয়া পারতাইতা। ভত্ততে জিংতা করতনাই। ভত্ত জিংতা ঐলেহে আমিদৌরে জিংতা করতাই। যে যুগহান আহেছে। অবশ্যে ব্রহ্মায় চাতুরীহান ঠিক পেইলেউ ঠকামিছা ঠিক না পেইলো। তবে নিমাত থাইল। টটরলে বারো পিছেকার বছর সভাপতিগর পদ ফামহান্ নাদতে পারে। উহানো ডরপার। শ্রীকৃষ্ণ মাত্তে যারগা —

— মৈর্ত্যর মানুয়ে আমারে হবাক শুব-স্ততি করে পারানিরকা এবাকা ইমাঠার হান তামকরাণি মনেইতারা। কিন্তু লেইরিক লেইছোতে মহর্ষি বেদব্যাস, মহর্ষি বাস্কিকী, দেবর্ষি বৃহস্পতি, ভৃগু, পরাশর, সিদ্ধিদাতা গণেশ গিরক গাছিয়ে ইকরেছি হানতে দেব গুরু বৃহস্পতি বার অসুর গুরু ভৃগু তনু এহানর সদবুদ্ধি আহান দেকা।

সভাপতি ব্রহ্মায় পয়লা দেবগুরু বৃহস্পতিরে তাঁর সংপরামর্শ দেনরকা হেইচা করল। বৃহস্পতি গিরকে মাইকগত উবা ঐয়া মাতলো -

- মৈর্ত্যর মানু এতারে খানি ডর পাউরী। আমার গণেশগুরির কাদাত জটিয়ার উপেয় সরস্বতী গিথানকে লেইরিক-লেইছো ইকরাণি-হংকরাণিরকা যাজ্ববল্ল্য, গার্গী, মৈত্রীয়া, মিহির গাছিরে, থদেছিলি। মৈর্ত্যর মানু এতায় তনুর ইকরা লেরিক উতা না করিয়া কাহিল করে বেলাছি। তেবু, মাতানিরকা মাতলায় হানতে মাতিং। পারতারা আগয় লেরিক আহান সংকলন করক। নিজে ইকরলেউ কিত্তাউ নেই। পিছেদে মুনি ঋষি পাঁচ-ছয়গয় উহান অনুমোদন করকা। উতার পিছেদে অন্য আরাক আগয় তনু ইকরেছি হান বুলিয়া নিকালাকা। সংলককে খানি মানি আপত্তি করতৈ। করক। ফামে ফামে সভা-সমিতি করিয়া মাতলে ঐতে - সমাজর হবারকা লেইরিকান আমারহান করলাং। কতি শান্তি-মানুগ। এতাপারা হবা



কামহানাত দীঘালী-পাখালী দেৱতা। 'ইমাঠাৰ পুষ্টি পালক' উহানো যৌকৰকা। ইমাঠাৰ কথা। ইমাৰ জিপুত ! কি সাদে না-হায় বুলতাইতা। মিয়াম মাত্লে 'থয়োৰো' বুলিয়া বন্ধা মালৈলে লমৈল। টটৰতে টটৰতে 'ঠুঞা খামৈতায়।' মতিয়া বৃহস্পতি বহিল।

ভূণ্ডয়ে বৃহস্পতিৰ যুক্তিহান য়াকৰল। উঠিয়া মাইকগত গিয়া মাত্লে -

- আমিতে অমৃত পান কৰলাং। মানুতে সুৰাপান কৰতারা। তানু পৰৱৰ্ত্তে নিজৰতা কৰে পাৰতারা। নাইগতাবে হায়তা কৰে পাৰতারা। পাৰিলমাহি পৰৱৰ্ত্তা কৰলকা। ইমাঠাৰ লেইৱিক-লেইছো সম্পৰ্কে মি বৃহস্পতিৰ পৰামৰ্শহান সমৰ্থন কৰুৱী। এসাদে না কৰলে মৈৰ্ত্ত্যৰ মানু জিংতা নাইতাই, মতিয়া ভূণ্ড বহিল।

ব্ৰহ্মায় খালকৰে ন্যায়মুৰ্ত্তি বৃহস্পতিয়ৌ আহিগত ফুতিহানলো পটি বাঁধিয়া ফাল্লাহান ধৰেছে। অসূৰ গুৰু ভূণ্ডয়েউ অমৃতৰকা দৌৱ তুল অসূৰে যুদ্ধ কৰুয়েইল। এগ এবাকা সুৰাপান হবা বুলেৱ। 'মা গৃধ পৰস্ব ধনম্' বুললু মি-এবাকা কি হন মাততু। মোৱেতে আদিত খদিল। অশ্তে মধ্যে গিয়া নুৱাৱলু। চেইঙ কি হন কৰতারা। সভাপতিগ 'ৰাৱাৰ ষ্টাম্প'গ বুলিয়া মাতানি অকৰেছি। টটৰলে বেৱা। খালকৰিয়া পানীৰ কলগ এয়া থাইল।

শ্ৰীকৃষ্ণ সভাপতি ব্ৰহ্মাৰ যাথাং লৈয়া বাৰো মাত্ৰে -  
- লেৱিকহান উবা ঐল। এবাকা ছাপেইয়া নিকালানি। ঘৰ-ঘৰে চান্দা কৰকা। মৈৰ্ত্ত্যৰ অধিপতিৰতা খাজাধীখানাত ধন নেই। বাৱাদেস্তকুংগ আগয় মাত্ৰে -

- ছাপতৈ উগোয় ধন আছে বুলেৱ। তা লেইৱিকহান পেইলে ছাপাদিতৌ বুলেৱ। 'শ্ৰীকৃষ্ণ হনিয়াউ নাছ নেছেগ পাৱা এয়া তেৱাদে মুক্ছি আহান দিয়া মাত্ৰে -

- ঘৰ-ঘৰেস্ত লেৱিক ছাপানিৱকা বুলিয়া খাতাৰ পাতা না দিয়া ধন তুলকা। লেৱিকৰ কথা। ভাষাৰ কথা। হাদিত পাকৈল কথা। অতদিনকাৰ হপন। খৌৱাং এয়া আছি। কুম্বাকা টেইপাংঐতৈ। ইমা ঠাৰে তামকৰতাই। ধন-মাতলেই দিতাই। সমাজৰ কথা। সামাজিক কাম। আকগয় পাৰলেউ দিতৈ। সামাজৰকা দান, নাঙ আহান নাই। দশে য়াকৰলে এসাদেই কৰাণি।

সভাহানে সন্মতি দিলা পাৱা। ঝুম মাৱিয়া আছি। ব্ৰহ্মায় খাল কৰে কৰে বিভুলা অৱ। শ্ৰীকৃষ্ণ এগ কুম্বাকান্ত সমাজৰ মানুগ ঐলুতা। হবা কাম আক্হান না কৰেছেগ। কনাকে

ননী চৰ কৰল। ব্ৰজবধূৰ কলো কান কৰল। ৰাধাৰে পথে থেপ্‌কৰল। মৈৰ্ত্ত্যৰ মানু এতাৰে ধন খানৰ পথি এতা নিকালো দেনাং মেইখ্যু কাইলতা কিয়া। মৈৰ্ত্ত্যতথানা মনেইল তা না কিতা। নাতে মাত্ৰে।

সন্দীপন মুনিয়ৈ সভাপতি ব্ৰহ্মাৰাং খানি আহান মাতানি দেনাৱকা যাথাং বিছাড়ল। ব্ৰহ্মায় যাথংতে দিল। দিয়া খালকৰেৱ। মাষ্টৰ এগয় বাৰ কিহান মাততৈতা। সভাআহান বৈলে মাতানি মনাকুৱা এহান আইতারা। হুনেকুৱাতে কম। মাতলেই যেমন ইলৈতাই। সন্দীপন মুনিয়ৈ মাত্ৰে -

লেৱিকহানতে দেখলু। কিসাদে বাগাদেনা উহানো মাতেছি। এহানো য়াকৰেৱ, হৌহানো য়াকৰেৱ বুলেছি। ছৌৱ চিন্তাশক্তি বাড়তৈ। তানু যেহানো য়াকৰেৱ যুক্তিলো ডাঙড় ঐতাই। মৈৰ্ত্ত্যৰ মানু এতা ছত্ৰমেউ অতি বুদ্ধিলৌশিং পালপা অছি। যেতাউ অক বাগাদেনাৰ মাষ্টৰতে দেনা লাগতৈ নাই। এহান, হৌহান, যেনানো বাগাতেদিতনাই।

খাংখা নাৱদ 'নাৱায়ণ, নাৱায়ণ' বুলিয়া উবা ঐল। ব্ৰহ্মায় গালেইল-ইন্দ্ৰ পুৰীত দেৱৰ্ষি, মহৰ্ষি, ব্ৰহ্মৰ্ষি, ৰাজৰ্ষিৰ সভাত থাইবেগতে নাগৈ। হামেশায় নৱলোকৰ এলা দ্যৱ। দৌলিশিং দৌলাশাৰ সভাত নাৱায়ণ নাৱায়ণ কৰৱতা কিয়া। এহান নৱৰ ঘৰগ থাং। পানীকাটাগ ঐয়া বৈয়া হন। সন্দীপন মুনি-এতাপাৱা সাংখ্যতীৰ্থৰ আচাৰ্যগয় মাততে বেৱাচোৱা না কৰি। সভাৰ বেভাৱ না বাগি।

নাৱদৰ খৌহান খানি আহান উয়ানথা ঐলেউ নাতে বহিল। কৰজোড়ে ব্ৰহ্মাৰাং নিবেদন কৰল -

- পিতামহ, মৈৰ্ত্ত্যৰ পৌ আহান দিং। আচাৰ্য্য সন্দীপন মুনিৱতা মাতানিত সহায় ঐতৈ। 'নাৱদ সিদা সিদায় নাইলে তেৱা বুদ্ধি নিকালানিৰ মেশিনহান।

- উতা ঐলে মিনিট আহানাত মাতে বেলা। ব্ৰহ্মায় যাথাং দিল। নাৱদে মাত্ৰে -

- দৌ লিশিং দৌলাশা গিৱিগিথানী। মি গেল্‌গা মাহাত কৈলাশে যিতেগা বৈৱাকৰ পাৱগত পৰ আহান জিৱাছিলু। উপেয় দেখলু, মৈৰ্ত্ত্যৰ মানু কতগয় আমাৰ আচাৰ্য্য সন্দীপন মুনিৰ পাঠশালাৰ সাদানে পাঠশালা খুলেছি। দোয়াৰ হানাত মাষ্টৰে মাষ্টৰে মাৱা-মাৱি লাগেছি। পাঠশালাত কুংগ আগে হমেইতা। আমাৰ স্বৰ্গলোকেতে মাষ্টৰএতা পাকৰাত আইলে বেতন পেইতারা। মৈৰ্ত্ত্যৰ পাঠশালাগত, হুন্‌লুতা, পাকড়ানিত আইতারা মাষ্টৰে পয়সা দি তারা। পাঠশালা আগত ভাষাৰ জ্ঞান দিতারা। আৱাক আগত কৌশল বাগা দিতারা।

দ্বিতীয় কুণ্ডায় ইমাঠার লেরিকহান বাগাদিতাইতা। হাদিত আকতাই বার বাগাদেনিরকা মাষ্টর নালাগের বুলেছি। যেতা যেতা পুরানা মাষ্টর আছি তানু বাগাদিতাই। মৈত্ৰ্য অধীপতিয়ে তার খাঞ্জাখীখানাত ধন নেই বুলেছে। নুয়াকরে মাষ্টর এবাকা দিয়া নুয়ারতায়। আচার্য্য গিরকে বাগাদেনির মাষ্টর দেনার কথা মাতের। আগেদেউ মাষ্টর বাগাদেনিত গিয়া ছৌর ইস্কুলে লৈলাটে পড়েছিল। কথমপি পরাণ রক্ষা পেয়া জিংতা ঐয়া আহেছি বুল্লা হনতে মি আহান মাতানি মনাউরীতা, মৈত্ৰ্য মাষ্টর মুরে বুদ্ধি র লগে আমি হিং জোড়া আকেইহানো দিয়া দিক্। মাতিয়া নারদ বহিল।

সন্দীপন মুনি কতহান খাল করল। পিছে মাতলো -

- শ্ৰীকৃষ্ণ! তোরে মি সাংখ্যবিদ্যা, ন্যায় শাস্ত্র, ব্যাকরণ বাগাদেছিল। হিং দারেইয়া খুরুম দেনার শিক্ষা দেখু বুলিয়া নিংশিং নাউরী। তি মৈত্ৰ্য মানুর তুল এবাকা জবর গলাগলি অকরেছত। তানুর তুলো সমাজ পাতানি মনার পারা। অর্থ-সাংখ্য দর্শনের যারী পরী তি মিয়াম দ্যর। এ মৈত্ৰ্য মাষ্টর কিসাদে অনা লাগের তি হে মাত। মাতিয়া সন্দীপন মুনি বহিল।

শ্ৰীকৃষ্ণ উবা ঐল। কতহান চিন্তা করিয়া মাইকগত ফুঁ আহান দিল। পাঞ্চজৈন্যগ রহিল পারা। সভাহান হিঙারলা। সভাত বহেছিল। রাজর্ষি, দেবর্ষি, ব্রহ্মর্ষি হাবি উংখাত ঐলা। 'বার কুরুক্ষেত্র লালফাম হান ঘোষণা করতৈ তা না কিতা' ব্রহ্মায় সভাহান পিঠির পথগ আকখুরুম চেইল। এং, দোয়ারহান খোলা আছে। দেহিয়া চিন্তা মুক্ত ঐল। শ্ৰীকৃষ্ণ বাতর বারার আতহান কহনিগ পেয়া তুলল। তর্জনীগ উবা করিয়া টিং দিল। ব্রহ্মায় খালকরের বার সুদর্শন চক্ৰগ আহান করের তা না কিতা। শ্ৰীকৃষ্ণ কিস্ত উহান না করল। আঙুলীগ দেখয়েইয়া মাতলো - গিরিগিথানী! আগে মি মৈত্ৰ্য 'কিশোর'রে দা পেঠাছিল। তাঁ মৈত্ৰ্য মানুর মাষ্টর বরা দিল। যুগহান হবা অছিল। কথা কমছিল। এবাকা আকেইগীয়ে নার। তারো দুগ হাবি দা পেঠাছু। আগ, বৌদের কৃষ্ণ। হেরে ওগো দেবগ দেবক।' শ্ৰীকৃষ্ণ মাতৈ যারগা -

- বৌ কৃষ্ণ মৈত্ৰ্যাধিপতিরে বৌ দিয়া মাষ্টর পঞ্চাশগ পারা বরা দেছিল। দেবকে গিয়া মৈত্ৰ্যাধিপতিরে দে দে বুলিয়া জ্বালানী আকৈয়া মৈত্ৰ্যাধিপতিয়ে ছৌঐয়া খেদে দিল। কতদিন আগে বৌকৃষ্ণ বার মৈত্ৰ্যাধিপতিরাং গেছিলগা। মৈত্ৰ্যাধিপতিয়ে গালেইয়া মাতেছিল, দিলু আর তিতে বৈয়া থাইলেগা। দেবকে বিশ্বর মানুহাবি ডাহিয়া মাষ্টর দেনা লাগতৈ বুলিয়া পৃথিবীত মোর জারী পিটলো। এবাকা কারে দিতু। তি

তড়াকরে যাগা, মাহাত্মা বাগে ভু-বারতর যুবশক্তি হাবি পুলকর। মুণ্ডে মোরতা মহারণ আহান বৈশাখে আহের। মোরে যুব সিবেইয়ে পাংকরাশি লাগতৈ। সভাহান করিয়া আয়। আগে পঞ্চাশগ দেখিলু। এবাকা একশগ দিতো।

- হাদি এহান দেবক বারো গেছিলগা। মৈত্ৰ্যাধিপতিয়ে মাতেছে তিতে মোরাঙো দে দে বুলর। হৌগরাঙো দে দে বুলর। আগেদেউ উসাদে করলে। তোরে ঠাচা নেই। তোরে নিয়ত হবা নেই। হুদা পুখাম ছিলকর। এবাকা মি বৌ কৃষ্ণে দিতো। এবাকা তাল-তাঞ্জা-মাতাম বেরা লাগেছে। তি এজেপ, হৌ জেপ, বিজেপ, বেশেপ, বেশেপ যারী মাহি না দি। কিতাউ নেই কথালো দৌর চিন্তা শোভা না পার। আমি এহানেই সিদ্ধান্ত নিক্গা। মৈত্ৰ্য মানু খানি আটকা। আকসাটে পেইলেতে আমারে কেরেপ না করতাই। ইমে আকখুরুম দেনা-আকখুরুম না-দানি এসাদে আচুল ঠেলাং থেক। পাংকাল খানি টুমকা। পরিনামে আমি হাবি আছি নাই।' এহানি মাতিয়া খানি খামেল।

ব্রহ্মায় শ্ৰীকৃষ্ণ ভেদ নীতিহান ঠিক না পেইলেউ মনে মনে থাইল। খালকরের এহানর শেষহান কিহান ঐতৈ। লাগাদে লাগাদে পিছেদে আমিযো লাংলাত পড়তাঙাইতা না কিতা। এবাকা বারো হিন্দু-মুসলিম-শিখ-ইশাই এক বুলতারা। মৈত্ৰ্য মানু এতা কিহান ঐলাতা। খুটাগ লিং নাইতারা।

শ্ৰীকৃষ্ণ মাতের

- মাষ্টর তা কৰ্ম-বিধি এসাদেই থাক। আরাক কথা আহান মৈত্ৰ্য মানুরকা ঠিক করানি লাগের। এহানতে মহর্ষি কৃষ্ণ দ্বৈপায়ন বেদব্যাস গিরকে করে দেক। মিতে দ্বাপরে মাতেছিল বর্ণসংকরে পাপর ভাগী ঐতাঙাই। কলিকালে না হনতারা। তারো আর এবাকা মি না মাতিং। ইমেউ মোরে বদনাম দিতারা। হাবি নষ্টর জরগ তি বুলতারা।

ব্রহ্মায় কৃষ্ণ দ্বৈপায়নরে মৈত্ৰ্য মানুর বিয়া-বিধি সম্পর্কে খানি মাতানির কা হেইচা জানেইল। - মহর্ষি শ্ৰীকৃষ্ণ দ্বৈপায়ন বেদব্যাস পাণ্ডব বংশ জিংতা করানির সল্লা দেখিল। ওসাদে সল্লা লৈয়া ধৃতরাষ্ট্র, পাণ্ডু, বিদূর, জরম অছিল। পঞ্চ পাণ্ডবো বর পেয়া কুন্তীয়ে মাদ্রীয়ে পাছিল। ব্রহ্মায় কৃষ্ণ দ্বৈপায়নর সম্যক পরিচয় দিল। মহর্ষি কৃষ্ণ দ্বৈপায়ণে মাতের -

— গিরিগিথানী। এবাকা সত্য, ত্ৰেতা, দ্বাপর গেলগা। কলিহান চলের। আমার পরীক্ষা-নিরীক্ষা এতা এবাকা না লৈকরলে পরবর্তী যুগে আমি কিহান করতাঙাই উতা নিরুপনর কা ডাটা না পেইতাঙাই। মৈত্ৰ্য মানু এতারে আমি বিয়া-বিধির ব্যাপারে তানু মনেইতারা উসাদে করাণির কা সল্লা

দিক্। বেদব্যাসে মাতে যারগা -

- আগে সৈত নাম তুললা। ডোম-চাড়ালে জরম অছি বুলতারা। বুলকা। মানুতে মিয়াম মানুতে মিয়াম ঐলা নাই। ঠারহান ডোম-চাড়ালর বুলতারা। বুলকা! ঠারহান সেঙেকায়। স-গোত্র থছি। শাকতি নেই। বেইবুনির জিপুত থনা অকরেছি বুললা। মোহনকর জিপুত থছি। দামান-কৈনার কা চিন্তা কমেতে। এবাকা জাত না বাছিয়া থনা-থনি দিক্ বুলতারা। হোবাহান। থকা-দেকা। বিশ্বহান ডাহানি অকরেছি। ভু-ভারতে তৃপ্তি নেই। বিশ্বায়নর যুগ এহানাত মৈর্ত্যর জাত-পাত বিছড়েইয়া কোনে কাঞ্চলে পড়িয়া থাইলে হীনৈতে। আজি ঠারহানলো চল্লিশ লক্ষ বছর কতি হীন পেইলাং। লেইরিকলো কতি লীলা করলাং। মাষ্টররকা কতি চিন্তা। শ্রীকৃষ্ণের কতিয়ৌ নাঙ পাল্টা পাল্টা মৈর্ত্যে দিয়া পেঠেইতাং। 'কিশোর' করিয়া দিয়া পেঠেইলাং। বৌ কৃষ্ণ করিয়া দিয়া পেঠেইলাং। দেবক বুলিয়া দিয়া পেঠেইলাং। এহানাস্তে টটরানিয়ৌ না করের। বিশ্বর মানু এতা বিয়া-সাদী করিয়া জাত আকহনাত তিলেয়া একাকার ঐলেতে একজাত-একভাষা-একপ্রাণ-এককথা। ঠারর চিন্তানেই, ভাষার চিন্তা নেই, লেরিকর চিন্তা নেই। মাষ্টরর চিন্তা নেই। বিশ্বায়ণর নুঙেই হান এহান। আমার ডা-টা কালেকশন, মন্দির হংকরানিরকা ধন-পয়সা মাগানী না লাগতে। লেরিক ছপানরিকা পয়সা মাগানীরকা মিছা হাচা টটরাণি না লাগতে। হয় এ মেরিকায় নাইলে হৌ এরাবি কায় করে দিতাই। মসজিদ চা, গীরজা চা। মৈর্ত্যর মানু চালাক। তনু-দ্বিতারেউ থৈক বুলতারা। মৈর্ত্যর মানু কতি শিং। দ্বিতোতারেউ পানেই তাই। পয়সার কি অভাব। এবাকাউতে এমেরিকাতত ডাকতারা যেইতারাগা। দোবাইন্ত ডাকতারা যেইতারাগা। আর যানা-ভাহানির দরকার নেইয়েতে। হোত আকগ অপরকাগা। চেইক নে। হোবা ঐলে পরবর্তী যুগে আমিযৌ উহান করবাংতা। আশ্বানে অসুরে-দৌয়ে মারামারি কাটাকাটি করিয়া শক্তি ক্ষয় কৈলাং। হবা ঐলে আমিযৌ দেবাসুর ঐলাং। এক জাত - এক প্রাণ - এক ধর্ম। ভেজাল নেই। হান্তে গিরিগিথানী, মোর প্রার্থনা, এ থনা-থনি-হান যাকরিক। পরামর্শহানি দিয়া শ্রীকৃষ্ণ দ্বৈপায়ন বেদব্যাস বহিল।

শ্রীকৃষ্ণ দ্বৈপায়ন বেদব্যাসর কথাহানি ব্রহ্মায় ঠিক পেইল। মনে মনে মাতে 'যেতাউ অক মোরে জিংতা কৈল। আকগ অছিলু নুঙেই অছিলু। দুগ অছিলোং হারৌ অছিলোং। পিছেদে মিয়াম হারৌ ঐতৌ বুলিয়া দুনিয়াহান হাবি সৃষ্টি করিয়া

কি লৈলাটে পড়েছুতা। এং, বেদব্যাস এগ কতি হারপারতা। মোরকা এহান মাতেরতা। আজি চল্লিশ কোটি বছর ঘুম নেয়ছুগনা। বেদব্যাসে শান্তি নিদ্রার যুগং আহান করে দিল। ধন্য বেদব্যাস।' এসাদে ওয়াখাল আহানে ব্রহ্মা গিরক প্রশান্ত ঐল।

শ্রীকৃষ্ণ ব্রহ্মারে সভাপতির ভাষণ দেনার কা হেইচা করল। ব্রহ্মা উঠিল। কৈ-ছপা, দাড়ি-ছপা বাঙ্গুরীবারার আতলো মাঠিয়েইয়া পাইট করল। বাতদে মাইকগ ধরল। মাতে -

- বন্দে দেবর্ষি, মহর্ষি, রাজর্ষি, সর্বে সভামধ্যে সমুপস্থিতান। বন্দে শ্রীবিষ্ণু শ্রীমধুসূদনং। মৈর্ত্যর মানুর কা আজিকার সভাহানে দিলাং কর্ম-বিধিহানি হাবিয়ে আকতা ঐয়া সমর্থন করলাং। মৈর্ত্যর মানু এতা তিলেয়া এক ঐলে আর কোনদিনো বধা নাকরতৌ। ইমে সৃষ্টির আদিত ডিম আগ করেছিলু উসাদে ডিম আগ হংকরিয়া উগর ভিতরে বরেইয়া হাবিরে থৈতৌ। তানু এবাকা আমারে মন্দিরর ভিতরে বরেইয়া সুরাণি মারিয়া থছি। এতারে চে চে নাংহান ঐয়া ফালদানি দিলে নিজেউ মরতাই আমারেউ মারতাই। অনথকপা মানু। সৃষ্টিহান খালু জালু করতাই। ডিমগোর ভিতরে থায়া চংদকা, ফালদকা। উহানেই তনুরকা হ'বা।

- কথা যাম মানু। এতা ডিমগোর ভিতরে যাম চুনা-ঐতাই। আজিকার সভাত সর্বসম্মতিক্রমে এহানেই সিদ্ধান্ত নেনাঐল মৈর্ত্যর মানু এতার সৃষ্টির আদির ডিমগোর ভিতরগৈ তনুর তা পৃথিবীহান অক।

- সভাহান ভঙ্গ ঘোষণা করলু।

সভাহান ভঙ্গ করিয়া ব্রহ্মাগিরকে দীঘল করে ওয়াইসাইঙেয়া নিংস্বাহান কারল। উঃ মৈর্ত্যর মানু হংকরানির বিপদ হানান্ত মুক্তি পেইলু। আরতে কুরাং মৈর্ত্যর মানু হংকরানির জঞ্জালে হমেই তৌতা। মরতেউ মৈর্ত্যর মানু সৃষ্টির আনন্দ না মনেইঙ ক। মৈর্ত্যর মানুষে এবাকা টিসু কালচার, টেষ্ট টিউব বেবী, ক্রোউনিং এতালো জীব, জন্তু, গাছ বিক্সথ, মানু হংকরাত থেঙছি। ডিমগোত বরা দিলা, অনথক করে ওয়াই ছাউলুক। দিলে তিন দোষ, নাদলে এক দোষ। দেনাউ নেই, নাদানিউ নেই। মোরে দোষী-দাষীয়ে আর লাগাল নাপেইল। দৌ-দুক, মানু, আর বর মাগানিত, বিচার কাংকরানিত মোরাং নাইতাই। মূর পাঁচগলো জবর হীন পেইলু। এবাকা মূর আকগলো নুঙেই ঐলু।



## দোল উৎসৱ

বলদেব সিংহ, বৰবাৰী, গৌহাটী

দোল উৎসৱ সৰ্বভাৰতীয় হিন্দু সমাজৰ প্ৰধান উৎসৱ। ফাল্গুনী পূৰ্ণিমাত দোল-উৎসৱে ৰাধা-কৃষ্ণৰ বিগ্ৰহ দোল বা দোলনাত বা বুলনাত স্থাপন। মেৰাকেউ বিগ্ৰহৰূপী শালগ্ৰাম স্থাপন অৱ। দোল উৎসৱ আগেকাৰ সন্ধ্যাত প্ৰাক অনুষ্ঠান বা পূৰ্ণিমাত সন্ধ্যাত যে অনুষ্ঠান অৱ, উহানৰে অসমীয়াৰ চাচৰ বাৰো বিষ্ণুপ্ৰিয়া মণিপুৰীৰ জন্ম বোলতাৱা। জন্ম বা চাচৰ অয়লতায় বহি উৎসৱ। খেৰ বা শনলো হংকৰা মেঘ বা ছাগীৰ প্ৰতিকৃতি পুৰিয়া দক্ষ অৱ। এক্ৰিয়াৰ প্ৰসিদ্ধি যে ভগবান শ্ৰীকৃষ্ণই মেটাসুৰে বধ কৰিয়া দোলোৱোহন কৰিয়া হোলি উৎসৱ সম্পন্ন অৱ। পশ্চিম ভাৰতে প্ৰায় মাহ আহন যাবৎ হোলি উৎসৱ চলৈ।

কিন্তু আশ্চৰ্য বিষয়হান যে কৃষ্ণলীলা বিষয়ৰ গ্ৰন্থ শ্ৰীমদ্ভাগৱত বিষ্ণুপুৰাণ, হৰিবংশ, ব্ৰহ্মবৈবৰ্ত পুৰাণ আদিৎ এসাদে বৈষ্ণৱ তথা হিন্দুৰ উৎসৱৰ কথা উল্লেখ নহৈ। শ্ৰীকৃষ্ণই বৃন্দাবন লীলাত দানব-অসুৰ বধ কৰাণি য়াৰী পেয়াৰ কিন্তু মেটাসুৰ বধৰ য়াৰী নাপেয়াৰ।

শ্ৰীমতি ৰাধাৰ লগে শ্ৰীকৃষ্ণৰ দোলোৱোহন বা গোপ-গোপীৰ লগে ৰাধা-কৃষ্ণৰ ৰঙ আবিৰ, ফাকু আদি খেলাৰ কোন আভাস নহৈ। সম্ভৱত দোল উৎসৱ আদিতে শ্ৰীকৃষ্ণৰ লীলাত অন্তৰ্গত নেয়ছিল। পিছেদে কোন সামাজিক প্ৰয়োজন বশতঃ সংযুক্ত আছে। কিসাদে, কিসুত্ৰে দোল যাত্ৰা কৃষ্ণলীলাত সংক্ৰামিত আছে, উহান সঠিক মাতে নাৰিয়াৰ। সুত্ৰ আহনৰ মতে উড়িষ্যাৰ ৰাজা ইন্দ্ৰদ্যুম্ন ১১৯৪ খৃঃ পুৰুষোত্তম মন্দিৰৰ সংস্কাৰ সাধন কৰিয়া দোলযাত্ৰাৰ প্ৰচলন আছে বা মগধৰ পাল বংশীয় ৰাজা ইন্দ্ৰদ্যুম্ন ১২০০ খৃঃ দোলযাত্ৰাৰ প্ৰচলন আছে। অন্যমতে ১৩ শ শতাব্দীতে শ্ৰীচৈতন্যদেৱৰ সময়ে দোলযাত্ৰা কৃষ্ণলীলাৰ অন্তৰ্গত আছিল। আবিৰ কুমকুমল ৰাঙীলা কৰানিৰ ৰীতি প্ৰচলন অনাৰ উল্লেখ শ্ৰীচৈতন্যদেৱৰ সময়ে পেয়াৰ। জীব গোস্বামীৰ ইকৰা লৈৱিকে পেয়াৰ -

‘অপিবত! জনতাসু হোৱি কায়াং।

হৰিমতি সন্তুৱেহো ব্ৰজস্য নাৰ্য।’ অৰ্থাৎ আহা! ব্ৰজৰ গোপীয়ে হোৱি উৎসৱে হৰিৰে জনতাৰাং ৰঙ আবিৰেবোলা অভিষিক্ত কৰে। বাসুদেৱ ঘোষৰ ইকৰা পদে সহচৰবৃন্দৰ লগে চৈতন্যৰ হোলি খেলাৰ উল্লেখ আছে।

ফাগু খেলে গোৱাচাঁদ নদিয়া নগৰে

যুৱতীৰ চিত্ত হৰে নয়নেৰ শৰে।’

আসামৰ মহাপুৰুষ শ্ৰীশঙ্কৰদেৱৰ কীৰ্ত্তন ঘোষাৰ ‘উৱেশা বৰ্ণনা’ত, শ্ৰীকৃষ্ণৰ ফাকু খেলিয়া দোলযাত্ৰাৰ উৎসৱ বৰ্ণনা পেয়াৰ -

‘ৰঙ্গে ফাকু খেলে চৈতন্য বনমালী

দুয়োহাতে ফাগু গুঞ্জা সিঞ্চত মূৱাৰী।

ফানীত গোবিন্দক তুলিয়া দোলত

দোলযাত্ৰা, কৰে মহোৎসৱে সি বেলাত।’

দোল উৎসৱ উল্লেখ -

‘ফাগু খেলে কৰুণাময় এ নন্দকুমাৰ

দেৱৰ দুৰ্লভ কেলি ফাগুৰ বিহাৰ।’

হিন্দু ধৰ্মৰ বিভিন্ন গ্ৰন্থে ‘দোল’, দোল, ফাগু, ফাগু আদি শব্দ প্ৰচলিত। অন্যান্য ভাৰতীয় ভাষাৰ ভজন কীৰ্ত্তনে হোলিৰ গাথাং সমাৰ্থবাচক ‘হোৱি’ শব্দৰ উল্লেখ -

‘হোৱি খেলত কানহাইয়া কুমঝুম

ছা হোৱি খেলত হায় গিৰিধাৰী..... ইত্যাদি।

এতাৱমা ‘দোল’ শব্দহানেই প্ৰাচীনতম কাৰণ স্মৃতি শাস্ত্ৰকাৰ ৰঘুনন্দনে বিষ্ণু বা জগন্নাথৰ দোলাত বহেৰ কথা উল্লেখ কৰেছে, হোলিৰ কথা উল্লেখ না কৰেছে।

পদ্মপুৰাণে দোলযাত্ৰাৰ উল্লেখ আছে -

‘দক্ষিণাত মুখৰ কৃষ্ণং দোলনায়নং সকুন্নাৱা

দৃষ্টাপৰোধ নিচয়ৈমুক্তা স্তে মাত্ৰ সংশয়।’

স্কন্ধ পুৰাণে দোলোৎসৱৰ ব্যাখ্যা আছে -

‘ফাল্গুনমাসি কুবীত দোলোৱোহন মুণ্ডমম।

যত্ৰ ক্ৰীড়তি গোবিন্দো লোকানুগ্ৰহায় বৈ।’

স্কন্ধ পুৰাণে তিন বা পাচদিন ফল্গু উৎসৱ বাৰো দোলৰ আগৰ ৰাতি বহি উৎসৱ কৰাৰ কথা উল্লেখ আছে। ৰং আবিৰৰ উল্লেখ নেয়লেউ কপূৰয়ো গন্ধদ্রব্য বিকীৰ্ণ কৰাৰ কথা উল্লেখ আছে। গন্ধদ্রব্য বিকীৰ্ণ ক্ৰিয়াই পিছৰ যুগে আবিৰ ৰং খেলাৰ ৰূপ ধাৰণ সম্ভৱ। এ সুত্ৰে আজি পেয়া দোলোৎসৱৰ আগৰ দিনে মঠ-মন্দিৰে গন্ধলনা বা গন্ধ দেনাৰ প্ৰথা বিদ্যমান। অধিক সংখ্যক মঠ মন্দিৰে দোলোৎসৱৰ দিনে শ্ৰীকৃষ্ণৰ বিগ্ৰহ দোলোৱোহন কৰাণি অৱ বাৰো আবিৰ, কুমকুম আদিৰ বিভিন্ন ৰঙৰ খেলা খেলিয়া

হোলি বা ফাকুর এলা অর।

কিন্তু বসন্তকালে এ উৎসবে দোল, দৌল, ফাল্গু বা ফাকুরা আদি শব্দ কিসাদে অয়া যুক্ত অয়ল, লগে বহি উৎসব বারো নানা রঙর খেলার প্রথা সম্মিলিত অইল উহানর যথার্থ সন্দেশ না পেয়ার।

‘দোল’ শব্দর উদ্ভব অছেতায় কালর গতিত পৃথিবীর প্রদক্ষিণ গতি পরিবর্তন (আয়ন গতি) ক্ষেত্রত পৃথিবীর দোলন কর্ত্ত। পৃথিবীর অবস্থানর পরিবর্তন ক্রিয়াই দোলন। বৈজ্ঞানিক তত্ত্বমতে পৃথিবীর অবস্থান বছরে দ্বিখকুম পরিবর্তন অর। এ দ্বিখকুমর অবস্থানরে উত্তরায়ণ বারো দক্ষিণায়ন বোলিয়ার। এ দোলন কর্ত্তর পরিচায়করূপে ভারতে উদ্ভব অছে দুহান মাত্র উৎসব। শ্রাবন মাহেস্ত পৌষ মাহ পেয়া সময়হানরে দক্ষিণায়ন। শ্রাবন মাহাত দোলন বা বুলন যাত্রা। মাঘ মাহেস্ত আষাঢ় মাহ পেয়া সময় হানরে উত্তরায়ন। ফাল্গুন মাহাত দোল যাত্রা। যাত্রা শব্দর অর্থ প্রাৰম্ভ বারো গতি অর্থবাচক। এ যাত্রা সূর্য বিষ্ণুর প্রভাব উৎক্রমনর পরিচক্কনা। সূর্যর তেজস্ক্রিয় জীকনী শক্তিৰ আধার। গতিকে বেদে সূর্যরে বিষ্ণু বোলেছি। কালক্রমে যুগান্তরে বিষ্ণুর প্রভাব শ্রীকৃষ্ণাং আরোপ অছে। এ কারণে সূর্য বিষ্ণুর প্রভাব পৃথিবীত সংক্রমনসূচক বুলন, দোলন আদি যাত্রা উৎসবর উপাস্য বারো নায়ক অয়লতায় শ্রীকৃষ্ণ। এ কারণে উৎসবে কৃষ্ণর বিগ্রহরে দোলনাত আরোহণ করানি অর। কালক্রমে সহজিয়া বৈষ্ণব ধর্মর ধারায় কৃষ্ণর বাঙ্গদে উপস্থাপনা করলাতায় হলদিনী শক্তি শ্রীরাধারে। কিন্তু প্রকৃতার্থত দোলনাত দোলন ক্রিয়া গতি বা পরিক্রমার সঙ্কেত। বুলন বা দোল শব্দ দোলন শব্দর অপভ্রংশ।

বসন্ত কালে ফাল্গুন মাহাত ঋতু উৎসবরূপে এ উৎসব প্রতিপাদিত অর এহানরে ফল্গু উৎসব বোলতারা। ফাল্গুনর ফল্গু উৎসব অনুসারে এ উৎসবরে ফাগু বা ফাকুরা বোলতারা। অন্যবেদে এ উৎসবে নানা রংর ফাকু ছিটিয়া রং তামাসা করানি অর আর এহানরে ফাকুরা বোলতারা। বসন্ত ঋতুর আরম্ভনিতে রক্তর গুরি উরেয়া ঋতু রঙর বিনোদন ক্রিয়াই এ উৎসবর বিশেষত্ব।

হোলি নাঙ উদ্ভবর ক্ষেত্রে কিংবদন্তি যে হোলিকা (হিরণ্যকশিপুৰ ভনক) নাঙর শিশু ভক্ষিকা রাক্ষসী আগ আছিলি। এ রাক্ষসীরে ফাল্গুনী পূর্ণিমাতে শ্রীকৃষ্ণই বধ করেছিল আর ফাল্গুনী পূর্ণিমাতে হোলি উৎসবর উৎপত্তি। রাক্ষসী হোলিকারে বধ করানির কারণে উৎসবর নাঙ হোলি। রাক্ষসী হোলিকার রকতে যমুনার

পারগ রাঙা অনার স্মৃতিহান থয়া হোলি উৎসবর রং তামাসার খেলা।

দোলোৎসবর আগের দিনর বহি উৎসব মেটাসুর বধর উৎসব। প্রবাদ অনুসারে মেটাসুর মেঘ বা ছাগ আকৃতি বিশিষ্ট। এ মেটাসুরে অন্তরীক্ষত থয়া সূর্য বিষ্ণুরে দোলনাত আরোহণ করাণিত অর্থাৎ সূর্যর উত্তরায়ন প্রবেশে বাধার সৃষ্টি। এ কারণে মেটাসুররে দন্ধ করিয়া বিষ্ণুরে দোলনাত আরোহণ করানিত পরিল। এ মেঘদাহরে বহি উৎসবর প্রকাশ।

মেঘদাহ বা বহি উৎসবরে বৈষ্ণব পন্থী বিষ্ণুপ্রিয়া মণিপুরীয়ে জর্ম বোলতারা। ফাল্গুনী পূর্ণিমাৰ দিনে গোড়ীয় বৈষ্ণব ধর্ম প্রচারক গৌরান্স বা চৈতন্যদেবর জরমর দিন বোলিয়া জন্ম বা জর্ম উৎসব পালন। এ কারণে হোলি উৎসবে গৌরান্সরে মহাপ্রভু বোলিয়া উচ্চারণ করতারা। অথচ ১৭ বিষ্ণুপ্রিয়া মণিপুরীয়ে শ্রীচৈতন্যর জরমর দিনেস্ত হোলি উৎসব পালন করতারা বোলিয়া ধারণা অর। বারো শ্রীকৃষ্ণর অবতার গৌরান্স অছে বোলিয়া অউ দিনে শ্রীকৃষ্ণর বিগ্রহ বা শালগ্রাম উপস্থাপন করতারা। কিন্তু অন্যান্য দেশে অন্যান্য বৈষ্ণব পন্থীয়ে বহি উৎসবরে গৌরান্সর জর্ম বোলিয়া পালন করাত না দেহিয়ার। বিষ্ণুপ্রিয়া মণিপুরী সমাজে যেসাদে শ্রীকৃষ্ণ বা শ্রীরাধার জন্মোষ্টমী পালন অর উসাদে গৌরান্স মহাপ্রভুর জন্মোৎসব পালন অয়তে না দেহিয়ার এহান আশ্চর্যজনক তথা সন্দেহজনক।

বিভিন্ন সূত্রর পর্যালোচনাক্রমে এহান সিদ্ধান্ত যে দোলোৎসব প্রকৃতপক্ষে পৃথিবীর অবস্থান পরিবর্তনর উৎসব। বৈদিক সূর্য বিষ্ণুর অয়নপথে পরিভ্রমণ তথা পৃথিবীর দোলনসূচক এ দোল উৎসব। মদনোৎসব বারো বসন্ত উৎসব যুক্ত অয়া এক সর্বভারতীয় উৎসবে পরিণত আসে বারো ভারতীয় সংস্কৃতির অবতারাী পুরুষ ভগবান শ্রীকৃষ্ণর লীলার লগে তিলয়া এক সার্বজনীন মহান উৎসবে পর্যবসিত অছে। ঋতুর রঙর প্রতীক স্বরূপে সময়োপযোগী রঙ আরিরর হোলি খেলা সমাবিষ্ট অয়া ভারতর এক জাতীয় উৎসব ধারণ অছে। এ উৎসবে হরু-ডাঙর, লেইরা-বরা সমায়িকভাবে একাকার অয়া এ উৎসব অপরেছেগা আজি মহামিলন তথা সমপ্রীতির উৎসব। ইতি -

‘ওম শুভমস্তু’



## নাটক বারহ আমি

সুখেন্দ্র কুমার সিংহ  
গুৱাহাটী

নাটক সম্পর্কে বিস্তৃতভাবে ঈকরাত গেলেগা ভপ জাগা বা পরিসরর দরকার। পরিসরহান কম থাকতে, নাটকর মূল বিষয়বস্তু বারহ আমার সমাজে নাটকর প্রভাব কিসাদে উহান সম্পর্কে আলোচনা খানি করানি অইল।

নাটকর উৎপত্তি বা জন্ম সম্পর্কে বহু গিরিগিথানীর মন্তব্য বিভিন্ন ধরনর। তবে নাটকর জন্ম গ্রীস দেশেত্ব আছে এহান বহু পণ্ডিত বগই মাতিয়া গেছিগা। কোনো কোনোগই মাত্তারা এলা নাছাত্ত নাটকর উৎপত্তি, কোনো কোনোগই মন্তারা এহান নাগই। সময় আহানাত গ্রীসদেশে মারুপ কতগই লপুকে ফাগি ফারাং করিয়া যারী দিতারাতা, উতার মাজে মারুপ অগাই খাল কৰেছিল যে এ দেহয়ার উহান অইলে আমার ফাগি এহান হাবিয়েও দেখলা-ছনলানায় বুলিয়া নংকরিয়া দশগোরে দেহয়াছিলাতা উপেত্বই নাটকর সৃষ্টি আছিল বুলিয়া মাত্তারা।

যেতাও অক নাটকর সৃষ্টি গ্রীস দেশে আছিল, বারহ গ্রীক নাট্যকার ঈচকিলাচ মিয়ামগায়া অগ্রণী নাট্যকার আগ। তাঁর জীবনে নববইহান নাটক ঈকরিয়া নাটকরে বহু উন্নতি করেদেছিল।

নাটক ঈকরাত গেলেগা নাটকর কতহান নিজস্ব ধর্ম আছে, উহানরে পালন নাকরলে, নাটকে নাট্যরূপহান নাপার বরং গদ্যরূপহে পার। নাটকর ও ধর্ম উতার মাজে সার্থক নাটক আহান ঈকরতে গেলেগা পইলা প্রথমে নাটক বারহ মানুর জীবনহান অঙ্গাঅঙ্গি যেমন পইসা আহানর এপিঠি হৌপিঠি। দ্বিতীয়ত নাটকরমা গতিবেগ লাগের তৃতীয়ত নাট্য উৎকর্ষা, চতুর্থত চরিত্র সৃষ্টি, পঞ্চমে সংলাপ, ষষ্ঠে সংঘাত এহানি থানা মিয়াম প্রয়োজনীয়, নাইলে নাটকে নাটকীয়তা নাথার।

বর্তমান যুগে নাটকর দৃষ্টিভঙ্গী আনেক উচ্ছে গিয়া ফৌবইলগা। তিন ধরণর নাটক যেমন কমেডি, ট্রেজেডি বারহ এবসার্ড নাটকর প্রযোজ্য মিয়াম। উতার মাজে সংলাপ প্রবন নাটকে বর্তমান যুগে ভপয়া চলের। সংলাপর মাধ্যমে ট্রেজেদি বা কমেডি প্রকাশ করেইতারা। আগে মাতানি অইল জাগার অভাবে নাটক সম্পর্কে বিস্তৃত আলোচনা সম্ভব নাইল।

আমার সমাজে নাটকর প্রভাব বহু পুরাতন। মাত্তে গেলেগা ঈগাল্পা বা ডাকুলায় সংকীর্তনে যে রসর সঞ্চার করতারা উহানেই নাটকর পইলা রূপহান। যে নাটকীয় ভাব ভঙ্গিলো আমি রসাস্বাদন করিয়া আশ্বত অয়ার, উহানেই নাটক। উসাদে করে নাটক আমার সমাজে পূর্বপুরুষেত্ব আয়া প্রতিষ্ঠা লাভ করেছে কিন্তুমান উহানরে। বা আমার সমাজ জীবনর গজে নাট্যরূপ দিয়া আমি বর্তমান যুগর অন্যান্য ভাষাভাষীয় নাটকর সমকক্ষ করে নুৱাৰেছি।

হারপানি মতে আমার ভাষাত পইলা প্রথম ফাগিয়ামর সৃষ্টি আছিল এবং ও ফাগিয়াম উতা সমাজে সমাদর পাছিল। কিন্তুমান নাট্যধর্মী ছিরিয়াচ একশন যুক্ত নাটক খুব কম প্রকাশ পাছে বা ষ্টেজ আছে। উতার মাজে কতহান লেংকরা প্রিন্টেট নাটক দেহিয়ার উতা বারহ নাটক বুলিয়া চিহ্নিত করানি মিয়াম চিলর। কিয়া বুললেতে সংক্ষেপে মাত্তে গেলেগা নাটকর যে যে উপাদান মিয়াম জরুরী, উহানর বিন্দুমাত্র ও আমার কতিপয় লেখকে অনুসরণ না করতারা যেহানরকা নাটকর স্তরে নেনা উহান সম্ভাবপর নার। মেরাক নাটকতে বামাবারনেই ভুল করতারা। যেমন ধরিক Serious Drama ত অন্যান্য উপাদানর মা Climax এহানরে গুরুত্ব দেনা লাগের, ও Climax আনতে গেলেগা বারহ আব্রোহণ বারহ অববোহন দুহানর গজে বিশেষ গুরুত্ব দেনা লাগের। কিন্তু বেশীৰ ভাগ আমার নাটকে এ উপাদান এতর অভাব থানায় সার্থক নাটক সৃষ্টি নাছে।

নাটকর plot আমার সমাজে কোনো অভাব নেই। সৃষ্টিশীল গতিলো নাটকর মূল ধর্ম-উহানিরে ঈলয়া লেংকরলে আমার সমাজে অপূর্ব নাটক সৃষ্টি অইতয়।

আমার সমাজেও শৈল্য উৎকৃষ্ট নাটকর সৃষ্টি অইতয় এ আশালো এ নাটকর সংক্ষিপ্ত আলোচনা এহান ইতি দেনা অইল। (লেখকর 'নাটকর কিতিকরম' নাঙে লেংকরা লেইরিক আহান অতি ত্বরা করে প্রকাশ অইতয়, তবে নামাকরণ পরিবর্তন অইতে পারে।)





## জীবন জিনার আরাক নাঙ

দৃষ্টিকোণ

-মারণিকা নাহেছি এ হোনার দেহেলা। 'জরম' অইলুৱে  
মহি আকদিন মরণ আহিতয়। কিন্তু মরাণিহান আকগয়ো না  
মনেইতারা। এহানেই ধুবসতোহান। জনম-মরণৰ হাদির সময়  
উহানিয়েই মনুষ্যৰ জিনার মাতামহান। জিনারমা জীবনৰ নুশিপা  
ৰূপ আহন থাৰ। ওঁৰূপ উহান ভোগ করানির আশায় মনুষ্য মরণ  
পাহবতারা। আশা, আকাঙ্ক্ষা, কামনা, বাসনা, লোভ, লালসা, প্রেম-  
প্রীতি, ভালবাসা জিনা এহানৰে নানা রঙে হাজেইয়া কামবন করিয়া  
হুলেৰ। ওঁ কামবন কিসাদে এড়া দিতায়। জীৱনৰ জিনাহান মরণেৰ  
ভোগৰ তাড়নায় অতিক্রম কৰেৰ। মরণহান পিঠিত পড়িয়া থাৰ।

মরলে মনুষ্য দেহাগ প্রাণহীন অয়া পড়িয়া থাৰ উপেয়  
মতিয়ার আয়ুহান ফুরেয়া মৰেছেতা। কততায় মাততারা চৌলগ  
ফুরাছে। যেকনাপায় মাততারা একশ আট পাপ পুরিয়া মৰেছেতা।  
কহুত মাততায় বিধির বিধান। বিধিতায় নিরালে যেহান ইকরেছে  
উহান অয়ত নাই। এতা হাবিতা আমার হাদির প্রচলিত কথা  
ভরাখাল।

জিনা এহান চলন্ত বস্তু। জীবন এহান আসুটা বস্তু।  
জিনাহানে যেবাকা জীবনৰে আচুলিয়া নেরগা উবাকা জিনার  
পরিশ্রম অর। আচুলতে আচুলতে জিনার কাকেই লড়ক-থড়ক  
অর। জিনাহান জিনার খানি বিধি-বিধান আছে। উহানি জীবনে  
তামকরাণি লাগেৰ। অভ্যাস করাণি লাগেৰ। জিনাহান  
পাংকালপারকা।

জীবন জিনার পথে মনুষ্য সৎ কৰ্ম, সৎ চিন্তা, সৎ  
অভ্যাস, সদানন্দ ঐয়া থা পারলেজিনাহান পাংকালপা অর। কু-  
কৰ্ম বাগিয়া সুকৰ্ম করাণি। কু-অভ্যাস বেলেয়া সু-অভ্যাস করাণি।  
অসৎ চিন্তা বেলেয়া সচিন্তা করিয়া। নিরানন্দ নায়া আনন্দিত থানা।  
এসাদে ভাবহানলো কৰ্ম করাণি লাগতয়। উতার পিছে কৰ্মৰ  
বিচার পিঠিত যেতা আছি তানু করতায়। জিনাহান নিজ বিচারে  
বখিয়া থনা নালাগেৰ।

সৃষ্টির মানস পুত্র মনুষ্য। তারো আমার জ্ঞানী গুণীজনে  
হতেছি-

“সৃষ্টির করেছে সৃষ্টি কৰ্মই সৃজন  
অজ্ঞানী জনেৰে দিল জ্ঞান ও জীবন।

কৰ্মজ্ঞানে সংসার কৰিছে বাখান  
কৰ্মই সৃষ্টি তার জীবন সমাধান।।

মরণৰে জয় করানিরকা জীবনৰে জিনার সাজেলে  
হাজেয়া থনারকাই কৰ্মৰ অভ্যাস করাণি লাগেৰ। কৰ্ম না কৰলেই  
জিনার ইতি পড়তয়। তারো শ্রীকৃষ্ণৰ গীতাত অৰ্জুনৰে মাতেছেতা-  
‘যুদ্ধ করতো বুলিয়া আয়া যুদ্ধ না করাণি উহান পাপহান। তি  
তোৰেল খালকর। তি কিসাদে জিংতা ঐতেয়, তি নিজৰে কিসাদে  
প্রতিষ্ঠা কৰতেই, উহানে তোর কৰ্ম। তোর জীবন জিনার পথে  
বাঁধা-বিপত্তি আহেছে এতা জিঙানি তোর কৰ্ম। একৰ্ম এহানেই  
তোর যুদ্ধহান। কুংগ মরতায়, কুংগ জিংতা ঐতায়, আপা-বপা,  
দাদা-খুড়া, বন্ধু-কুটুম্ব এতা তোর খাল করিল কথা নাগে। বাধা  
হাবি দূৰেই কর। জিনাহান জি। আত্মা এগ অশরীরি। তা দেহাগ না  
পালৈলে সৃষ্টি কৰে নুয়াবের। তোর আত্মাগো তোর দেহাগে থাইতে  
যেতা পারিলতা কর। শক্ৰয়ে দেহাগো কাপিয়া বেললে আত্মাগো  
বেলেয়া জিঠেগা। আত্মাগো নেয়ইলে, দেহাগো নিষ্কৰ্ম্ম পড়িয়া  
থায়তয়। আত্মা এগয় নিষ্কৰ্ম্ম দেহাগ আলীপার। নিষ্কৰ্ম্ম দেহাগ  
এরাদিয়া আরাক কৰ্মম দেহা আগত হমেয়তয়গা। ওঁ দেহাগ ধরিয়া  
তা অন্য কৰ্ম কৰতে। তোর দেহালো তোর আত্মাগৰে কিয়া কৰ্ম  
করাণি নাদরতা। এহান পাপহান। তারো কৰ্ম কর। এবাকা এ রণ  
ভূমিত তোর আত্মাগৰ কৰ্ম যুদ্ধ অছেতাই যুদ্ধ। তারো যুদ্ধ করাণি  
দে। যুদ্ধ কর। তোৰে বাছেয়া থনার তার সময়নেই। কৰ্মে বাঁতশদ্ধ  
নাই। কৰ্মহানৰে ধৰ্ম বুলিয়া কৰ্ম কৰে যাগা। জীবন তার জিনাহান  
জিয়ক।

বেদ-বেদান্ত, পুরাণ এতা মানুয়ে সৃষ্টিকৰেছিতা, রচেছিতা  
মানুৰে জীবন জিনাহান বাগাদেনিরকা। পৃথিবী এহান মনুষ্যৰ জিনার  
স্থলহান। ভোগময় পৃথিবী এহান কৰ্মছাড়া ভোগ করানি নার। এ  
ভোগ্য পৃথিবীবান কিসাদে ভোগ করাণি উহান কৰ্ময় বাগা দিতয়।

মনুষ্য দেহাগ পানার আগে আমি হার না পাছি পৃথিবীহান  
কিহান, সৃষ্টিহান কিহান। জরম-ঐয়া হারপাছি সৃষ্টি বারো পৃথিবী।  
ভুলোক, গোলোক। তারো জিনাহানৰে সার্থক করাণির কা কৰ্ম  
করাণি থক। কৰ্মৰ সাধনা করাণি থক। প্রতিষ্ঠার সাধনা করাণি  
থক। জীবনে প্রতিষ্ঠা না পেইলে, জিনার রূপ-রস-শব্দ-গন্ধ, স্পর্শ,

সৃষ্টি হাবিতাউ মিছা। জিনাহান উপেয়েই লময়তায়।

জীবন এহান বাস্তবহান। জিনারকা মনুষ্য বাস্তববাদী অনা থক কল্পনালো নিষ্কর্ম পড়িয়া থাইলে জীবন হান মূল্যহীন অয়তয়। কল্পনারে রঙে-রূপে-স্বাদে-গন্ধে-বরণে বাস্তবায়িত করে পারলেই জীবনের আনন্দ পেইতে নাই জিনার হাতাপে। তারো কর্ম করাণি থক।

ভগবান শ্রীকৃষ্ণ আমারে আমি চিন্তা করে নুয়ারিয়ার কর্মজ্ঞান দিয়া গেছেগা। তাঁ আমারে কর্মচিন্তালো বাঁখিয়া না থখে। সদাসৎ কর্ম বিচারে কালক্ষয় করাণি জীব-ধর্ম নাগৈ বুলেছে। মুণ্ড-পিঠি চিন্তালো মনুষ্য কর্মবদ্ধ অয়তারা। তারো মাতেছে - কর্মকরে যাগা। হবা শান্তি তের বিচার নাগৈ। কর্ম করলে আহনতে আরাক আগরতা হবা নাইতে পারে। উহানে তি কর্ম না করতেয়তা। আমিতে সৎকর্ম-কর্ম সদাসৎ চিন্তা করাণিরকা মাতিয়ার। কিন্তু সদাসৎ কর্ম নেই। হাবিয়েই কর্ম। কর্মই না করলে, কুংহান পাপ কর্ম কুংহান ধর্ম কর্ম কিসাদে হারপেয়তে। শাস্ত্রলো মিয়াম চিন্তা করলে কোন কর্ম করে নুয়ারতেই। তবে, পাপ-পুণ্য ধর্মধর্ম খাল করিয়া কর্ম করে পারলে হবা। কিন্তু খালকরে নুয়াররে উগোয় কিহান করতৈ। কর্ম না করতেয়তা। কর্ম না করলে তা কিসাদে জীবনহান জিনা পারতৈ? কর্মবীর, কর্মজ্ঞানী উতায় হুদা পৃথিবীহান বোণ করতায়তা নাগয়। পৃথিবীত জরম এলে হাবিরো

ভোগর অধিকার আছে। হবা অয়া নায়লে শান্তি অয়া।

হায় তবে, মনুষ্য দেহাগো পেয়া জিনারকা কর্ম করতোগা কর্মর ধারা কর্মর রীতিনীতি খানি আছে। যেমন লু কর্ম, সিল কর্ম, পাতল কর্ম, ভরি কর্ম। উতা অবশ্যে সাধন করিয়া অভ্যাস করিয়া করাণি থক। উতা এলে কর্মবীর, কর্মজ্ঞানী অয়া জীবন জিনাহান পরিপূর্ণ সুখদায়ক বারো আনন্দময় অর। নিষ্ঠালো শৃঙ্খলাবদ্ধ কর্ম করলে জীবন জিনা পরিপাটি অর। জিনার নুংশিপা মেহেক আহের।

জিনাহান নুংশিপা, হারো-পিয়মলো ভরপুর নায়লেউ জরম অয়লুরে মাহিতে জীবন হান জিনাতে লাগতয়। তারো যেকোন কর্ম আহনতে করাণি লাগতয়। নাইলে নিষ্কর্ম দেহাগো বেলেয়া আত্মাগ যিতয়গা। জরা-ব্যাধি, অনাহার, অপুষ্টি, বাঁদা-বিপত্তি, আপদ-বিপদ অয়া অকালে জীবন হান জুরতৈ। জিনা নাইতয়। আমি -

- জন্মিলে মরিতে হবে অমর কে কোথা বরে

চিরস্থির করে নির হায়রে জীবন নদে। বুলিয়া নাইল জনমহানর দোষ ভগবানরাং পিদ দিয়া, 'জন্ম-মৃত্যু বিধির বিধা', 'হাবিতায় ভাগ্য না' বুলতে বুলতে পৃথিবীর বুকুহানান্ত মেমুত অয়া যিতাজিগা।



রীতি-রীতি বিদ্যা-কিনয় উন্নতির দোয়ার।  
প্রিয় পাত্র ঐজারাত মন চাখেল যেতার।।

## নিংশিংঘাটের যারি

শ্রীসুখজ্যোতি সিংহ

আজিও প্রায় স্বর্ণযুগ আহানর আগর কথা এবাকাও  
অইয়া নিংশিং অউরি।

মি উবাকা হাইলাকান্দি গার্লস স্কুল, এবাকার  
ইন্সকুমারী গার্লস স্কুলর সহকারী হেড মাস্টারনীং। এ স্কুল  
এগুন্ত পয়লা মি ডেপুটেশন পেইয়া গৌহাটী বিশ্ববিদ্যালয়ে বি,  
টি, তামকরাত আহেছুতা। বি, টি, ক্রাশে যোগ দিতে দ্বিমা আহান  
ছিল পরলুগা। ক্রাশ আরম্ভ অছেতাই মাৰ্চে মি যোগ দিলুতাই  
এপ্রিলের শেষে, কারণ মোর পরামারাধ্য পিতৃদেব রায়সাহেব  
এ, চৌধুরী সিংহ গিরক ১৫ মার্চ ১৯৫৪ ইংরাজীত দৌর খয়া  
পেইলগা হানতে স্বাভাবিকতে শ্রাদ্ধ কর্ম হাবি লইকরিয়া আইতে  
সমর লাগিল। যেতাও অক মোটামোটি ক্রাশ করিয়া তিনমাহা  
আহান গেলগা কিন্তু কিতা পাকরেইতারাতা উতা কিতাও হার  
নাপাউরি হুদা মি হার নাপাউরি বুলিয়া মনেইতেতে মোর সহ  
পাটিনি আগ শ্রীমতি পুণ্য হাজরিকা বুলিয়া নর্থ লক্ষীমপুর  
গার্লস হাইস্কুলর শিক্ষিকাগ তেইও সরকারী ডেপুটেশনে বি,  
টি, তামকরাত আহেছেগ তেইও মাতিরি দিদি বাছ, প্রফেসর  
এতাই কিতা বাগা দিতারা এতা কিতাও হার নাপাউরিতাতে।  
এবাকা খালকরলাং কি উপায় করানি? ভাবিয়া চিন্তিয়া ঠিক  
করলাং Psychologyর প্রফেসর বি, ছি, করর লগে দেহা  
করিয়া আমার অবস্থাহান জানেইয়া মাতিক বার আমারে এ  
হেইনিং এহানাত রেহাই দেনার ব্যবস্থা করানিরকা হেইচা  
করিক। এহান সিদ্ধান্ত করিয়া স্যাররাং গেলাংগা দ্বিয়গই।  
গিরকে আমারে দেহিয়া ড্রইংক্রমগত বনা দিয়া আমারে  
আংকরল - কিয়াকাথাং গিথানক গাছি মোর ঘর  
কৌঅইলায়াতা? উবাকা আমি লাজ-কাজ এরা দিয়া মাতলাং  
স্যার আপনাগাছিয়ে ক্রাশে কিতা বাগা দেরাই উতা কিতাও  
হার নাপেয়ার, তার নির্ধাং ফেইল করাত পরেছি। ইমে ছাত্র-  
ছাত্রী অইলাং অইছতে কিতাও নেই - ফেইল করিক কিন্তু  
অমিতে স্কুল আগেইগর শিক্ষয়িত্রীগি আহেছিতা হানতে আমি  
ফেইল করলে ছাত্রীর মুণ্ডে মেইথং দেখয়েতৌঙইতা কিসাদে?  
মি মাতলু মোর জেলাছৌগ বছর আহানাও নাছে উগরে  
বেলেয়া আইয়া মিও হিনপাওরি ছৌগও হিনপেয়রী। পুণ্যও  
মতিরী 'মোর বুড়া মালক বাপকরে এরা দিয়া আহেছু - তনুরে

চাকুরা নেই হানতে আমারে এরে ডেপুটেশন এহানাত এরা  
দেনারকা হুকুমদে স্যার।' কথা মাতলাং এতা আকখানো  
মিছাহান নাগই। মিতে পনর দিন গেলেগাই অস্থির অইয়া  
জেলাছৌ উগবকা ছুটীয়া হাইলাকান্দি য়াওরিগা। জেঠা  
মুনিছৌ উগতে তিন বছর কিতা অছে হানতে তারকা চিন্তা  
নাকরোরি।

যেতাও অক প্রফেসর কর স্যারে মাতের 'না-না হিন  
নাপেইয়ো কিতাও নেই হাবি হার পেইতারাইতা? কিতাও কঠিন  
নেই, কিয়াকা ফেইল করতারাইতা?' এতা কিতা মাতিয়া  
বুজেইয়া আমারে চা পানী কিতা খয়েইয়া বিদায় করল। কিতা  
করতাং দ্বিয়গই দ্বিয়গর মেইথং চেইয়া আলইয়া আইলাং।  
আমার দুশ্চিন্তা নিয়াম অইতে থাইল। প্রফেসর ডি, দাসগুপ্ত  
বুলিয়া প্রফেসর আগ আছিল, তা বার তার note ওতা  
আকমুরেদে dictate করে উতা ইমে ইকরিয়া ছালছি।  
Ross, Nun কিতা কিতা লেখকর বই লনারকা মাতল,  
উতাও লইলাং। শিক্ষা বিভাগে বই লনারকা 'কিতাপ ঘর বুলিয়া  
বইর দোকান আগরে হুকুম দেছি - উতাই আমারে বই  
যোগেইলা। কিন্তু যোগেইয়াতে কিতা অইব - ক্রাশে  
তামকরয়েতে এ বই আহানর অধ্যায় আহান তামকরয়েইতারাতা  
- বার ফালদিয়া আরাক বই আহানর অধ্যায় আহান বাগা  
দিতারা। মহা যাতনাত পরলাং। এসাদে অবস্থাত গরমর বন্ধ  
আহিয়া পড়িল - বন্ধ উহানাত বার প্রশ্ন কতহান উত্তর লেখিয়া  
আনানিরকা কর স্যারেও দিল, দাসগুপ্ত স্যারে ও দিল -  
বজ্রপাত অইলনায়। গ্রীষ্মর বন্ধত দুশ্চিন্তাল ঘরেদে ছালইলাং।

মহা আহানর মাজে প্রশ্নর উত্তরহানি ইকরানি লাগতই  
হানতে বিষয় আহানরে কতহান বই তামকরিয়া এ বই এহানর  
লাই আহান হেরে বই আহানর লাইন দুহান তুলে তুলে প্রশ্নর  
উত্তর আহান খারা করলু। পিসেদে দেহরিতা বিষয় উহান খানি  
সহজ অ পরিলগা। ছুটীত আলয়া আইয়া ক্রাশ attend করতে  
দেহরিতা বাচ্চা হারপাওরি। উবাকা খানি মনহানাত বিশ্বাস  
আহান আহিল - না বি.টি, হান পাশ করে পারতৌ বুলিয়া।

কিন্তু এহানও ভাগ্যত নেইঅউল - বি, টির ক্রাশ  
পুরা করে নুয়ারতৌ - অবশ্যে উহান অনাগত সৌভাগ্যরকা।



বড়দিনৰ বন্ধ হাইলাকান্দিত কাটেয়া গৌহাটীত আইয়া ফোঁইতেই appointment letter আহান Community Development Deptt.ত, আহিয়া উপস্থিত। কোন যুগে ১৯৫২ খৃষ্টাব্দে A.P.S.C., interview আহান দিয়া থছিলুতা - উহানৰ ফল ১৯৫৫ ইংৰাজীত আইয়া মোৰে Community Project এ Chief Social Education Officer বুলিয়া গেজেটেউ পোষ্ট আহানাত নিযুক্তি দিয়া পাঠাছি। বেতনৰ স্কেলহান অইলতাই ২৫০-৬০০ টাকা পেইয়া। নিযুক্তিপত্ৰ এহান পেইয়াতে বিবুদ্ধি অইলু - কুৰাংকান সৰুপাথান, গোলাঘাট প্ৰজেক্টৰ হেড কোয়াৰ্টাৰে। নাঙ ও না ছনেছু ফাম উহানৰ। যেতাও অক হাইলাকান্দিত ফোন কৰলু মোৰ স্বামী শ্ৰী কৃষ্ণ সিংহৰাং - মোৰ চাকৰীৰ খবৰহান দিলু। তা মাতল - 'হাইদে মি কালি ফোন কৰতো, কিহান কৰানি ভাবিয়া চেইতো। মাতল উসাদে পিছেকার দিন ফোন কৰিয়া মাতল যে তার ভাগিনাক রাখাকান্ত, দশম শ্ৰেণীত পাকৰেৰ উগৰে দিয়া পেঠা দিতউ গৌহাটীত মোৰে সৰুপাথানে নিয়া যানারকা। সেপহান চেইয়া দেহেছে সৰুপাথান এহান তিনসুকীয়া রেল লাইনৰ গজে বার যোরহাটেত্ত নিয়াম দুৰেই নেই। মনেইলে যোরহাটে তার বিনক ভীমসেন রাজকুমারৰ ঘৰেও ছুটি ছাটাত গিয়া পারতোগা। যেতাও অক হারপেইলু যে গিরকে মি কম্যুনিটি প্ৰজেক্টৰ C.S.E.O. পোষ্ট উহানাত যোগ দেনা হান মনান।

গতিকে মানু আগৰ রাখাপুৱান যে টুপী আৰি লাগে উতা লইলু। বেতন বাস্কেট আগও রূপা নৌহান দিয়া লইলু, বেতন বাস্কেট আগও লইলু বি,টিৰ বই উহানি নেনারকা। মনে মনে আশাহানতে থাইলতা বি,টি, পরীক্ষা দিতো, বি,টি, ডিগ্রীহান লইতো। পিছেদে বাস্কেট পেটোৱা বেডিং হাকিতাত নাঙাহনৰ লেবেল লাইগেইলু।

রাখাকান্ত দ্বিদিনৰ মাঝে আইয়া ফোঁঅইলগা। তারেল রেলগাড়ীল গৌহাটীত সৰুপাথান ছালইলু। রেল এহানতে সোজা তিনসুকীয়া যারগা হানতে লামডিংএ গাড়ী বদলানি না লাগিল। পিছেকার দিন বিয়ানে দশটার মাপা উহানাত সৰুপাথান ষ্টেশনে গাড়ীহান ফোঁঅইলগা। ষ্টেশন উগৰ উবেদে চেইতেতে দেখৰি রাঙা টিনৰ ঘিচালা ঘৰ আগ আধাহান উদালা, বের-গোর নেই। উহান যাত্ৰীৰ waiting roomগ পাউরি। বার আধাহান বাহাৰ বেরাৰ ঘৰগ, দুয়াৰ খিৰকীও আছে। উগত ষ্টেশন মাষ্টাৰগ তার যন্ত্ৰপাতিল বহেছে। ষ্টেশন উগৰ কাদা

বারাদে জঙ্গলহান আছে। জঙ্গল উহান দেহিয়াতে খালকরলু 'বাবারো, জঙ্গল এহানাততে নাইতই, গাড়ীহানাত কাইয়া যোরহাটে যানাই বালা অইতই বুলিয়া খালকরিয়া গাড়ীহানাত কাইংগা বুলিয়া ভাগিনাক উগৰে মাল উহানি গাড়ীহানাত কাকৰ বুলানিয়ে গাড়ীহান এরাই দিয়া বেলল। হুকাং ষ্টেশনগ নাই - গাড়ীহান নিয়ামপারা না থামের। এবাকাতে কিহান কৰানি? কাঁদানি আহিলপারা।

সৰুপাথান ষ্টেশন এগত মানু নিয়াম উঠা নামা নেই। Community Project আগ বহেছে বুলিয়া ষ্টেশন আগ বহাছিতা।

দেখতে দেখতে ষ্টেশনগ খালি অ পড়িলগা। থাইলাংতাই মিয়ে রাখাকান্তই বার আৱাকও মানু আগ হুদা এবেদেত্ত উবেদে আটের। কতহান থাইয়া মানু উগই ইংৰাজীল মোৰ ভাগিনাক উগৰে আংকরল - 'তুমি, গৌহাটীত আহরাইতা, মিসেস সিংহ আহেছেতা?' হাই বুলানিয়ে আধা বয়সী মানু উগই মোৰে নমস্কাৰ দিয়া তার পরিচয়হান সৰুপাথান কম্যুনিটি প্ৰজেক্টৰ অভাৱসিয়ার প্ৰতাপ হাজৰিকা বুলিয়া মাতল। তার লগে পিকআপ ভান আহান আনেছে উহানাত কাইয়া দেডমাইল দুৰেইত প্ৰজেক্টৰ হেডকোয়াৰ্টাৰে গিয়া উপস্থিত অইলাংগা। গাড়ীহানাত নামিয়াই মিঃ হাজৰিকাই পাঁচগ আহান যুবকৰ লগে পরিচয় কৰে দিল। এগ মিঃ বৰুয়া, এগ মিঃ ভূইঞা, এগ মিঃ ভাটনাগৰ, এগ মিঃ বৰুয়া ইত্যাদি ইত্যাদি। হাবিগী গেজেটেড্ অফিসাৰ। তানুৰে পরিচয় কৰে দেনাই হাকিয়ে হাত ডিগল কৰিয়া কৰমর্দন কৰানি মনেইতারা, মোৰতা কানমুৰ গরম অপৰিলগা - কোনরকম নমস্কাৰ আহান দিলু হাকিয়ে। এবাকার ২৪/২৫ বছৰৰ নিংলপী আকেইগই জামা পিদিয়া 'খুকী' অইয়া আইতারা বয়স উহানাত মি দুগৰ মালকগ অইয়া এরে যুবক এগির মুঙে পরিয়া ডৰহানে মরলু না, চাকুরী কৰে নুয়ারতো এতার হাদিত বুলিয়া খালকরলু। যাই হোক কোন রকম প্ৰজেক্টৰ চাকৰীহান প্ৰায় দ্বিবছৰ করলু। এ বছৰ এহানিতে যে কতরকম অভিজ্ঞতা ঘাত প্রতিঘাততর মাজেদে কাটিয়া গেলগা উহান সুযোগ সুবিধা মতে জানেইতো।

আগেদে বি,টি, তামকরতে প্ৰজেক্টৰ মুখ্য সামাজিক শিক্ষা বিষয়াৰ চাকৰীহান পেইয়া আহেছিলু বুলিয়া উল্লেখ কৰেছিলু উহান যে হেতু 'ডেপুটেশন' হানাত আহেছিলু হানতে উহান না করলে যতহান রূপা মি সরকারাংত লছিলু উহানি আলকৰে দেনা লাগতই তার বি,টি, পরীক্ষাহান দেনাত

লেপইলু। কিন্তু লেপইলেউ না চলতই নাই পরীক্ষাতে বনার অনুমতি ও পানা লাগতই। কিন্তু মি অনুমতি পানার পক্ষে অন্তরায় অয়ল কারণ বি.টি.র course হানি না লমকরিয়া আইলু হানতে পরীক্ষাত বনার অনুমতি নাদতারা। উপায় পথ নাপেয়া ডাঃ বিরিঞ্চি বরুয়ারে, উবাকা বিশ্ববিদ্যালয়ের ক্লাশর সেক্রেটারী আছিল, নিয়াম কাকুতি মিনতি করিয়া চিঠি আহান ইকরলু উহানাত গিরকে মোরে দয়া করিয়া পরীক্ষাত বনার অনুমতি দিল।

পরীক্ষাত বনার অনুমতিতে পেইলু কিন্তু সুপতে না পাকরেছু হানতে কিতা পরীক্ষা দিতু। যেদিনেত্ত প্রজেক্টে হমেইলু দিনেত্ত গাঙে গাঙে বুলে বুলে, কতহান হাটিয়া কতহান জীপল গিয়া তিন মাহা আহান কাটেইলু হানতে বইহান মেলানির সময় নাপেইলু। যেতাও অক বুলিয়া ইমা সরস্বতীয়ে নিংশিং অইয়া সরুপাথারেত্ত গৌহাটিত রেলর প্রথম শ্রেণীর কোঠা আগত উঠিয়া ছালইলু। নিজর পয়সাল রেলর টিকেট করিয়া যদিও আউরি, ছুটীত আছরি হানতে, মতলবহান অইলতাই রাতি রাতি রেলহানাত লেরিক পাকরিয়া আইতও কিন্তু বিধাতায় নাদলে মানুয়ে কিতা করে পারিয়ারতা? কোঠা উগত চারিহান বনা গুমজানির বার্থ - গজে আহান তলে আহান। হানতে মোর সিটহানর তলে পরেছে, যদিও ভদ্রলোক আগ বইয়া খানি খানি থাইয়াও স্টেশন আকেইগত নামিয়া মদর বোতল আগ আনের। হানতে ডরেইয়া হেরে তলর সীট উহানাত মুরেগারে ঘুরিয়া গুনজেসে ভদ্রলোক উগরে উঠেইয়া মাতলু মোর লগর মানু এগরে তার গজর সীটহানাত যানারকা খানি মাতেদেনে, রাতি ১২টা বাজিল নাই বুলতে বুজন উগই 'মি কিতা করতু' বুলিয়া বারা বুলন দিয়া গুমজিয়া থাইল। এসাদে মদ পিয়েকুরা মানুর লগে না গেছুগাহানতে ডর এহানে পারা মানু উগরে তেরা তেরাদে চেইয়া থাইলু - মোরে কিন্তা করতইতানা কিতা বুলিয়া। যাই হোক সাহস সঞ্চয় করিয়া মানু উগরে মাতলু রাতি ১২টা বাজিল মোর সীটহান এরাদে। অ হাই হাই বুলিয়া গজে কাইলগা উবাকা নিংশা হান বেললু। গজে কানাই মানু এগতে ছয়গর পারা অইয়া রহাত লাগিল। উচ্চুম করে হাত আকখনর গজে কুন্তুকর্ণ পারা অইয়া গুমজিয়া কাটেইল। এতা কুমেই এতা চেইয়া না ঘুম অইল, না পাকরে পারলু। বিধির বিধান না যায় খণ্ডন।

ছাত্রীবাড়ী খৃষ্টান হোষ্টেলে মোর আগর সীটহানাত আইয়া উপস্থিত অইলু। মোর সহপাঠী হাজরিকাই মোরে পেইয়া

হারৌ অইল। তেইতে রাতিয়ে দিনে বেজান পাকরানিত লাগেছে মাত্র ২/৩ দিন পরীক্ষা বাকী। মিও পাকরানি অকরলু হানতে কুরাংকার ঘুম আহানে বেজান বেরা করের। ঘুমহানরও দোষ নেই। এহান মাতৃহর অভিব্যক্তিহান। মোর তৃতীয় সন্তানর আগমন বার্তাহান। যাই হোক উতা কিতা অসুবিধার ভিতরেদে পরীক্ষা দেনা অকরলু কিন্তু বাস্তব (Practical) হানাততে ঠেকে পরলুগা। মোর বিশেষ বিষয়হান আছিলতাই ভূগোল। ভূগোলর বাস্তব পরীক্ষাহানাত পাঁচহান আংকরলে তিনহান পারুরী, না হয় দুহান পারুরি - বাকীহানি sorry বুলিয়া কাটাউরি। পিছেদেতে দীঘল প্রশ্ন আংকরাত লাগলা - বিশেষ করে মি Community Projectএ চাকুরী করুরী বুলানিয়ে 'হা জঙ্গলহানাততে তি কিসাদে বেয়াপাগই চাকুরী করৌরিতা - বাঘ, ভালুক ডর নাপাউরিতা, কতি ডাঙর ডাঙর গাছ আছেতা, কতি মূল্যবান গাছ আছেতা' ইত্যাদি ইত্যাদি। এহানাত মি সুযোগ পেইয়া নানান রঙ চরেইয়া মাতিয়া তানুরে মাত করে দিলু। যা পিছেদে যেতা অইলতা অইতই। পরীক্ষা দিয়া আলইয়া কর্মক্ষেত্র নামবর জঙ্গলেদে গেলুগা। তিনমাহা পিছেদে পরীক্ষার ফল নিকুলিল উবাকা Assam Tribune এ মোর নাঙহান পাশ করেছি উতার লিষ্টর মাঝা মাঝি জাগাত আছে। বিশ্বাস নাকরলু অনেক সময় ভুল করিয়া ছাপেইতারা পিছেকার দিন বার ভুল অইল বুলিয়া ও ভুল উহান খণ্ডন করতারা। আরকও নিয়াম সন্দেহ অইল কারণ হানতে শ্রীমতি বরা বুলিয়া গোলাঘাট বালিকা বিদ্যালয়র শিক্ষিকা আগর নাং নেই পাশর লিষ্টিত অথচ তেইরে বিশ্ববিদ্যালয়র হাবিয়ে 1st class পেইতই বুলিয়া খাতির করলা। কিহান অইল নাজানু - শ্রীমতি বরার নাঙহান বাদ পড়িল অথচ মোর ছাদে ছাত্রী আগর পাশর সুপও আশা নেই উগর নাঙহান পত্রিকাত দেছি। যাই হোক গৌহাটী বিশ্ববিদ্যালয়ে চাকুরী করল শ্রী ধরনী দাস বুলিয়া আমার বন্ধু ব্যক্তি আগই মোরে অভিনন্দন দিয়া তার আহান দিল উবাকা বিশ্বাস করলু - হাই মি পাশ করেছুহান আছে।

তার কতদিন পিছেদে সহকর্মী হাবিরে বান্দারা আহান খওয়েইয়া মাতৃহর ছুটীত হইলাকান্দিত আইলু।

মোর ব্যক্তিগত কথার অবতারণা করলু কারণহান মোর বেয়াপারে বুজানি মনাউরি যে লেইরিক পাকরানির কোন বয়স নেই আর তামকরানি মনেইলে কোন বাধাই বাধা নাগই - ভগবানে সহায় করের মা সরস্বতীয়ে কৃপা করিরি।



## ভাগ্যবতী

‘মিৎলাউবা’

ক্ৰেইমেণ্ট নোটিশহান পেইয়া ‘লীড-লাইফ’ মোটর ইন্সিউরেন্স কোম্পানী ফাফরে পড়্‌লা। আহিয়েদে দিনে মাদানে জিন্ জিনি দেখ্‌লা। গেল্‌গা মাহাতেই তিনহান্ এক্সিডেন্টর ক্ৰেইম রূপা পন্দর লাখ দিয়া মুর তুল্‌তে না তুল্‌তে বারো এমাহাং রূপা সাড়ে পাঁচলাখর নোটিশ হান্। এসাদে ঐলেতে কোম্পানীগ লাটে কাইতে মিয়াম দিন নাইতে।

কোম্পানীর বোর্ড অব্ ডিরেকটরসর কার্যকরী কমিটির আপৎকালীন বৈঠক হান্ ডাক্‌লা। ডাহিয়া সিদ্ধান্ত নিলাগা - কেইস্ এহান্ প্রাইভেট গোয়েন্দার আতে তদন্তকা দেনা বারো ডাঙড় উকিল আগো আঠেপা দেনা।

ওঁমতে প্রখ্যাত প্রাইভেট গোয়েন্দা রজত বরণ চৌধুরীয়ে তদন্তর ভারহান দিলা। এক্সিডেন্ট ট্রিবিউন্যালর নাঙফিটা, উকিল তারিণী চরণ ভট্টাচার্য্যে কেইসহান্ ট্রিবিউন্যালে লড়ানির কা লৈলা।

রজত বরণ চৌধুরী নোটিশহান্ পাকরিয়া দেখ্‌ল - রফিক আহমেদ বুলিয়া বুড়া আগ সিটিবাসর খেঙনাত জখম ঐয়া নয়গাও সিভিল হাসপাতালে মরেছে, উগরকা রূপা দ্বি-লাখ, বাস হানর ড্রাইভার মন্টু সরকার, হেণ্ডিমেন মানিক সরকার, বারো আরাক আটগ সিটিবাসহানর প্যাসেঞ্জারর চিকিৎসার খরচ বারো ক্ষয়-ক্ষতিরকা জনে আককুড়ি লিশিং করে দ্বি-লাখ, সিটিবাসহান মেরামতির কা ‘লীড-লাইফ’ মটর ইন্সিউরেন্স কোম্পানীর নিজস্ব সারভেয়ার কণিকা দাসর ডেমেজ-রিপোর্টর ক্ৰেইম রূপা লাখ আহানে পঞ্চাশ হাজার। মোট সাড়ে পাঁচ লাখ। রজত বরণে মনে মনে খালকরল - বাসহানর ভাগ্যবতী নাঙহান্ অতি চুনা আছে। সহকর্মী মানুসিংরে মাতলো -

- কেইস্ হান্ আইব কালী কোর্টে কাইতে। মানু, ভাগ্যবতী সিটিবাচর মালিক - ভাগ্যবান মোঃ আকবর আলী সেখরে দর্শন পেইয়া আহিক্‌গা কেনাই। মানু সিংয়ে ‘হাই দাদা, যিক্‌গা’ বুলিয়া ছালৈল।

রজত বরণ চৌধুরী মানুসিংরেলো, সিটি বাসহানর মালিক মোঃ আকবর আলী সেখর ঘরে গৌরীপুরে গেল্‌গা।

হৌনাবী-পর্বর হমারহা লনা-দেনা লৈ করিয়া রজত বরণ চৌধুরীয়ে আকবর আলীয়ে আংকরল -

- রজত বরণ : হাইদে সেখ সাহেব, আপনে রামপুরেৎত কুম্বাকা গৌরীপুরে আইয়া ঘর-দোয়ার হংকরিয়া আছি।
- আকবর : প্রায় ১১/১২ বছর ঐল।
- রজত বরণ : আপনার বেইবুনি, খুরতাক, জেরতাকর ছৌ-জিপুত এবাকাউ রামপুরে আছি, না।
- আকবর : হাই, আছি। মোর সায়-সম্পত্তি হাবি রামপুরে আছে।
- রজত বরণ : আপনার পিতৃ - সম্পত্তি রামপুরে কুংগয়তে দেহা-হোনা করের।
- আকবর : মোর জরম বেয়কর পুতক রফিক আহমেদে চা-চিটা করের। তারে মাহে মাহে বেতন বাবদ রূপা ছয়হৌ পাৰা দেউরী।
- রজত বরণ : রফিক আহমেদেতে জয়নগর বাজারে সিটিবাস এক্সিডেন্টে মরেছে বলেছিগে।
- আকবর : অঃ হাইয়ে’। বুলিয়া পাঙেয়া থাইল।
- রজত বরণ চৌধুরী ‘আজি উঠিং, আরাক আক্‌দিন আইতো’ বুলিয়া মানুসিংরেলো উঠিল।
- মোঃ আকবর আলী সেখর ঘরর গেইটহান্ লালৈতে পথে লেংড়া বুড়া আগরে দেহিয়া মানু সিংয়ে রজত বরণরে মাতলো -
- মানুসিং : দাদা ! এরে তক্কি আলা, ধলা দাড়িওয়ালা, লেংড়া বুড়াএগ রফিক আহমেদ অ থাইব। আঙকরতু ?
- রজত বরণ : আংকর। আরাক কতবছর গেলেগা তিহৌ ডিটেক্‌টিভগ ঐতেই। গুড্ গোয়িং, কিপ ইট্ আপ্। বুলিয়া খৌতাল্ দিল।



মানুসিংয়ে বুড়াউগরে ডাহিয়া আঙকরিয়া হারপেইল- বুড়া-লেংড়াগ, মোঃ আকবর আলীর বেয়কর পুতক রফিক আহমেদ রামপুরে থার। আজি তিন মাহা ঐল তারে খুরতাকে গৌরীপুরে ঘরে আনিয়া থেছেতা। আরতাউ হারপেইল রফিক আহমেদরে ড্রাইভার মনটু সরকারে জবর বানা পার। মনটু সরকার রামপুরে ঘরে থার।

পিছেকার দিনে রামপুরে যানা ঠিক করিয়া রজত বরণ চৌধুরী নয়গাঁও ডাকবাংলাগোত থানারকা বুলিয়া মানুসিংয়ে কিতায় গেলাগা। রাতিহান্ ডাকবাংলাগোৎ থাইয়া বিয়ানে রামপুরে মনটু সরকার ঘরে গেলাগা।

রজত বরণ : আপনে মনটু সরকার। ভাগ্যবতী সিটিবাসহনর ড্রাইভার।

মনটু : হাই।

রজত বরণ : সিটিবাসহনর মালিক মোঃ আকবর আলী সেখ। গাড়ীহানর নাঙহান ভাগ্যবতী। ঠিক হার নাপেইলু।

মনটু : অঃ উহান। মোর পরিবারর নাঙহান্ ভাগ্যবতী। নুয়া গাড়ীহান গোহাটিত লৈয়া কামাখ্যাৎ পুজাদিয়া আনিয়া রামপুরে আমার ঘরে তেই ধূপখংমেই দিয়া ঙ্ককরেছিলী বুলিয়া চাচায় গাড়ীহানর নাঙহান্ তেইর নাঙে ভাগ্যবতী থ দিলতা। চাচা আকবর আলী সেখ আমার নিজরতা পারা। তেইরে জিলক পারা য়াকরের।

রজত বরণ : গাড়ীহান্ গেল্গা কালি গৌরীপুরে দেখলু। একেবারে নুয়াহান্ পারা ঐয়া আছে। ভাগ্যবতীর ভাগ্যহান জবর হবা।

মনটু : আমি গাড়ীহান জবর হবা করে থৈয়ার। মাহানাৎ আকখুরুম বহুয়েইয়া সারভিসিং করিয়ার। গ্রীজিং মি থাইয়া করুয়াউরী। আজি পেইয়া গাড়ীহান্ হিলগৎ পেইয়া ধাক্কা না মারেছে।

রজত বরণ : গাড়ীহানাৎ খেৎ আহান্ পেইয়া না দেখলু। গৌরীপুরে হ্নলুতা, রফিক আহমেদ বুলিয়া লেংড়া বুড়া আগরে আপনে জবর বানা পেইয়া ধন-পয়সালো সহায় করিয়ার। ও বুড়া উগ মরে পড়েছো।

মনটু : হাই, জবর হবা আছিল্ বুড়াগ। জিয়া-জীপুৎ, সাগেই-সেমেই, কুংগৌ নেই। জয়নগর বাজারে ভিক্ষা করিয়া খেইয়া আছিল্। ইমে ও বাজারর পথর কাদার খোনাৎ আকঝারির তলে রাতি ঘুমজিয়া থাইল্। আস্পাতালে গিয়া মরে পড়িলগা। আমি হাবিহানে তিলৈয়া আমার এপেই তারে কবর দেছিল্যাৎ।

রজত বরণ : মি হ্নলুতাই, মোহন চন্দ্র দাস বারো রেজাউল আহমেদে নয়গাঁও সিভিল আস্পাতালে চিকিৎসা করুয়ানিত নেছিল্যাগা। ও দিনেই আস্পাতালে মরেছিল।

মনটু : হাইহান্।

রজত বরণ : ধন্যবাদ। আপনার তুলো টটরেইয়া জবর হারৌ ঐলু। এ মাপাৎ মানুসিংয়ে প্রশ্ন আহান করলো।

মানু সিং : আপনার স্বাস্থ্যপাতি জবর হবা ঐয়া আছে। আপনে হৃদয় বিয়ানে হিনেইয়া নাম্ছ-পাতি পিদিয়া পূজা করিয়ার পারা পাউরী।

মনটু : হাইহান। ভগবানর আশীর্বাদে আজি পেইয়উ কোন দশা-লালফামে না পড়েছি।

মানু সিং : কিন্তু মি হ্নলুতা, আপনে গেল্গা মারী জয়নগর বাজারে এক্সিডেন্ট আহান্ করিয়া রফিক আহমেদ বুলিয়া মানু আগ মারে বেলাছি।

মনটু সরকার শৌও পড়িলগা। শৌয়েয়া মাতলো -

মনটু : মোর শক্রয়েউ মাতে নুয়ারতাই আজি পেইয়া মি পশু-পক্ষী-জীব-জন্তু আগৌ মারেছু বুলিয়া। মানুতে দূরেইর কথা।

মানু : না শৌয়েবাৎ। মানুয়ে মাংলা হনতে মাতুরীতা। ও এক্সিডেন্টে আপনারে পাবলিকে জবর কিলাছি বুল্লা। এমন কি মুর ফাটাদেছি বুল্লা। বারো গুণাবারীর পুলিশে এ্যারেষ্টো করেছিলো বুল্লা। আপনার গাঙ রামপুরর রফিক আহমেদ বুলিল লেংড়া বুড়া আগরে এক্সিডেন্টে মারে বেলাছি বুল্লা।

মনটু সরকার ইমেতেই শৌঅছিল্। এ্যারেষ্ট অছিল্ বুলানিয়ে জ্বর গজে ঘি পড়িল পারা। জ্বি মেইপুল ঐয়া

মাংলো -

মনটু : এতাহবি দারোগা কমল মহন্ত, সারভেয়ার কণিকা দাস, আকবর আলী বারো রেজাউল আলীর কু-চক্রান্ত। জয়নগর বাজারর ভিখারী লেংড়া বুড়া রফিক আহমেদরে রামপুরর রফিক আহমেদ বুলিয়া হাজেইয়া করেছি। গাড়ীহান এক্সিডেন্ট নয়াউ এক্সিডেন্টে রফিক আহমেদ মরেছে বুলিয়া মোরে জনমকার দাগ আহান থ'দিলাতা। মি ঔদিন গাড়ীহানেই না চালাছু।

রজত বরণ : আমি উঠিক্। জয়নগর বাজারে যানাৎ পড়েছু। বুলিয়া মাতিয়া রজত বরণ চৌধুরী বারো সহকর্মী মানুসিং উঠিয়া গেলাগা।

ঔদিন মাদানে চক্রধ্বজ বুজর বরুয়া বুলিয়া জয়নগর বাজারর স্থায়ী দোকানদার উগর দোকানে রজত বরণ চৌধুরী মানুসিংরেলো হমেইল্গা। দোকানীগরে আংলাক্ কর্লা।

রজত বরণ : মি প্রাইভেট গোয়েন্দা রজত বরণ চৌধুরী। তা মানু সিং মোর সহকর্মী। মি কথা আহান হারপানীত আহেছুতা। ১০/৪/২০০০ ইংরাজীং জয়নগর বাজার বার অছিল্। এপেই সিটিবাস ভাগ্যবতী টি.এছ - ২৫-৮৮৮৯ গাড়ীহান এক্সিডেন্ট করিয়া রামপুরর রফিক আহমেদ বুলিল্ লেংড়া বুড়া আগরে ধাক্কা মারিয়া উগ ঔদিন নয়গাও আসপাতালে মরেছিলতা।

বুজর বরুয়া : এপেই আজি পেইয়া কোন এক্সিডেন্ট নাছে, মানু মারাগির কথাতে বাদ্দি। ঔদিন আমার বাজারর ভিখারী লেংড়া বুড়া রফিক আহমেদরে রেজাউল আহমেদ বারো মোহন চন্দ্র দাসে আসপাতালে চিকিৎসারকা ভর্তি করুয়াছিলগা। উগো, ঔ আসপাতালে মরেছিল।

রজত বরণ : আপনারে ধন্যবাদ। আমি আজি উঠিক্। লাগলে আরাক্ আক্দিন আহিতাজ্ই বুলিয়া উঠিয়া গেলাগা। রজত বরণ চৌধুরী বারো মানু সিং ঔ রাতি নয়গাওর ডাকবাংলাগোং থাইলা। পিছেকার দিনে গুৰাবারী থানাৎ যনার কথা।

বিয়ান্ সাড়ে দশ বাজিৎ রজত বরণ চৌধুরী সহকর্মী মানু সিংরেল গুৰাবারী থানাৎ ফৌএল্গা। সিটিবাস এক্সিডেন্টে জয়নগর বাজারে রফিক উদ্দিন আহমেদর মরণর ঘটনাহানর সরজমিন তদন্ত করিয়া নথি পত্রলো কেইসহান্ ডাইরী করেছে সেকেণ্ড অফিসার, কমল মহন্ত, সাবইনস্পেক্টরর তুলো পরিচয় আদির পিছে গোয়েন্দা রজত বরণ চৌধুরী দারোগা বাবুরে আঙলাক করাগি অকরল -

রজত বরণ : দারোগাবাবু! সিটিবাসহান্ এক্সিডেন্ট অছিল্ ফামে আপনে তদন্ত করানিরকা কয়টাং গেছিলাংগাতা ?

দারোগা : মি বাসহান্ এক্সিডেন্ট অছিল্ ফামহানাৎ লগে লগেই গেছিলুগা। ফামহান জয়নগর বাজার। ৩৭ নং ন্যাশনেল হাইওয়ের গজে আমার গুৰাবাড়ী থানাৎ ছয় মাইল পুবেদে।

রজত বরণ : ঘটনাহান দুইহাজার ইংরেজীর এপ্রিল মাহার দশ তারিখে দিনে তিন বাজিৎ ঘটেছিল। আপনে খবর পাছিলাং দিনে তিন বাজি তিরিশ মিনিটে। আপনে ঘটনার ফামে চারি বাজি কিতাত গিয়া থাইবাংগা।

দারোগা : হাইহান্। এক্সিডেন্ট অছিল্ রফিক আহমেদরে রেজাউল আহমেদ বারো মোহন চন্দ্র দাসে অটো-রিক্সা আহানাৎ কাকরিয়া কাদার নয়গাওর সিভিল আসপাতালে চিকিৎসারকা ভর্তি করুয়াছিলগা। এক্সিডেন্ট করেছিল দুর্ভাগীয়া সিটিবাস টি.এচ. - ২৫-৮৮৯৯ গাড়ীহান্ ড্রাইভার মনটু সরকার বারো হেন্ডিমেন্ মানিক সরকারে গুৰাবাড়ী থানাত নিয়ারগা বুলিয়া নেছিলাগা।

রজত বরণ : মোহন চন্দ্র দাসে এক্সিডেন্টে জখমী রফিক আহমেদ আসপাতালে মরেছে বুলিয়া পৌহান আপনারে বাগাছিল্ তায় তিন বাজি তিরিশ মিনিটে বুল্লাং। জয়নগর বাজারেংত নয়গাও সিভিল আসপাতালগ তিন মাইল দুরেই। জয়নগর বাজারে জীপগাড়ীহানল আহিতে আপনারতা আধা ঘণ্টা সময় লাগেছে। জরর হবা কথাহান্। পাবলিকে হামেশায় মাংতারা পুলিশে লগে লগে ঘটনাস্থলীত তদন্তে না যিতরাগা। মারা-মারি, কাটা-কাটি,

দারোগা : দাঙ্গা-হাঙ্গামা, শান্ত এলে, চর-ডাকাতি করিয়া গিয়া হুদেইলেগা তদন্তে যিতারাগা। আপনে যোগ্য অফিসারর যোগ্যতা দেখয়েইলাং। এবাকা আপনার তদন্তর রিপোর্টহান পাকরিয়া হুয়েইক। তদন্ত করিয়া কিহান পেইলাংতা। মি সরজমিনে তদন্ত করিয়া পেইলুতা - সিটিবাসহান গৌরীপুরেৎত আহেছিল। গুৱাবাড়ী জয়নগর-নয়গাঁও ঐয়া বনগাঁওও যানারকা। ড্রাইভার মনটু সরকারে অতি তীব্র গতিত গাড়ীহান চালাছিল। বজার বার, বাজার অঞ্চলে গাড়ীর গতি ঘন্টায় ১৫ মাইল অনা থকছিল। মদর নিশাত ড্রাইভার মনটু সরকারে ঘন্টায় ৪০ মাইল গতিত গাড়ীহান চালাছিল। রফিক আহমেদ পথগর হমবুকুত আছিল। ছেচে নুয়ারেছে। ড্রাইভারগয় স্ট্রয়ারিং কন্ট্রল হারাছিল। গাড়ীহানে রফিক আহমেদরে পিঠিয়েদেৎত ধাক্কা মারেছিল। ঐ ধাক্কাত রফিক আহমেদ অজ্ঞান ঐয়া পথে উবুরী ঐয়া পড়েছিল। কাদাত আছিল আলাউদ্দিন সেখ, পানীরামদাস, যুগল সিং, মোহন চন্দ্র দাস রেজাউল আহমেদ গাছি দাব্ দিয়া ছেচে পড়েছিলগা। গাড়ী জবর করে ব্রেক্ মারেছিল। কিন্তু ছুচুরেইয়া ২৫ হাত গেছিল গা। রেজাউলে, মোহনে অটোরিক্সা আহানলো জখমী রফিক আহমেদরে নয়গাঁও আসপাতালে চিকিৎসারকা ভত্তি করুয়াছিলগা।

রফিক আহমেদ বুড়াগ। বয়স আনুমানিক তিন কুড়ি বছর। জাং আহান লেংড়া। জবরক আটে নুয়ারের। রামপুর গাঙে থার। সিটিবাস গাড়ী হানর মালিক মোঃ আকবর আলী সেখর ভতিজাগ।

মি ঘটনার ফামে ঘটনাহান ঘটতে দেহেছি তিনগ মানুর জবানবন্দী লছিল। তানুর জবান বন্দী এসাদে -

(১) মোঃ আলাউদ্দিন সেখ - বাপক - মৃত - উসমান সেখ। গাঙ - সাতগাঁও, থানা : গুৱাবাড়ী। বয়স - তিনকুড়ি ছয় বছর। রামপুরেৎত ২ মাইল পুবে। সিটিবাসহান অতি দ্রুত গতিত গুৱাবাড়ীদেৎত আহেছিল। জয়নগর বাজারহান এক-দেড় বাজিত লৈয়েলেউ বাজারে পথে ঘাটে মানু আছিল। রফিক আহমেদ পথর এপারেৎত হৌ পারেদে লালনিরকা কর্তে বাসহান দেহিয়া লুমপাং ঐয়া পথর হমবুকুত উবা অ পড়েছিলগা। তৎক্ষণাৎ বাসহানে তারে ধাক্কা মারিয়া বেলাছিল। বাসহান ব্রেক্ মারেছিল। কিন্তু ছেচারিয়া গেছিলগা। বাজারর মানুষে বাসহান বেড়িয়া ধরেছিল। ড্রাইভার বারো হেন্ডীমেন্ দ্বিয়োগীরেউ বাসাহানাৎত আচুলিয়া লামেইয়া কিলাছিল। ড্রাইভারগর মুর ফাটেছিল। হেন্ডিমেগরেউ ঘুসি-কিল-বাড়ী দিয়া দাঁত বাগে দেছিল। তানু কোনরকমে গাড়ীহানলো থানাত বুলিয়া গেছিগা। ড্রাইভার মনটু সরকার, হেন্ডিমেন্ মানিক সরকার বারো রফিক আহমেদ হাবিরে মি চিনু। তানু মোর গাঙর পুবেদে কাদার রামপুরে থাইতারা।

মোহন চন্দ্র দাস বারো রেজাউল আহমেদে রফিকরে অটো আহানাত তুলিয়া আসপাতালে নিলাগা। রফিক আহমেদ, রেজাউলর খুরতাক।

(২) দ্বিতীয় মানুগ শ্রীপানীরাম দাস। বাপক - শ্রীভোগীরাম দাস। গাঙ - ধুবুরী ঘাট। থানা : গুৱাবারী। রামপুর গাঙেৎত মাইল আহান পশ্চিমে। বয়স : দ্বি-কুড়ি পাঁচ বছর। মি ড্রাইভার মনটু সরকার, হেন্ডিমেন্ মানিক সরকার, রফিক আহমেদ হাবিরে হবা করে চিনু। আমি বরাবর মনটু সরকারর গাড়ীত জয়নগর, গৌরীপুর বনগাঁওয়ে আনা-যানা করিয়ার। বাজারর দিনে রফিক আহমেদ প্রায়েই বাসে আমার তুলো জয়নগরে আহের গ। আজিয়ে তা আমার লগে আহেছিল। এসাদে একসিডেন্ট্ ঐতে.....

রজত চৌধুরী : দারোগা বাবু। আর জবানবন্দী নাউ পাকরিক। পিছেদে হুতাঙাই। আপনে এফ্.আই.আর্ হান্ পাকরিক।

দারোগা : এফ্.আই.আর্ হান্ ১২/৪/২০০০ ইংরাজীত, সুমন্ত সরকার, গাঙ-গুৱাবাড়ী, গিরকে দায়ের করেছে।

রজত চৌধুরী : ঘটনাহান ১০/৪/২০০০ ইংরাদীত, দিনে ৩ বাজিত অছিল। এফ্.আই.আর্ দায়ের করেছিতায় দ্বিদিন পিছেদে। আপনে এফ্.আই.আর্ পেইয়া তদন্ত করলাংতা না মোহনর মৌখিক খবর পেইয়া তদন্ত করেছিতা।

দারোগা : মোহন চন্দ্র দাসর মৌখিক খবর পেইয়া।

রজত চৌধুরী : গাড়ীহানর ড্রাইভার মনটু সরকার বারো হেন্ডিমেন্ মানিক সরকাররে ১২/৪/২০০০ ইংরাজীত অ্যারেষ্ট করিয়া ১৩/৪/২০০০ ইংরেজীত কোর্টে চালান্ দেছি মাতলাং।



দারোগা : না। ১২/৪/২০০০ ইংরেজীত ড্রাইভার, হেন্ডিমেন, বারো গাড়ীর মালিক মোঃ আকবর আলী সেখ গাড়ীহানলো থানাত আহেছিল। ঐদিন ড্রাইভার হেন্ডিমেন দ্বিযোগীয়ে অ্যারেষ্ট করিয়া হাজতে থাছিল। পিছেকার দিনে ১৩/৮/২০০০ তারিখে কেইসহানলো সাব-ডিভিশন্যাল জুডিসিয়েল ম্যাজিস্ট্রেটর কোর্টে চালান দেছিল। গাড়ীহান সীজ করিয়া গাড়ীর মালিকরাং জিন্মা দেছিল।

গোয়েন্দা রজত বরণ চৌধুরী গিরকে খালকরের - একসিডেন্টে মানু মারেছে গাড়ীর ড্রাইভারগ পুলিশে ধরানির চেষ্টা কিয়াকা না করলাত? দ্বি-দিন পিছে গাড়ীর মালিকগয় নিজে ড্রাইভার, হেন্ডিমেনল থানাত আনিয়া ধরয়াদিল। মানুমারা কেইসহানর এফ.আই.আর হান ঘটনার তিন দিনকার দিনে দায়ের করলা। উতাউ মরা রফিক আহমেদর কোন আত্মীয় নাগে। সুমন্ত সরকার নাঙর শুবাবাড়ীর মানু আগ। রজত চৌধুরীর চিন্তা কেইস হানর এমুর হৌ-মুর দাব্দের। পুলিশর কাম, মরাগর আত্মীয় কুটুমর নির্বিকার মৌনীভাব, ড্রাইভার, হেন্ডিমেনর তড়াকরে কেইসহান লৈয়েয়া নিকুলানির হত্না, মটর ইন্সিউরেন্স কোম্পানীর উকিলর হয়ভর অঙতা-লাক্তা, রজত চৌধুরী মনে মনে ঠিক না পেইল। তাঁর মনহান মরা রফিক আহমেদ তার আত্মীয়-কুটুম হৌ-ছুমারারকা চিন্তা করে। মরা এগরকা আহির পানী আক্ফোটা বেলাকুরা কুংগৌ নেইতা? মরাগর পক্ষেৎত লড়া উকিল আগৌ কিয়া নেয়তা। কুটুম-কাশায় উকিল আগ দিয়া নয়লতা।

মানু সিং : দাদা! একসিডেন্টর ফামহানাং তুলেছি গাড়ীহানর ফটোহান না চেইলাং।

রজত বরণ : ও। হাই। কোর্টেব এফ.আই.আর। পষ্টমর্টেম রিপোর্ট আই উইটনেসর স্টেটমেন্ট, মটর ইন্সিউরেন্স কোম্পানীর সারভে রিপোর্ট, দারোগা বাবুর ইন্ভেস্টিগেচন্ রিপোর্ট আনিয়া তন্ন তন্ন করে পাকরানি লাগের। কালি কোর্টে গিয়া চেইতাঙইগা। কেইসহান কালি কোর্টে কাইতে।

ঔ তারিখে কোর্টে হাবি আহেছি। যথারীতি পুলিশর প্রসিকিউশন অফিসার সরকারী উকিল, গাড়ীর মালিক ড্রাইভার, হেন্ডিমেন, ইন্সিউরেন্সর মানু এজলাস হান বুজেছিহা। তারিনীচরণ ভট্টাচার্য জেরার কা উবা ঐল।

উকিল : দারোগা বাবু। আপনে ১০/৪/২০০০ ইংরেজীত দিনে চারি বাজিত জয়নগর বাজারে একসিডেন্টর ঘটনাহানর সরজমিন তদন্ত হুতুমুউ করেছিল।

দারোগা : করেছিল।

উকিল : হবাক নিংশিঙ ঐয়া মাতিক। সরজমিন তদন্তহান ১০/৪/২০০০ ইংরেজীত করেছিল। তা, না ১২/৪/২০০০ ইংরেজীত সুমন্ত সরকারর এফ.আই.আর হান পেইয়া করেছিল।

দারোগা : না। মি ১০/৪/২০০০ ইংরেজীত মোহন চন্দ্র দাসর মৌখিক পৌহান পেইয়াই ঔদিনেই চারি বাজিত সরজমিন তদন্ত করেছিল।

উকিল : ম্যাজিস্ট্রেট সাহেব। দারোগা বাবুর কথা এহান মনদিয়া নোট করিক। দারোগা বাবু একসিডেন্টর দিন ১০/৪/২০০০ ইংরেজীত ৩টা ৩০ মিনিটে খবর পেয়া ৪ বাজিত তদন্তত গেছিল। দারোগাবাবু, মাতিক আপনে তদন্তে গিয়া, ঘটনার ফামে-পথর গজে রকতর দাগ পাছিল।

দারোগা : না। নাউ পাছু।

উকিল : আপনার তদন্তেউ পথে রকতর দাগ, গাড়ীর টায়ারর দাগ পাছি বুলিয়া না মাতেছি, না।

দারোগা : হাই। না মাতেছু।

উকিল : দারোগাবাবু। আপনে যেকাকা তদন্ত করলাংগা উবাকা পথর গজে গাড়ীহানর মুঙর উইণ্ডস্ক্রীন, পিঠির উইণ্ডস্ক্রীন, খিরকীর কাঁচ ভাগা টুকারা, ছিড়া আঙি ফুতি, সেগুল, হাওবাই চম্পল, লাঠি কিতা কাতা নাপাছিল।

দারোগা : না মি তদন্ত করতে উতা না পাছু, হান্তে রিপোর্ট হানাত উল্লেখ না করেছু।

উকিল : আপনে কোৰ্টে জমা দেছি আসপাতালৰ পোষ্ট মৰটেম ৰিপোর্ট হানাত ডাক্তৰৰ ৰিপোর্ট চেইক। উপেই ইকৰেছি

মোঃ রফিক আহমেদ। বাপাক - মৃত মিরজান আলী সেখ। গাঙ - রামপুর, থানা - গুৰাবাড়ী। বয়স - তিনকুড়ি ছয় বছৰ। লেংড়া। হাইলি ডিহাইড্ৰেটেড। প্ৰলং মাল্ নিউট্ৰিশন্ এফেক্টেড্ ভাইটেল্ অৰ্গেন্‌স্। পালস্-ফিফটি ফাইভ। বি.পি. ৭০ঃ৫০। সেলাইন্ এণ্ড ব্লাড ট্ৰেন্সফিউশন নন্ রিসিপটিভ্। এডমিটেড্ বাই শ্ৰীমোহন চন্দ্ৰ দাস এণ্ড মোঃ রেজাউল সেখ অন ১০/৪/২০০০ এ্যাট্ থ্ৰী-থার্টি পি. এম। এক্সপাৰ্যাড্ এ্যাট্ থ্ৰী-ফৰ্টি পি. এম। পোষ্ট মৰটেম ৰিপোর্টে ইন্জুৰি বা ব্ৰিডিং বুলিয়া আক্‌তউ না ইকৰেছি, না।

দাৰোগা : পোষ্ট মৰটেম ৰিপোর্ট হানাৎ আহিথম গাথিয়া থাইয়া ইম্পানী এয়া থাইল। কোন জবাব নাদল।

উকিল : মহামান্য আদালত। এহান নোট কৰিক। পোষ্ট মৰটেম ৰিপোর্টে নুয়াৰাগ তিন্ বাজিয়া দ্বিকুড়ি পাঁচ মিনিটে মৰেছে বুলেছি। বারো কোন জখম বা ব্ৰিডিং উল্লেখ নেই।

এবাকা দাৰোগা বাবু, মোৰে প্ৰশ্ন কতহানৰ জবাব দিক্। সিটিবাস হন্ জয়নগৰ বাজাৰে তিন্ বাজিত এক্সিডেণ্ট কৰেছিল্। এক্সিডেণ্ট অছিল পথৰ দ্বিযো বারাদে স্থায়ী দোকান মাহি আছে। আছে কি নেই জবাব দিক্ ?

দাৰোগা : আছে।

উকিল : আপনে ঔ দোকানদাৰ উতাৰ কোন আগৰ ষ্টেটমেন্ট না লছি। আপনে ষ্টেটমেন্ট লছি মানু আলাউদ্দিন সেখ, পানীৰামদাস, যুগল সিং এতা হাবি জয়নগৰ বাজাৰেৎ ৬/৭/৮ মাইল দূৰেই থাইতারা বারো রফিক আহমেদৰ গাঙ রামপুরৰ কাদাৎ। রফিক আহমেদ, ড্ৰাইভাৰ মনটু সরকার, গাড়ীৰ মালিক আকবৰ আলী সেখ, মোহন চন্দ্ৰ দাস বারো রেজাউল সেখ হাবিয়েই রামপুরৰ মানু। আগোৱে আগয় হবাক চিনি। মাতিক কি, না ?

দাৰোগা : হাইহান।

উকিল : আপনে স্থায়ী দোকানদাৰৰ ষ্টেটমেন্ট কিয়াকা না লৈলাং ? বাছে বাছে রফিক আহমেদৰ পৰিচিত মানুৰ ষ্টেটমেন্ট লছি। কিয়াকা ?

প্ৰশ্ন এতাৰ কোন জবাব না দিয়া দাৰোগা বাবু চুপ মারিয়া থাইল।

উকিল : দাৰোগা বাবু। আপনে দুৰ্ঘটনাহানৰ খবৰ পানার লগে লগে গাড়ীহান কিয়াকা জন্ম না কৰলাংতা ? গাড়ীৰ ড্ৰাইভাৰ হেন্ডিমেণেৰে কিয়াকা ঔ দিনেই এ্যারেণ্ট না কৰলাংতা ? কিয়াকা এফ্.আই.আৰ্ হন্ ঘটনাৰ দ্বিদিন পিছে ১২/৪/২০০০ ইংৰেজীত লৈলাংতা ?

দাৰোগা : আমি গাড়ীহান, ড্ৰাইভাৰ বারো হেন্ডিমেণ্, গাড়ীৰ মালিক হাবিৰে বিছাড়াছিলাং। জোৱদাৰ বিছাড়াইনি অছিল। ১২/৪/২০০০ ইংৰেজীত হাবি থানাত আহনিহান কো-ইন্সিডেণ্টহান্।

উকিল : মহামান্য আদালতরাং মোৰ হেইচাহান্। এক্সিডেণ্ট কৰেছে সিটিবাসহানৰ ড্ৰাইভাৰ মনটু সরকারৰে মি প্ৰশ্ন কতহান্ আংকরানি মনাউৰী। দাৰোগাবাবুৱে আংকরানিৰ মোৰ আৰ দরকার নেই।

ম্যাজিষ্ট্ৰেট গিরকে য়াথাং দিলে ড্ৰাইভাৰ মনটু সরকার উইটনেস্ বক্সগত কাইল্গা। উকিলগয় জেরা কৰেৰ।

উকিল : আপনে কয়বছৰ এল এ বাসএহান চালেয়রতা।

ড্ৰাইভাৰ : ১০/১১ বছৰ ঐতে।

উকিল : পাবলিকে মাত্তারা, ড্ৰাইভাৰে মদ না পিয়া ঔনা নেই। তেবৌ আংকরুরী - আপনে মদ পিয়ারতা ?

ড্ৰাইভাৰ : মি মদ-ভাঙ-কিতাৰ নিশা না কৰুরী। কনাকতৌ মদ-ভাঙ-গাঞ্জা-জুয়া এতাৰ কাদাফৌ অনাউ আল্লি পাউৰী। ইমে সময়ে সময়ে চা-বিষ্টু বারো ১৬০ বাবা জৰ্দা পান আকেইগী খাউৰী।

উকিল : জবৰ হবা অভ্যাসহান্। আপনে দেখুরী নিৰালহানাত চন্দনৰ ফোটা পিদেছি। গাৱগং তুলসীৰ কাঠি পিছেদি। আপনে দৌ-দুক্, বামন-বৈষ্ণব জবৰ য়াকৰে থাইবাং। হাদি হাদিৎ নিশ্চয়, কামাখ্যা, নবগ্ৰহ, বশিষ্ট, মহামায়া যোগমায়াৰ মন্দিৰ দৰ্শনে গিয়া থাইবাংগা। আপনে নিশ্চয় মিছা কথা আল্লি পা থাইবাং।

- ড্রাইভার : মি কাঠিয়া বাবার শিষ্যগ। মি বিয়ানত উঠিয়া না হিনেইয়া, দৌ-দুক্ কিতা পুজারহা - না দিয়া আকতাউ নাউ খাউরী বারো কামে না নিকুলুরী। মি হদায় সময় পেইলে কালীঘাট, পুরী, প্রয়াগ, গয়া, কাশী, বৃন্দাবন, হরিদ্বার আদি তীর্থ দর্শনে যাউরীগা।
- উকিল : হবা কথা। আপনার বয়স কতি অছেতা? আপনার ইমা, বাবা, ছৌ-জিপুত কতি কিতা আছিতা?
- ড্রাইভার : ইমা-বাবা ১০/১১ বছর এল্ দৌ ঐলা। মুনি ছৌ আগ জেলাছৌ আগ বারো তানুর মালক আছে। এবাকা মোর দ্বি-কুড়ি পনর বছর চলের।
- উকিল : আপনে নিশ্চয় জীব-জন্তু, পশু-পক্ষী, লেইরা, আতুর-পিতুর মানু, অনাথ ছৌ-ছুমারা বানা পা থাইবাং। রামপুরে লেংরা আগ আছে উগোরে আপনে আপনার গাড়ীহানলো নিক্কা তার গাঙ মানে আপনার গাঙে অনা নেনা করিয়ার উনি?
- ড্রাইভার : হাইহান্। গাড়ীহান নিক্কাই দ্বি-খুরুম গৌরীপুর-বনগাঁও অনা-যানা করের হান্তে রামপুরেত মি তারে অনা-নেনা করুরী।
- উকিল : এসাদে ধার্মিক, পরোপকারী, ড্রাইভার এবাকার সমাজে অতি কম আছি। আপনে নিশ্চয় আজি পেয়া কোন একসিডেন্ট না করে থাইবাং। আপনে বাসহান স্পীডে নাউ চালাথাইবাং।
- ড্রাইভার : না, ভগবানে দিয়া আজি পেইয়া কোন অঘটন মোরতা নাছে।
- উকিল, তারিণীচরণ ভট্টাচার্যই মুকসি মুকসি দিয়া আহিয়া ম্যাজিষ্ট্রেট গিরকরে তার কথাহানি যেবাকা নোট করণিরকা মাতল
- উবাকা থানার দারোগা বাবু, গাড়ীর মালিক আকবর আলী সেখ বারো 'লিড-লাইফ' ইনসিউরেন্স কোম্পানীর সারভেয়ার কণিকা দাসর মেইথঙ হানি চানির মত অয়ল।
- উকিল তারিণীচরণ ভট্টাচার্যই ম্যাজিষ্ট্রেটগিরকরাং ইনসিউরেন্স কোম্পানীর সারভেয়ার কণিকা দাসরে জেরা করাণির য়াথাং বিছাড়লে, ম্যাজিষ্ট্রেটে য়াথাং দিল।
- উকিল : মিস্ দাস, আপনার ভেহিকল্ সারভে রিপোর্টে আপনে মাতেছি - গাড়ীহানর হেড লাইট, উইণ্ডস্ক্রীন, উইণ্ড গ্লাচ, বডি, বনেট, সীট হাবি হিল উরাণীয়ে বারো দা-বানুকর কাপনিয় ডেমেজ অছে। কারবুরেটর, ডিজেল পাম্প, ফেন্ন, বেটারী, রেডিয়েটর, স্তিয়ারিং হাবি লাঠির বারিয়ে বারো বানুকর কাপনিয় রিপেয়ার নাইতৈ পারা ডেমেজ অছে। মুঠতে গারীহান হংকরতে এবাকা একলাখ পঞ্চাশ হাজার রুপা লাগের। বারো রফিক আহমেদ গাড়ীহানর একসিডেন্টে মরানিয়ে রেজাউল আহমেদ মরাগর ভাতিজায় রুপা দ্বি-লাখর ক্রেইম করেছে। ইনসিউরেন্স কোম্পানীয়ে মোট পাঁচলাখ পঞ্চাশ হাজার রুপা দেনা লাগের। উতাত দশগ প্যাসেঞ্জারর বিশ হাজার করে দ্বিলাখ আছে।
- মিস দাস : হাইহান্।
- উকিল : এরে ডেমেজড বাসহানর আপনে তুলেছি ফটোহান চেইক্। উইণ্ড গ্লাচ, খিরকীর কাচ সীট আকতাউ নেই। বনেটহানৌ চেপালা অছে। হেডলাইটগীয়ে নেই। এহান আপনে তুলেছি ফটোহান্। তারিখহানৌ দেছি - ১০/৪/২০০০ ইংরাজী। এহান্ হুতুমহান্?
- মিস দাস : হাইহান্।
- উকিল : মহামান্য আদালত। ইনসিউরেন্স কোম্পানীর সারভেয়ার মিস কণিকা দাসর কথা হানি নোট করিক। মিস দাস, আপনে হুলাং, দারোগা বাবুয়ে মাতেছে ঘটনাস্থলীত কাচর ভাগা টুকারাহান্ পেয়া না পাছে, গাড়ীহান সহ ড্রাইভার মালিক ১২/৪/২০০০ ইংরেজীত গুৱাবারী থানাত গেছিল্গা। হুলাং না. না হুলাং?
- মিস দাস : হুলাং?
- উকিল : ম্যাজিষ্ট্রেট মহোদয় মিস দাসর এ 'হুলাং' কথাহান নোট করিক। মহামান্য আদালতর য়াথাং পেইলে আরাক স্বাক্ষী



আগ মি আদালতে পেশ কৰানি মনাউৰী। ম্যাজিষ্ট্ৰেটে য়াথাং দিল।

উকিল : আপনার নাঙ, বাপকর নাঙ, পেশা, ঘরর ঠিকানা আদি বয়স কিতা মাতিক্।

স্বাক্ষী : মোর নাঙ চক্ৰধর বুজর বরুয়া, পিতা - শ্ৰীচক্ৰধ্বজ বুজর বরুয়া। পেশা - ব্যবসা। ঠিকানা - জয়নগর বাজার। থানা - গুৱাবাড়ী। বয়স - আককুড়ি তের বছর।

উকিল : জয়নগর বাজারে আপনার দোকান আছেতা? আপনে ১০/৪/২০০০ ইংরেজীত কয়টাৎত কয়টা পেয়া দোকানে আছিল্যাং ?

স্বাক্ষী : মোরতা চউল-ডাইল-খৌ ইত্যাদির মুদির দোকানহান্। মি বিয়ান্ সাড়ে আটবাজিত দোকান খুলুরী। সেন্ধা সাড়ে আট, নয় বাজি পেয়া দোকান খুলা খৌরী। ১০/৪/২০০০ ইংরেজীত মি দোকানেই আছিলু। ঔদিন জয়নগরর হাপ্তার বাজার বার আছিল।

উকিল : আপনে জয়নগরে ভিক্ষা কৰের বুড়া ভিখারী রফিক আহমেদরে চিনিয়ার্ তা?

স্বাক্ষী : চিনুরী। তবে নাঙহান্ রফিক আহমেদ না কিতা হান্ না পাছু। বুড়া ভিখারী এগ নিক্কা আকখুরুম মোর দোকানে ভিক্ষা মাগানীত আহের। জাং আহান্ লেংড়া। নাহানি-নাপীনিয়ৈ গারীগ চকছিল্। আটানি হিন্পাছিল্। মি তারতা এবতা পারাক চউল-ডাইল-নুন-মক্ছি-খৌ-কিতাকাতা হামেশা দিয়া দৌরী। তা পথর কাদার বট খৌনাং বারীর তলে রাখিয়া খেইয়া পিয়া ঘুমজিয়া থার। ১০/৪/২০০০ ইংরেজিত মাদান তিন-সাড়ে তিন বাজিত মোহন চন্দ্র দাস বারো রেজাউল আহমেদে অটো আহানাং কাকরিয়া তারে আসপাতালে নেছিল্যাং। পিছে আসপাতালে মরিল বুলিয়া ছনেছু।

উকিল : আপনে রামপুরর রফিক আহমেদরে চিনিয়ারতা। সিটিবাস চি.এচ. ২৫-৮৮৯৯ গাড়ীহান, গাড়ী হানর মালিক মোঃ আকবর আলী সেখ, ড্রাইভার শ্রীমন্ট সরকার, রামপুরর রেজাউল আহমেদ এতারে চিনিয়ারতা?

স্বাক্ষী : হবা করে চিনু। রফিক আহমেদ লেংড়াগ। রামপুরে ঘর। বয়স ৬০/৬৫ বছর ঐতৈ। মোঃ আকবর আলী সেখর ভতিজাগ। মনটু সরকার গাড়ীর চালকগ হবা মানুগ। আজি ১০/১১ বছর মোর দোকানেৎত রেশন খার। রফিক আহমেদ হদায় মনটুর গাড়ীত জয়নগরে আনা-যানা কৰের্। উগৌ মোর দোকানেৎত রেশন খার্।

উকিল : মোর লৈয়েলগা প্রশ্নহান, চিন্তাভাবনা করিয়া, ছত্ৰুমে হাচা উত্তর হান দিবাং। ১০/৪/২০০০ ইংরেজিত বেলুকা ৩ বাজিত মনটু সরকারর বাসহানার ধাক্কাত এ রফিক আহমেদ জখম ঐয়া তারে মোহন চন্দ্র দাস বারো রেজাউল আহমেদে অটো রিক্সাত তুলিয়া আসপাতালে নেছিল গাতা।

স্বাক্ষী : এপেই ঔদিন কোন মটর এক্সিডেন্ট নাছে। বারো আজি পেইয়াউ কোন এক্সিডেন্ট নাছে। আগেই মাতলু নাই, জয়নগর বাজারে থার বুড়া ভিখারী আগরে তানু দ্বিয়োগীয়ে তিন বাজিত অটো রিক্সাহান্ নয়গাঁও সিভিল আসপাতালে নেছিল্যাং। ভিখারী উগ ঔদিন সিভিল আসপাতালে মরেছিল বুল্‌লা।

উকিল তারিণীচরণ ভট্টাচার্যই মহামান্য আদালতরে মাতল -

‘মোরতা লমৈল স্বাক্ষীগ, প্রাইভেট ডিটেকটিভ রজত বরণ চৌধুরীরে জেরা কৰাণি মনাউরী।

আদালত : করে পারিয়ার।

রজত বরণ : মহামান্য আদালত। মোরতা মিয়াম কথা নেই। মি এহানেই আদালতরাং মাতানি মনাউরী যে জয়নগর বাজারর লেংড়া, বুড়া, লাওয়ারিশ মরা রফিক আহমেদ বুলিল্ আগরে রামপুরর রফিক আহমেদ মটর দুর্ঘটনাত মরেছে প্রমাণ করিয়া ইনসিউরেন্স কোম্পানীর রূপার বৌ-বরণ আহান্ আনিয়া গুয়াবাড়ী থানার দারোগা কমল মহন্ত, লিড্-লাইফ্ মটর ইনসিউরেন্স কোম্পানীর সার্ভেয়ার মিস কণিকা দাস, গাড়ীর মালিক মোঃ আকবর আলী সেখ, গাড়ীর ড্রাইভার মনটু সরকার, রামপুরর মোহন চন্দ্র দাস, রেজাউল আহমেদ গাছিয়ে রূপার বরণে হিনানী মনেইয়া এ কাল্পনিক মটর দুর্ঘটনাহান হাজাছিতা।

- গাড়ীহানর মালিক মোঃ আকবর আলী সেখে নিজে ড্রাইভার মনটু সরকাররে এ্যারেষ্ট অনারকা রূপা

আককুড়ি লিপিং দেছে। মি তদন্ত করেছ, ঔদিন গাড়ীহান্ আকবর আলীর পুতক মিরজান আলীসেখে চালাছিল। বারো কোন এক্সিডেন্ট নাছে।

- মহামান্য আদালত। জয়নগর বাজারর বুড়া ভিখারীগ ১০/৪/২০০০ ইংরেজীত নয়গাঁও সিভিল আসপাতালে চিকিৎসার কা ভর্তি ঐয়া ঔদিনেই মরেছিল, উহান্ হাচা হান্। কিন্তু ঔ বুড়াওগ রামপুরর লেংড়া বুড়া রফিক আহমেদ নাগে। বুড়া ভিখারীগর আগে পিছে কুংগৌ নেইহান্ দেহিয়া রামপুরর লেংড়া বুড়া রফিক আহমেদরে ঔ মরাগ সাব্যস্ত করানির্ অপচেষ্টা করেছি। রামপুরর। বুড়া রফিক আহমেদরে আকবর আলীয়ে গৌরীপুরে তার ঘরে লুকেইয়া থেছে। সিটিবাসহান্ এক্সিডেন্ট নাইয়াউ এক্সিডেন্ট অছে দেখ্যানির কা কণিকা দাসে ভাগগাড়ীর ফটোহান গৌরীপুরে আকবর আলীর ঘরে, উইণ্ড স্ক্রীণ, সীট, হাবিতা খুলিয়া বেলেইয়া তুলুয়াছে হান্।

মোহন চন্দ্র দাসে, রফিক আহমেদ হাসপাতালে মরানিয়ে ডর পাছিল। তা রফিক আহমেদ মরার কা দায়ী ঐতে পারে। ঐলে পুলিশে তারে ধরতায়। তা ডেথ্ সার্টিফিকেটহান্লো উহান্ৰকা গুৰাবাড়ী থানার ও.সি, গরাং মরার পৌহান্ দেনাং গেছিলগাতা। কমল মহন্ত, সাব ইন্সপেক্টার সুযোগ এহান কামে লাগেইল। লগে গাড়ীর মালিক আকবর আলী সেখ, ড্রাইভার মনটু সরকার, ইনসিউরেন্সর সার্ভেয়ার কণিকা দাস, ইনসিউরেন্সর উকিল তপন দাস, ইন্ফরমার মোহন চন্দ্র দাস হাবিয়ে তিলেয়া মটর এক্সিডেন্টে রফিক আহমেদ মরেছে সাব্যস্ত করিয়া ইনসিউরেন্স কোম্পানীর সাড়ে পাঁচ লাখ রূপা বাটিয়া খানাং উবা অছি।

উকিল তারিণীচরণ ভট্টাচার্য গিরকরে মোর তদন্ত বারো অনুসন্ধানর খুটি নাটি হাবি মি বাগাছিলু যেতা জেরাত পরিস্কার ঐয়া নিকুলিল। উকিল বাবুরে ধন্যবাদ। পোষ্ট মরটেম্ রিপোর্টে মানুগ নুয়ারা ঐয়া মরেছে বুলেছি। এক্সিডেন্টে জখমর কোন রিপোর্ট নেই। নুয়ারাগ মরেছেতাই তিন্ বাজি চল্লিশ্ মিনিটে। পুলিশে মরার খবর পাছিতাই তিন্ বাজি তিরিশ্ মিনিটে। মরার দশ মিনিট আগে। জয়নগর বাজারর স্থায়ী দোকানদার চক্রধর বুজর বরুয়ায় ১০/৪/২০০০ ইংরেজীত আজি পেইয়া উপেই কোন এস্সিডেন্ট নাছে বুলেছে। ড্রাইভার মনটু সরকারে ঔদিন গাড়ীহানেই না চালাছু বুলেছে। বারো ঔদিন নাগে আজি পেইয়া গাড়ীহানে মানু নাগে, পশু আগৌ না মারেছে বুলেছে। ভাগ্যবতী সিটিবাসহান্ অভিশপ্ত নাগে। অভিশপ্ত এ কু-চক্রী মানু এতা-যেতায় অভিশপ্ত করানিৎ থেঙছি।

মহামান্য আদালতে মনেইলে মিছা মামলা হাজানির অপরাধে মানু এতার বিরুদ্ধে পাল্টা কেচ রুজু করানি পারিয়ার।

(এ যারী এহান সম্পূর্ণ কাল্পনিক। স্থান, কাল, পাত্র হাবি কাল্পনিক। এ যারীর কোন কথা কোন চরিত্র কোন নাং যদি কোন ব্যক্তি বিশেষ, কোন পদফাম, কোন পদফামর অধিকারী, কোন বিভাগ বা কোন বিভাগর কর্মচারী বা মানুর তুলো তিলর ঔহান আকস্মিক, অনিচ্ছাকৃত বারো কো-ইনসিডেন্ট। এহানাং লেখকর কারেড, কোন বিভাগরেড, কোন পদফামরেড, কোন পদফামর অধিকারীরেড হয় প্রতিপন্ন করাণির কোন প্রকার বিন্দু বিসর্গর অপচেষ্টা নেই। এহান শুধুমাত্র সাহিত্যর খাতিরে কল্পিত। সত্যর তুলো এ যারীর কোন সম্বন্ধ নেই।

- লেখক)



## কাজিৰাঙ্গাত দ্বিদিন

মণীন্দ্র কুমাৰ

‘ওঁ গণেশায় নমঃ, ওঁ গণেশায় নমঃ, ওঁ গণেশায় নমঃ’। জোড় আত কৰিয়া নিংশা না বেলেইয়া জপ কৰিয়াই চলেছ। মণীন্দ্র জীপহানৰ ইঞ্জিনৰ দ্ৰুতলয়েতৌ মোৰ নাঙ জপহান দ্ৰুততৰ আছে। কুনোবাবাদে মন নেই। একমন মাত্তাৰা উহান। কিয়াউবা একমন নাইত। মুণ্ডে জীয়ন্ত মরণ। ছালি রংৰ চিক্‌চিক্‌ কৰেৰ পৰ্বত-ডাঙড় দাঁতাল বনুয়া আন্তিগ। পথ আগুলিয়া উবা ঐয়া আছে। লড়ন-চরণ নেই। না লড়ের মাহি মোৰ জপানি আৰাকৌ তুড়া অর। হাদি তন-মন এক বুলতারা উহান উবাকা হারপাউরী। পঞ্চ-প্রাণ কণ্ঠগত। কিহান ঐতে, কিহান নাইতে। দরবিগলিত ঘাম ছুটেছে। চিচুপা ঐলু। লহি-মাঙনি, আকসাটে আহেছে। কপাল টেকারাত লাগেছ। কিয়াকা মরাণিত আইলুতা। গণেশ বাবায় কিহান কৰতে। ‘একপদম্‌ন গচ্ছামি’ বুলিয়া উবা ঐয়া আছে।

বিনয় পানিকাই। ড্ৰাইভাৰগ। মাতলু ইঞ্জিন বন্ধ না কৰি। তাপপ্‌ তাপপ্‌ পিঠিয়েদে আলেক। পিঠিয়েদে চেয়া মাতেৰ, ‘সার পিছনে গুনা মহ’। অৰ্থাৎ পিঠিত বনুয়া পালৰ গদা মৈষণ। সেইক্ষাং যমরাজ। বলী, পাংকাল, গদ-গদ-কৰেৰ। কল্‌ঠা, চহা, দ্বিহাত দীঘল শিলপাটপাৰা নোহাৰ হিং জোড়। কৰিগী পাৰা আহিগীলো চেইয়া আছে। দেহানিয়ে আকসাটে প্রাণবায়ু নিকুলিয়া গেলগা। ওঁ যমায় নমঃ বুলতু না ওঁ গণেশায় নমঃ বুলতু। জীপহান বুলুয়ানিৰ ফাম নেই। মৰাৰ ডেকি বুম্‌ মারিয়া থাইলু। জীয়ন্তে মরণ কিহান হারপেইলু। এসাদেউ কি মরণ আটিয়া আহেৰ তা-ক। মোরে জীয়ন্তে নেনাৰ কা মুণ্ডে আন্তি, পিঠিত মৈষণ।

‘স্যার, কি কৰব’। পানিকাইৰ মরণৰ পর পাৰেস্ত ভাহিয়া আহেৰ নারগ। হেইৰাপ ছনৌরী পাৰা। ‘চোখ বুজে মরণকে ডাক। নয়, শ্ৰীমধুসূদনকে ডাক। তা-ছাড়া কৰবি কি?’ হতাশ, বিহবল মৃত্যুপথগামী পানিকাইৰে কিহানতে ভরশা দিতু। দিনে-মাদানে, বেলী ২ টা ৩০ মিনিটে এসাদে মরণহান আহিতে কুংগযৌ নামাতে দেখিলা। কুষ্ঠীহান, ইকৰেছেনবদীপ পণ্ডিতৰে নিংশিং ঐলু। গেলগা মাহাত কুষ্ঠীহান চেইল গ। চতুৰ্থে বৃহস্পতিৰ সঞ্চাৰ, লগ্গে বুধ-শুক্র, পঞ্চমে শনি, দ্বাদশে রাহু-মঙ্গল। ‘ফাৰা দশাতে নেই’ বুললগ। তে, এহানতে কি হান! এবাকা পণ্ডিত মশায়ৰে গালেইয়া কিহান কানা। যমরাজৰে ডাইয়াউ কিতা কৰতু। বৰং সৰ্ব্ব বিঘ্নি বিনাশায় সৰ্ব্বসিদ্ধিদাতা গণেশৰেই ডাইং। যেতাউ কৰক। বার পঞ্চপ্রাণ

তিল কৰিয়া একাগ্ৰচিত্তে জপানি অকৰলু। ‘ও গণেশায় নমঃ, ওঁ গণেশায় নমঃ।’ পানিকাইৰেউ মাতলু জপ। আহিথম তায় তায় জিপিল। নারগ নৈয়েল। জপহান মনহানায় কৰেৰ কি না কৰেৰ ভু নেই।

খাংতা পানিকাইৰ নারগ ছনলু। ‘স্যার, সামনেৰ হাতি সৰেগেছে। পিছনেৰ মোষটাউ নেই।’ ছিয়াউকৰে পঞ্চপ্রাণ হমেইল পাৰা। মূৰগন্ত গাৰীগ পাহিয়া জংহান পেয়া স্নায়ু মণ্ডলী হজাগ ঐয়া হাপ্দে আহেৰ হারপাউরী। মরাদেহাগ জিংতা ঐল পাৰা। তড়িৎবৎ পানীকাইৰে গাডীহান চালা বুললু। ওঁ মুহুৰ্তে জপতপ্‌ পাহবলু। ফাৰ্‌লং আহান-মুহান আহানিৰ পিছে বারো নিংশিং ঐলু। বার ‘ওঁ গণেশায় নমঃ’ বুলিয়া নিংশা বেলেইয়া গণেশৰে নিংশিং ঐয়া হমা দিলু। এবাকা খালকরুরী, মনুষ্য মি কতিয়ৌ নিমক হারাম, স্বার্থপর। আন্তিগ গেলগা লগে লগে গণেশ বাবা পাহৰিয়া জিংতা অনাৰ ছালে ধাবদিলু। জিংতা অনিৰ মুহুৰ্ত উহানাং পাহৰেছিলুতা। ভোমারতা কিহান মনে অর?

এহান কাজিৰাঙ্গাত মোৰ পয়লাকার দিন, প্রথম জান্তব সম্বৰ্ধনা। গেলগা ছাপাত বদলীৰ অৰ্ডাৰ পেইয়া আজি কাজিৰাঙ্গা নেশনেল পাৰ্কৰ চার্জ নেনাত আহেছগ। চার্জ নানেছগ। চার্জ নেনাৰ আগে কাজিৰাঙ্গা অভয়ারণ্য চানাত গেছিলুগাত। কিতা চার্জলৈতু, চেইং বুলিয়া। One horn Rhino, Rhinoceros Indicus, পৃথিবীৰ একমাত্র হিং আকৰণুয়ালা গণ্ডাৰ আবাস ভূমি। তারো পৃথিবী বিশ্বাত। Eastern Assam Wild Life, Division, হেড কোয়াৰ্টাৰ বোকাখাট। গৌহাটীত পূবে ২৪০ কিলোমিটাৰ দূৰেই। যোড়হাটেত পশ্চিমে ৬৪ কিলোমিটাৰ। নেশনেল হাইওয়ে NH-37 র গজে। মি, ও বন-সংমণ্ডলৰ প্রাধিকারী অৰ্থাৎ D.F.O. অনাত গেছগাগ।

কোহৰাৰ ফরেষ্ট ইন্সপেকশন বাংলাগোত রাতিহান ভরা না ঘুমজিয়া আকহান প্রপ্তৰ মীমাংসাত থেঙছ। চার্জ লৈতু না বদলিৰ অৰ্ডাৰ পালটেইতু। দিনৰ মরণৰ কুগন্ত নিস্তাৰ। আন্তি, মৈষণ সন্তাষণ, সম্বৰ্ধনা। খালকরুরী প্রাণবায়ু নিকুলিং নিকুলিং কৰেৰ। আত জাং কল্‌ঠাঐয়া পেটে হমার। অন্যবেদে মনৰ অহঙ্কার, ‘মি ফরেষ্ট অফিসাৰ। আসাম ফরেষ্টৰ হাবিত্ত সাহসী, কৰ্মোদ্যোগী, কৰ্তব্য পরায়ণ, একনিষ্ঠ, কৰ্ম্মী বুলিয়া মাততারা এগ। সরকারে,



গজরতায় Poacher র আতেত গণ্ডার জিংতা করাণিত দিয়া পেঠাছি, মি।' অমীমাংসীত প্রশ্নলো সদোন্তর নাপেইয়া বিয়ান ফুইতে ঘুমজিলু। কুমতি-সুমতি কারৌ জয়-পরাজয় নেই।

বিয়ানে Breakfast টেবিলে অহংকার, মদমন্তার, কর্তব্যনিষ্ঠার জয় ঐল। কাজিরাস্তা অভয়ারণ্যর চার্জ লৈতো ঠিক করলু। মিয়েই যদি ডরহানে বেলাদিয়া ধাবদেউরী, তলর কর্মচারীতে আকগৌ থানা না করতাই। ওঁ গণেশায় নমঃ জপতে আস্তিগ বার মৈষগ পথ এড়াদিয়া গেলাগা, এ প্রেরণায় গণেশ বাবার ভরশায় চার্জ লৈলু।

কাজিরাস্তার আকবছর আধা দিনহানি নিতনতুন স্মৃতি বিজড়িত। আরাক আকহান ঘটনালো কাজিরাস্তার দিনহানির যারী বাড়ি করিং। সময়পেইলে, হাবি ঘটনা বর্ণনা করতো।

অষ্টগ্রহ তিলছে দিনহান। বেলী সাড়ে চারি বাজিত দিনহান আঁধার ঐল। পাহিয়া পল্লৈই গাছে বিরুখে, নিজর নিজর যমে চিরৌ চিরৌ রাহিয়া উঠল। সেকা সেকাত যমে হমেইয়া পাহিয়া পল্লী এসাদে রহিতারা। অষ্টগ্রহ অকালে সেকা করল। এহান তানু হারপানীর কথা নাগে। এহানো হারপানীর কথা নাগে ঘটনা আহান পিছে বার পহর ঐতৈ। মনুষ্য, আমি ঘড়ি-ঘণ্টালো হার পেইয়ার পাহিয়া পলেইয়ে বেলীলো হার পেইয়ার। এহানতে সূর্যাস্তর আগে অর্জুনর জয়দ্রথরে মারানির প্রতিজ্ঞাহান জিংতা করানিরকা অকালে শ্রীকৃষ্ণর সুদর্শন চক্রগলো বেলীহান গুড়িয়া সেকা করানিহান পারা। মিয়ৌ দিনহান বাংলাগোত হমেয়া আছু। গ্রহণ চানা গমনেই বুলিয়া।

রাতিকার আট বাজিত মানু আগ কালা আচাল্য আহানলো মুরগাড় গুড়িয়া বাংলাগোত হমেইলহা। কলিং স্বেঙ্গ বাজলে মিয়েই দুয়ার খুললু। চিনলু ইনফরমেশন। বাংলার অফিস কোঠাগত বহিলাংগা। তার ইনফরমেশন লৈলু.....' বহীখোয়া গাঙড়। রাত পানবারীত.... ঘরে থাইতে। লগে ৩/৪ গ মানু থাইতায়। ড্রয়ারগন্ত রূপা ৫০ হান নিকালেইয়া ইনফরমারগরে তার ইনফরমেশনর ফীজহানি দিয়া বিদায় কৈলু।

শ্রীবাসরে, মোর অর্ডারলী, তড়াকরে রাতিকার ডিনার দেনারকা মাতিয়া, বেডরুমে গেলুগা। সেফগন্ত 'ওয়েবলী স্কট' পিস্তলগা নিকাললু। ম্যাগজিনগত বুলেট বুজিয়া লোড করলু। আরাক ম্যাগজিন আগৌ লোড করলু। Godrej গোস্ত .303 rifle আগৌ নিকাল্লু। একস্ট্রা ম্যাগজিন আগৌ লোড করিয়া থৈলু। রাত নয় বাজিত wireless সেটহান খুলিয়া বৈলু। ডাকলু-

'Rhino, Rhino, Elephant Calling, over. কোহরার মেসেজ আহিল। ইনস্ট্রাকশন দিলু। 'Stand at

panbari Beat, 12-30 A.M. Sharp. Two Jeeps, five men each with arms, secret. Raiding Poacher, over and out' বুলিয়া Wireless সেট বন্ধ করে দিলু।

ঘুমজিতেগা শোভারে মাতলু -

- মোরে সাড়ে এগারোটা হজাগ করে দিছ। শোভা, মানে মোর গৃহিনী। আঙকরিরী -

- আজি রাতি বার কুরাং ছালৈলেতা। রাতি তি না গেলেগা নারতা। নিক্কা নিক্কা রাতি যারগা। মোরতা ডরহানে ঘুম নার। রেঞ্জার উতারে দা পেঠেইলে না করের।

শোভার অনুযোগ ভিত্তিহীন নাগে। ঘরে আলৈয়া নাহেছু পেয়া ঘুমঝে নুয়ারতৈ। নানা চিন্তা ভাবনা-বেশীর ভাগ হবা নেইতালো খালকরিয়া না ঘুমজিয়া থাইরী। ঘরে আলৈয়া আইলে পিছেদে আহি জিপেইরী। বাংলাগোত Security Guard থাইলেউ মেসেজের হাবিরতাউ এসাদে অর। Army, Police, Forests এসাদেই জীবন। মোর জীবনে আহে পড়লীগা হনতে ভাগ্যহান মানানিত পঢ়লী। মি ভেইরকা ইন পাউরী। Forest Officer র গৃহিনী পারতে নানায় মঙ্গল।

শোভার হারপাছে পানবারী রিজার্ভে গণ্ডার দুগ আহেছি। আজি ৫ মাহা আছে। কাজিরাস্তা পাকেস্তু আহিয়া স্ট্রেণ্ডেড অছি। অম্মারতা Patrolling এ যিতারাগা। তেইরেল মিয়ৌ দ্বি তিন দিন গেছিলুগা। পানবারী বুলতে আন্তির যারী আহান মনে পড়িল বিছাড়া বিছাড়া প্রতিহিংসা মিটেইয়া কিসাদে মানুগ মারের উহানর চমৎকার বিশ্বয়কর যারী আহান। থাক আরাক আকদিন দিতৌ। শোভারে কুরাং যিটৌগা বাগেইলু।

- উহানতে তি মেসেজ পাসকরতে ছনিয়া হার পেইলু। রাজেনে-পুলিশে তিলেয়া যাকাগা বেনাই। এম্যাটিক রাতিহান তি নাউ যিগা। উতারগজে আজি অষ্টগ্রহ তিলছে দিন হান।' শোভার যারৌ।

- কিতাউ নেইহে। পথরগজে ঘরগ। জীপগাড়ী ঘরগর মুঙহানাত উবা ঐতৈগা। আজি যিংগা। এহান অতি ইমপোর্টেন্ট রেইড হান। এগরে আজি পেয়াউ ধরে নুয়ারেছিগ। Wireless Set হান খুলিয়া থেছ।' যারৌহান পাটল করানি মনেইলু।

আর না টটরেইয়া ঘুমজিলি। মিয়ৌ আহি জিপেইয়া পড়িয়া থাইলু। রাত সাড়ে এগারোটা উঠলু। ফুল স্নীভ খাকী সফরীহান পিদলু। হান্টিং বুটজোড় লাগেইলু। পাঁচ বেটারী টর্চ আগ লৈলু। ওরেবলি স্কট কাকালীত বেলেট টিপলু। .303 গ লেম্পালে সিলিং বরেইলু। দ্বিয়োহানো আনকক করলু। পানিকাই

জীপহান নিকালেইয়াই বেড়ী করিয়া থছিল। কুরাং যানা না বাগাছিল। Guard আগ বেকসীটে বহেইলু। Secret mission ড্রাইভার কিতারেনা বাগেইয়ার।

ঠিক সাড়ে বার টাত গাড়ীহান পানবারী বীট অফিসর পিঠিত উবা ঐলগা। বীট অফিসে হমেইতেই হেড লাইট অফ করলাং। রাজেন জীপগাড়ী দুহানলো আহেছে। পাঁচগ করে দশগ মানু আহেছি। রাজেনর হাতে রিভলভার আগ। পাঁচগর আতে .303, অনাগীর আতে টর্চ বার লাঠি।

১২-৪৫ মিনিটে ছািলেলাং। পানবারীর ঔ ঘরগ পেইয়া জীপে ১৫ মিনিট লাগতে। আমি ১২-৫০ মি. পেইয়া জীপে গেলাংগা। পিছেদে আটিয়া যানা ঠিক করলাং। আমার firing আওয়াজ পেইলে তিনহান জীপ আকসাটে ঘরগত যানারকা নির্দেশ দিয়া আটানি অকরলাং।

১ বাজি ৫ মিনিটে ঘরগর মুঙে ফোঁয়েলাং। রাজেন, মি. মোর গার্ড মুঙর দোয়ারহানর কাদাং থাইলাং। চাংঘরগ। গজে না কাইলাং। শব্দ করতে বুলিয়া। বাকী ঔগী ঘরর তিন বারদে থাইলাগা। ঘরর ভিতরে লেনটন আগ ডিম করিয়া থছি।

- রাজেনে..... নাঙলো ডাকলো। দুরূপ দুরূপ করিয়া মানু তিন চারিগ উঠানির শব্দ ছন লাঙ। চাংঘরগ। রাজেন মি বার মোর গার্ড গ, আকফালে দোয়ারহানাত উবা ঐলাংগা। লগে লগে পিঠির হাবিয়ো কায়া আইলা। দোয়ারহান আচুলিয়াই পাঁচ বেটারী তিন চারিগর লাইট ভিতরে বেলা। চারিগ টর্চ মেইথঙে গান্দিয়া থৈলা। ফামহানর কাদার দুগ বন্দুক গাউ দুগয় আকফালে আতে লৈলাগা। মোর পিস্তলগ, রাজেনর রিভলভারগ - দুগরে নিশানা করিয়া থৈলাং। গার্ড দুগয়, ফরেষ্টার দুগয় আতহানি পিঠিয়েদে করয়েইয়া দরিল বাঁধে বেলুলা। মানুগী মুগদা-মুগদী করানির হের না পেইলা। আগরে মি চিন্লু। আমার অফিসর মিরি টাইপিষ্ট আগর হৌরক। রাজেনে বাকী দিয়োগীরে চিন্ল। প'চার তিনগীয়ে আগরে আগয় মিরি ঠারল গালানি অকরলা। মি দোয়াত আইয়া গুলি আগ ফারার করলু। মিনিট ৩/৪ র ভিতরে জীপ তিনহানি আইয়া উবায়িল। তিনগীরে জীপ আহানাত কাকরিয়া গার্ড চারিগ পিঠিত, মুঙে ফরেষ্টার দুগ রাজেনে ড্রাইভ করিয়া গাড়ীহান লৈল। আমি আমার নিজর নিজর গাড়ীত কাইয়া রাজেনরে বুকুগত দিয়া সিধা কোহরা রেঞ্জ অফিসে গেলাংগা। অফিসর লগে atached lock up Room গত তিনগীরে বরেইয়া গার্ড থদিয়া কাদার ইনসপেকশন বাংলাগোত বৈলাংগা। ফরেষ্টার আগরে D.F.O. বাংলাত মেমসাহেবেরে wireless এ o.k. message pass

করে দেনারকা অর্ডার দিলু। ঘণ্টা হানর ভিতরে রাতিকার দি বাজি দিনকার দশ বাজি ঐল। রেঞ্জর স্টাফ, অফিস স্টাফ, আন্তির মাছত, যোগো য়েপেই আছিল। আইটার মিঙালে ইঙাল গুলিল।

ধরেছি তিনগীর আগ কাজিরাদ্ধার গণ্ডা মারাগির হাবির গজর দুর্জব poacher .... নাঙ। মিরি। ধলা। বাটুকা। গদ গদ করে। খুমাখুমা হাত জাং। উদালা গারী। দেহার গঠন অতি মনোরম। দেখলেই পাংকালপাগ হারপেইয়ার। বয়স ৪৫/৫০ ঐতে। আগ বুড়াগ দীঘালা। চক। চুল দাড়ি মুচ ধলা অছে। আগ ২০/২২ ঐতে। নুয়ারা চেল্পা। রাত তিন বাজিঙ জেরা অকরলাং। মিতে মারিয়া বেলা দেনা মনাছিল। পুলিশে বা কোর্টে দিলে বার জামিনে আইতে বা কতমাহা জেল খাটিয়া বার আইতে। বার গণ্ডার মারতে। আজি পেইয়া কাজিরাদ্ধার এগয় একশগর গজে গণ্ডার মারেছে গ। কোহরা পুলিশ স্টেশনর ও. সি. গয় পথে দেহিয়া মুক্ছি দেছে বুলল। কামহান হারপাকুরা মানু থা পরতাইগা। পিছেদে ঝামেলা লাগতে।

- তোর নাঙ কিহান। লগর দিয়োগীর কি কি নাঙ। তানুর তুলো তোর কিহান সম্পর্ক।

-..... মিরি। বুড়া ঔগ মোর হৌরক। ছৌ ঔগ মোর হালাক।

- আজি পেইয়া তি কয়গ গণ্ডার মারেছে তা।

- ১০৮ গর গজে ঐল। অষ্টগ্রহর দিনে পানবারী কেম্পগর কাদত আজি আগ মারেছ।

- মি দেছেছ। কেম্পগর এমাটিক কাদাত কিসাদে মারলে। কেম্পর মানুগী কোরাং আছিল।

- 'নেয়ছিল। অষ্টগ্রহ বুলিয়া ঘরে গিয়া থাইবাগা'।

- 'তি হিং কারাং বেছ' ? জবা না দে।

- 'হিং আকেইগি বেছলে কতি পার ?'

- দশ হাজার, পঁচিশহাজার, কোন সময় পঞ্চাশহাজার। উতার গজে নাদ তারা।

- পেলিকান কেম্পর এরিয়াগত গাত হংকরিয়া গণ্ডার মারিয়া গাতগত মুর নেই লাশ আগ বেলাছিল। উহান কুংগয় করেছেতা ?

- মি। উগর জেলাগরে ছৌ-ছুমারা বার তেইরকা মাহে মাহে খোরাকীর ধন দেউরী।

- কিয়াকা মুরগ তুপ করেছিলেতা ?

- আমার লগর মানুগ। পয়সা মিয়াম মাগের। কমদিলে পুলিশে-ফরেষ্টে ধরোয়া দেনার ডর দেহার। ঔগণ্ডারগ মারাত জিতেগা রুপা আককুড়ি লিশিং ডিমাগু করেছিল। গণ্ডারগ মারিয়া তারে

গাতগত লামিয়া হিংগ কাপিয়া আনানিরকা লামাছিলু। হিংগ কাপিয়া দিয়া তারে কাকরাণিরকা মাতেছিল। তারে না তুললু। মুরগ তুপ করিয়া নিয়া মৈলকরে দেখ্যাছিলু। মৈলকরে আজীবন মাহে মাহে খোরাকী-পোষাকী ধন দিতৌ বুলেছিলু। এবাকা পেয়া দিয়া যাউরীগা।

আকতাউ গোপন না করের। বার স্বচ্ছন্দে মাতের। কোন প্রকার লাজ-ডর-ভয় নেই। আচরিত লাগের। আঙ করলু-  
-তি যে গণ্ডার মারর, জীব-জন্তু, আস্তি, ভালুক, মৈষ, অজাগড়, ডর নাপারতা। আমার পাহারদার ডর নাপারতা। পাহারদারে তোরে জঙ্গলে পেইলে যে গুলি করিয়া মারতাই।

- না। আমি হৃদয় তিন-চারিগ থাইয়ার। আমার হংকরা গুলি আকেইগীয়ে বাঘ, ভালুক, আস্তি, গণ্ডার, আকেইগী মারে পারের। পাহারদারতে পথে পথেদে, লাইনে লাইনে আটতারা। বার তড়া তড়া করে আটতারা। বারাদে পাং না চেইতারা। আমি জঙ্গলে লুকেইয়া তনুরে দেহিয়ার।

- তুমি তনুরে দেহিয়া গুলি না চালায়ত কিয়াকা?

- তনুর ডিউটা তনু করতারা। তনুরতাউ ছো-ছুমারা আছি। পালতা নাই। বারো আমারে আজি পেয়া জঙ্গলে নাউ পাছি বারো আমারে গুলি না করেছি। আগ্নানে আগ্নানে কন্মচারী মারিয়া কিহন কানা।

- তি আজি পেয়া ধরা না পরেছত তা?

- আকখুরম পড়েছিলু। হিং বেছতে সন্দে করিয়া আসামী দেখিলা। প্রমাণ নয়নিযে ছাড়া পাছিলু।

- আমি এরা দিলে বার গণ্ডার মারতেইতা?

- খাল করতৌ। লগর এতায় গণ্ডার মারানিরকা মাততারা হনুতে মারুরীতা।

- আজি মারলে গণ্ডার এগর হিংগ বেছলেতা?

- না

- কুরাংতে আছে?

না বাগার। রেঞ্জার, ফরেষ্টার তনুরে জবাব হান লনার কা লাগা দিয়া মি আই বিগত গেলুগা। ওবাকা বিয়ান টো বাজেছিল। কত জেরা করিয়াউ না বাগার হনুতে থার্ডডিগ্রী জেরা অকরেছি। চা-কাপ আহান পিয়া বার গেলুগা। থার্ডডিগ্রী জেরা উহান দেহে পারিলতা নাগে। কিন্তু উপায়ো নেই, কোন জবাব না দেব থাংতে।

হিংগ কুরাং আছে উহান না বাগেইল। হিং কুরাং বেছের, কারাং বেছের, আকতারৌ জবাব না দেব। থার্ডডিগ্রী লালকরিয়া নির্যাতন অকরলা। মেকমুক আহান না করের। গারীগ কতিয়ৌ দরা অগেছেগাতা। মনহান কতিয়ৌ বুঝাছেতা। প্রায় ঘণ্টা আহান।

হাবিগি গেলাগা। মি আঙকরলু —

- তি কিয়াকা না বাগারতা। বাগেইলে তোরে এরা দিতৌ। থক্ক বাগা। তোরে নাউ জেরা করতাই।

কানা নাইল। কুম মারিয়া বোবাগ ঐয়া থাইল। মাতলু—  
- যদি না বাগার এতায় এবাকা তোরে গারীগত নুন-মরকচি লাগা দিতাই। ওতান্ত রেহাই পেইবেতা মোরে বাগা। বার মোরে বাগেইলে তোরে মি চাকুরী আহান দিতৌ। জনমহান নুঙেই করে কাটবে তা।

মোরে পিট পিট চার। নাতে বাগার। মি বার আংকরলু—  
- মোরে বিশ্বাস নারতা।

- অর। তি যেহান মাতর উহান করর। তিয়েই মোরে ধরলে। গেলগা তিরিশ বছরে মোরে আকগয়ৌ ধরে নুয়ারেছি।

- তোরে চেইতে এমাটিক হবা লাগের। তোর কচু, দেহাগ, আহির মিত্তা, চুল কতি হবা। চেইল মাহি পেল নার। এমাটিক হবা মানু এগ কিয়াকা গণ্ডার মারিয়া হিন পারতা। কতি হিন পেইলেতা চা। একাম এহান এড়া দে।

কোন জবাব নেই। বার আংকরলু।

- হায়দে গণ্ডার কপ্পা না মাতলে। বহিখোয়াত শাহজাহান আস্তিগর দাঁত আগ কুংগয় কাপিয়া নিলাগাতা?

- মি নাগে। মানুগ হারপাছু। নাহান না মাতৌ।

- দাঁতগ মি নিকাললু। পেইলু। এহানতে হারপেইলেতা হারপাছু। ও দিন মি হোটেল উগোত বৈয়া আছিলু।

- তোরে চিন্লে মি গুদিনেই তোরে তুলিয়া আনলু ঐছ। হায়দে মাত। জিংতা আস্তিগর দাঁতগ কিসাদে কাপলাতা।

- রাতি আস্তিগরে লাউপানী পিউয়েইলা। বেছশ করলা। আস্তিগ মাটিহানাড পড়িয়া থাইল। হেক্সহানলো দাঁতগ কাপলা।

- দাঁত আগ নিলাগা। হেরে উগ কিয়াকা না কাপলা। মোর প্রশ্ন।

- দাঁত আকগর অর্ডার আছিল। তা উত্তর দিল।

- ও। গণ্ডারৌ উতা ঐলে অর্ডার পেইলে মাররতা। আগে মারিয়া হিং নিয়া না থরায়তা। - না। মি না থোরী। আমার তাউ শত্রু আছি। হিংগর কা আমাবেউ মারতে পারে। নুয়ারলে পুলিশ, নহিলে ফরেষ্টে বাগাদিতাই। ধরা পড়ানির ডর আছে। তার উত্তর।

- এবাকা মোরে বাগা। গণ্ডার হিংগ কুরাং আছে। হিং কারাং কুমপেইত বেছরতা। মোর প্রশ্ন।

ছুপ না বাগার। না বাগেইলে, মি মাতলু —

- মি যাউরীগা। কিন্তু রেঞ্জারগ বার ফরেষ্টারগী আইতায়। বার জেরা অকরতাই। কিল বারী দিতাই। উত্তাত রেহাই পানা-মনেইলে



মোৰে বাগা।

- আৰ কিলবাৰী না দকা। এ দ্বিয়োগীৰ মুণ্ডে লাজ পাউৰী। কিল  
বাৰী দিলেতে তোৰ মানু জঙ্গলে পেইলে মি মারতো।

- তি হাৰপাৰতা। যেতা যেতা মাতৰ উতা এৰে টেপ্ বেকৰ্ভাহনাত  
কাৰতা। এতা হাবি তোৰ বিৰুদ্ধে স্বাক্ষী থাইতে।

পাউণ্ডা, লাং লাং ঐয়া মোৰে চাৰ।

- 'মি যাউৰীগা। তোৰ কিহান অৰ মাতে নুয়াক্ৰী। তবে এহান  
হাৰপা। মি যতদিন কাজিৰাঙ্গাত থাইতো অতদিন তি জেলে  
পচতেই।'—

মাতিয়া আই বি. গত গেলুগা। রেঞ্জাৰগৰে নিৰ্দেশ  
দিনু।

- খানি জেৰেয়া কথা ল পারলে, বালা। কথা মাততৈ বুলিয়াতে  
নিংনেই। এমাটিক কিল-বাড়ী খেইয়া নিক্ নিক্ না কৰেৰ। না  
বাগেইলে ৰিপোর্টহানলো নয়-দশ বাজিত, হয় কোহরা পুলিশ

ষ্টেশনে, নাইলে সি.জি.এম কোৰ্টে, গোলাঘাটে হাজিৰ কৰিছা।  
মি, সি.জি.এম. গিৰকৰে টেলিফোনে বাগেইতো। বাৰো, ডি.সি.,  
এসি.পি. জোড়হাটৰেউ জানেইতো। নিৰ্দেশ কিতা দিয়া বোকাখাট  
হেড় কোয়াৰ্টাৰে আলৈয়া আইলু।

ছয় মাহা পিছে বোকাখাটৰ দোকান আহনাত.... দেহেছি  
বুলিয়া অফিসৰ কেৰাণী আগয় মোৰে বাগেইল। হাৰপেইলু আমাৰ  
ফৰেষ্ট এক্টৰ ফৰেষ্ট ল পাৰাৰফুল নাছে। নুয়া ল এনেক্টমেণ্টৰ  
প্ৰয়োজন আছে।

অবশ্যে ১৯৮০ ইংৰেজীৰ মে মাহা পেইয়া তার গণ্ডাৰ  
মাৰাণিৰ পৌ মি না পাছিলু। উবাকা মি বদলী ঐয়া গৌহাটীত  
আহেছিলু। AASU আন্দোলন অতি জোৰদাৰ চলেছিল। পিছেদে  
হুলু তার দেহাগ শাকতি ঐয়া বাগে পড়েছিলু। তা আৰ Poach-  
ing ৰ লায়েক নেইয়োছিল।



## অমৃত-চয়ন

# কিয়াকা আমি হ্রাত মিছারে যাম গুরুত্ব দিয়ার

(স্বামী সুখবোধানন্দর কথাত)

শ্রীব্রজগোপাল সিংহ

জরম অনার লগে লগে আমি মিছা কথারে হাচাত যাম গুরুত্ব দেনার শিক্ষা পেয়ার। নিজে চুলফেরা বিচার করানিও মানুষে কিহান মাতলা ওহানরে মিয়াম বিশ্বাস করিয়ার। ফলে বিচারহীন Genetic ক্রটির শিকারে পরিণত অয়ার।

তিনগো 'E' র প্রতি আমারতা দৃষ্টি দেনা থকর। Experience, Environment বারো Education। আমার প্রত্যেকর নিজস্ব agenda আলাদা আলাদা। বারো প্রকৃতির (cosmic) agenda আলাদা। আমার ব্যক্তিগত agenda অইলতাই E.G.O. E.G.O. অইলতাই Edging God Out আমি হাবি আমার নিজস্ব agenda ত বদ্ধ থায়ার বারো প্রত্যাশা করিয়ার পৃথিবীর হাবি মানু মোর agenda র অনুকূল ভাবাপন্ন অয়া চলকা - যেহান অসম্ভব বারো ফল অতৃপ্তিদায়ক।

মোর agenda মত চলানিরকা পৃথিবী এহান দায়বদ্ধ নাগই। Personal agenda বুলতে আমার 'I' র (মি) বা EGO বুঝার EGO অইলতাই সমাজে মোর সম্বন্ধে কিহান মাতারা ও হানর সমষ্টিগত ধারণা। সমাজে মোরে হবা বুললে মি হবা বুলিয়া ধারণার সৃষ্টি অর। অর্থাৎ মোর অবস্থান হান সমাজর আরোপ করা দৃষ্টিভঙ্গী নির্ভর। এহান সমাজ আহানর রীতি-নীতিলো স্থির অর। কিন্তু সমাজ আহানাত যেহান হবা আরাক সমাজ আহানাত হয়তো উহান হবা নাগে। সুতরাং দেহিয়ার যে সমাজর দৃষ্টি ভঙ্গী, পরম্পরা (Tradition) নির্ভর - সত্য নির্ভর নাগে।

উদাহরণস্বরূপ - কোন সমাজে আমিষ খানা হবা নেই - নিরামিষ খানা হবা বারো ঈশ্বররে পানার পক্ষে অনুকূল বুলিয়া শিক্ষা দিতারা। অন্য সমাজে এহান গৃহীত নাইতেও পারে। সুতরাং এহান পরম্পরাগত বিশ্বাসহান - সত্যহান (truth) নাগে। সুতরাং দেহিয়ার যে সমাজর কারণে আমি অসত্য (Lies) লো প্রভাবিত অয়ার। মিছারে গুরুত্ব দেনার শিক্ষা পেয়ার। কিন্তু সত্যনিষ্ঠ জিজ্ঞাসু মানু এ প্রভাবর ব্যতিক্রম অপারতারা।

দ্বিতীয়তঃ মানুর ভাগ আহান তনুর অভিজ্ঞতার

(Experience) দাস অপরতারা। উদাহরণ স্বরূপ - কোন মানু আগে ঠকা বেললে অন্য মানুরেও ঠক বুলিয়া ধরাণির প্রবণতা জাগের। ফলে মানু তার অভিজ্ঞতার দাস অপরতারা।

শিক্ষার (Education) সাহায্যলো আমি দেহে পারিয়ার যে হবার লগে হবা নেইতাউ আছে। আমার অভিজ্ঞতা (Experience) কোন বিশেষ মুহূর্তে সত্য বারো অন্য মুহূর্তে অসত্য। শিক্ষা (Education) আমারে পারিপার্শ্বিকতার (Environment) চিপুনিগন্ত মুক্তি দেব বারো সত্য-মিথ্যা ছাকানির (filter) বল প্রদান করের। ফলতঃ সত্য শ্রবণর ক্ষমতা আহরণ করে পারিয়ার। এ ক্রিয়া এহানর অভাবে সমাজর তাঁতশালাত জরম অছে আমার আমিছ (I or EGO) সত্য শ্রবণর সুযোগ নাদের।

আমার আমিছ (I or EGO) এগো কতহান অভিজ্ঞতা যেতা বিশেষ ক্ষণ আহরণকা সত্য, কিন্তু যেতারে আমি সর্বকাল সত্য বুলিয়া ভ্রমে ধরিয়ার ও তারাত জরম অরগো। এগোই আমারে বদ্ধ করিয়া থর বারো সত্যশ্রবণর অনুপযুক্ত করের। এগোর দাসত্বস্ত মুক্তি নাইলে সত্যর সৌন্দর্য্য আন্বাদন সম্ভব নার। সুতরাং মনে 'মি' এগো মিথ্যাজাত এহান জাগরক থয়া মিছা এতারে ছাকানির ক্ষমতা আহরণ করিয়া সত্যনিষ্ঠ অনার চেষ্টা আমি অকরিক।

গিরকর কথাচুটি -

Il invite people into that dimension of education where every one of us should be committed. Most of us are literate. But we are not educated. The heart of education is leducation of the heart. And if your heart is committed towards truth, only then you will be able to see something which is beyond lies, in which much of us are prisoners. I intivte you into this world of truth, which is so beautiful, which has no religion, which has no tradition, which no language can define, no system can confine. It is this boundless existence that every one of us are invited by existence; but we regret the invitation because we never looked into the very beauty of being in truth and un wisdom of being a slave to lies.m

## কবিতা

### পুল্লিং অলাংপী

\*সেনারূপ সিংহ

এ পুল্লিং অলাংপী      তোর নিং থিলপী  
 টাটিপী নংকুপী রহিরি,  
 বারে বারে উরে বহিরি  
 তিরাসে ধড়ফড়      বরণ পড়পড়  
 ইংচিক বরণ ডাহিরি।  
 কত ছড়া নদী      পাহের নিরবধি  
 পানী বুজা হারৌ অমমেয়া,  
 পারে গরে সুপ      টিপ্ টিপ্ অয়া  
 নাচিরি হারৌপী ঝম ঝমেয়া।  
 এ খৌরাং জীং      মর টাটি হুদীং  
 আকফুটা নাপড়লে ঝাঙিয়া,  
 গাছে গাছে ফুল      তোরকা আকুল  
 কুরিরমা থাইলা ছকিয়া।  
 আয় বরণ বুরি      শাতা ফুলর কুরি  
 আসাংপা ফিজতে হাজিয়া  
 পোড়া মন গারি      জুড়াক তোর বারি  
 মুড়ে গারে দিয়া হিনেয়া।  
 খাণ্ডব দাহনর      জীর বুকুং বয়া  
 কাঁদে কাঁদে চার মিল্মেঙে,  
 বয়া আছু প্রিয়      নুংশিপা নারল  
 তোর এলা হুনিল খৌরাঙে।

৮/৬/১৯৬৬ ইং

(শ্রীগোপেন্দ্র কুমার সিংহর সৌজন্যে)



### কলঙ্কিনী

- রবীন্দ্র কুমার সিংহ

কলঙ্কিনী ! অভাগিনী !। মাতেছে জীবগ কুংগ ?  
 নায়তে পারে তা জগতৰ কোন জীব আগ  
 নায়লে কিসাদে মাতে পারের তা এসাদে কথা,  
 কলঙ্ক ছাড়াতে সৃষ্টি সৃজন না করেছে যথা  
 বিধি, না বিধিয়ে করেছে দোষী কলঙ্কর সালে।  
 না জানে মুৰ্খ ! নিঘুর আঁধারে মিঙালে মিঙালে  
 হোবাহানে ছাছে চারিও মিকেয়ে। আঁধারর সালে  
 নুংশিপা সৃষ্টিহান আজি অছে ভাল ইঙালে মিঙালে।  
 নুংশিপা জেনাকরে দেহেছিল নীলুয়া নীল এ হাকে  
 রাতিকার আঁধারে। কতি রশ্মি ছড়া দেছে মাকে  
 বুঝাদেছে জগতরে আঁধারে আলোর ফাকে  
 সৃষ্টি অনাসৃষ্টির গতিভেদ ধরা পড়ে থাকে।  
 আধার আছে বুলে মিঙালর দাম  
 ছাকা আছে বুলে পার ছাকানেই দাম।  
 পাপ আছে বুলে পুণ্য জগতে ধন্য  
 নায়লে শাস্ত্রে তারে দেছে ফাম শূণ্য  
 কলঙ্ক-কালিমা আছে সৃষ্টির ভিতরে বাহিরে  
 জ্যোতি-দীপ্তি হাবিতারে বেড়িয়া অন্তরে থছে করে  
 জ্যোতি দীপ্তি আইতে দেখলে কলঙ্ক দূরেই  
 কালিমা কাদাদে আইলে দিপ্তীতে দূরেই  
 কালচক্রে এতা হাবি বিধি করে সৃজন বিধাতার  
 না হারপেইয়া সুংখ দুঃখে করে হাহাকার।





## মোর দেশ মগ্নন

সুজিৎ সিংহ, বারোমুনি

হে প্রভু !

এ মোর দেশহান	জগতে পালক
এ মোর দেশহান	ভুবনে ঙালক
এ মোর দেশহান	হোনাহন অক
বিশ্বজন্যর বিশ্ব-পিতা এদেশে জরম অক।	

হে প্রভু !

দেশবাসী যত	পেট বুজে খাকা
দেশবাসী যত	মূরে চাল পাকা
দেশবাসী যত	ফুটি পিড়ে থাক
বিশ্বজন্যর বিশ্ব-সুখ এদেশে বুজিয়া থাক।	

হে প্রভু !

নুয়ারা না পানী	মোর দেশে নাকা
লেঙারা আতুর	নাউ জরম অকা
অন্ধ-কাল বোবা	আকগউ নাকা
বিশ্বজন্যর বিশ্ব-স্বাস্থ্য এদেশে অটুট থাক।	

হে প্রভু !

ঐক্য, সাম্যগান	অক জয়গান
হিংসা-নিন্দা-ভান	এপেয় নাপাক থান
এক জাতি একপ্রাণ	করক মহান
বিশ্বজন্যর মহান-বিশ্ব এ দেশ মহান থাক।	

হে প্রভু !

ইরাক-ইরান আফগান-পাক	মোর দেশেতে নাক
মাস-কিলার মিছাইল-মিরাজ	হুনারীতে নাক
হাগে বোয়ে পথে বম্ব	পড়িয়া না থাক
বিশ্বজন্যর বিশ্বশান্তি এদেশে শান্তি থাক।	

হে প্রভু !

ভোট ভোট বুলে	মানু না মরকা
মিছা আশা জালে	মানু না বেরকা
মজা কলা দিয়া	বিভুলা না করকা
বিশ্বজন্যর সত্য-তত্ত্ব ভারতে সেত্য় থাক।	



## সাহিত্য সভা পত্রিকা

মণিহার সিংহ, নরসিংপুৰ

১

কিতা মাততু চলতে পথে  
পেয়ার কত বাঁধা,  
খোঁরাং থাইলেউ সাহিত্যে  
নাউতে অর দাদা।  
আমি আজি জাতর সালে  
গাঙে দিয়ার আবতি,  
লেহানি পারর জাতর মিঙালে  
দিতারা কয়গয় বরতি।

২

আচার-বেভার আগে আমার  
আছিল উতা নেই,  
দাদা, তিতে পত্রিকা বেছর  
আমার লাজ নেই।  
ইমার ঠারল পত্রিকাহান  
ভাষার ফৌদক চেয়া  
নিকালাদিলে সাহিত্যহান  
ঙালক-পালক বুলিয়া।

৩

কানা মাছি খেলাত লাগেছি  
পত্রিকাহান পেয়া,  
সাহিত্য সভার পত্রিকাহান  
কিতা করতাং চেয়া।

৪

আন্দাজ করে নুয়ারলে দাদায়  
আমি এতা কিতা,  
পয়সা আছে ফালদর দাদায়  
কিতা কানা অরতা?  
দাদারে দেখলে লুকানি অকরলা  
ঘরে থায়া নেইত,  
পত্রিকা হনলো আহিল দাদা  
পয়সা নেনাত চেইত।

৫

কত কানা করের আমার  
পত্রিকাহানি দিয়া,

আমি আছি পড়িয়া আমার  
যেতা পারিল অয়া।  
নিজে মনেইয়া ইমাঠার বুলিয়া  
পত্রিকা পাকরো বুলে  
নিজেউ মরিয়া আমারেউ মারিয়া  
কিহান কানা কইলে।

৬

আমিএতা কিসাদেতা  
পিছেদে ভু-পরতেই,  
যেবাকা তোরে মাথতাঙাইতা  
ঠার বেছেরতা চেই।  
আমার পয়সায় বাজার করের  
ঠকা নামুছা চেই,  
জাতহান বেছের ঠারহান বেছের  
দুরেই করে দেই।

৭

দুরেইনেই ভু-পড়তেই  
সমাজ-সেবা কর,  
সভা-সমিতি পাতিয়া দিতায়  
খেরর লুয়া অর।  
সময় থাইতে ঘর আনুচিলো  
আমি অতি শিঙ,  
শিঙে আকৈয়া হিঙ পিদেছি  
দাদা লাগতেই বিঙ।

৮

পয়সা পাতি না খোয়েই দাদা  
তোর কিতা বল,  
বিষ্ণু ভগবান লাগলা ধা-ধা  
আস্তি-ঘোড়া তল।  
সাহিত্য আমার নাইলেউ নাক,  
ইন্দ্র ব্রজেন কালী

মদন-বদন-সেনারূপ-তম্বক  
হাবি ঐলা বলি।



## নাউ পাছরতৌ চিরদিন থৈতৌ, খৌনা নান্দি পিদিয়া

সুজিৎ সিংহ, বারোমুনি

১

বলিদান, তি দিলে  
জয়গান তি গেইলে  
লালফাম তি করলে  
আত্মাহুতি দিলে  
ফিরাল তি কাকরলে  
ইমাঠারহান বুলে।  
জয়ধ্বনি দিলে  
ঠৈগ এড়া দিলে।  
নাউ পাছরতৌ, চিরদিন থৈতৌ, গারগং লিক্ছে পিদিয়া।  
সুদেষা তোরে।

২

ঠারহান আনে দিলে  
বিশ্বপ্রিয়া মণিপুরী বুলে  
বিশ্বজন্য মেল  
পিরাত বহা দিলে  
ইতিহাসহান মেল কল কলি ঘাটে দিলে  
ইমাঠারহান  
আমার আতে তুলে  
নাউ পাছরতৌ, চিরদিন থৈতৌ, গারগং থাম্পাল পিদিয়া।  
সুদেষা তোরে।

৩

আমিতে এবাকাউ  
আগরে আগয় ধরে  
নুয়ারলাং কিন্ডাউ  
নাকরা নাকরি করে  
ঠারহান পেয়াউ  
নারলাং না পাকরে

পরলাং ফিরনদে

আগেকার ডঙরে

তেবৌ না পাছরতৌ, চিরদিন থৈতৌ, গারগং কাঠিডাল পিদিয়া।  
সুদেষা তোরে।

৪

তি দেখেইলে পথগ  
কুংগয় ইলৈতায়গ  
আছি এবাকা যতিগ  
নাঙর কান্ধাল হাবিগ  
তোমারতা নাইলেউ নাক্গা  
আমারতাতে নাঙ কাক্গা,  
মৌতুপ ধরিয়া থছিগা  
যেপেই য়েগ আছিগা  
নাউ পাছরতৌ চিরদিন থৈতৌ, গারগং হেইকুরু পিদিয়া।  
সুদেষা তোরে।

৫

আয়নে বারো জরম ঐয়া  
আতে খারৌ পিদা দিয়া,  
পারতে পারে মিচাং অয়া  
খারৌ আতে বরা বেলেইয়া  
থাইছ তি ছোয়া অয়া  
জনম জনম পেয়া  
হাবির ঠৌউনা অয়া  
মিছাং আনে দিয়া  
যেহান আমি নারেছি  
দেহাদিছ তি পারিয়া।  
নাউ পাছরতৌ, চিরদিন থৈতৌ, খৌনানাপ্পী পিদিয়া।  
সুদেষা তোরে।





## তরুণোদয় সমিতি

শ্রীফুলেন্দ্র কুমার সিংহ, নরসিংপুৰ

১

তরুণোদয় সমিতি  
ছয় গাঙৰ অনুমতি  
হঙছিল ঙালয়া কতি  
কাজে কামে পালছিল  
মানুৰ মন কারলছিল।  
লগে আছিল পাঠাগার  
লৈরিকে-লৈরিকে চমৎকার,  
খেলা ধূলাত ফওছিল  
বাহিরেদেউ যন্তুছিল।

২

তরুণোদয় সড়ক  
না মনেয়ার অরক,  
মাটি লাগের দিতারা  
হিল লাগের আনতারা  
যুবক হাবি তিলয়তারা  
হোভা সান্তি দেখতারা।  
লগে আছে সরকার  
যেবাকা যেতা দরকার,

৩

তরুণোদয় বিদ্যানিকেতন  
লৈরিকেতে ছৌ সচেতন  
ঘরর কাদার স্কুলগ  
ছাত্র হাবি খইতুউগ,  
ইমা-বাবার খেয়ালে  
অজারেলর মিঙালে  
ফল ধরের কপালে।

৪

তরুণোদয় যাত্রা  
তুলনা নেই-মাতারা  
শহরে-বাগানে-গাঙে  
জোয়ার কার নাঙে  
ইমা ঠারে নাটক  
চাকুরার নার আটক  
নাট্যকার অশ্বিনী কুমার  
ক্ষেত্রমোহন-ইন্দ্রকুমার  
ইমা ঠারর নাটক তানুর  
মন কারলর দেহেছি মানুর,  
শিল্পী হাবির পাংলাকে  
গোলাপ অজার আংলাকে  
নাং ফওছিল বরাকে।  
শিল্পী আছিল-নেয়ইলা  
নাটক করানি হিন্‌পেইলা।

৫

তরুণোদয় বয়ন সমিতি  
বেয়াপায় বুনেছি ফুতি  
হোভাপেয়া লয়তারা কতি  
তাঁতে তাঁতে বুঝেছিল  
ডাঙর ঘরগ হঙছিল  
সরকার আহিল হারৌ অয়া  
সমিতির কাম দেহিয়া  
ছয় গাঙর ছয় নাঙ  
বারমুনি এক নাঙ  
অদর্শ গাঙর দরবারে  
স্বীকৃতি দিল-সরকারে।



## প্রশান্তি সঙ্গীত

- মহেন্দ্র চন্দ্র সিংহ, নরসিংপুর

জয়তি জয়ো ইমা বিষ্ণুপ্রিয়া মণিপুরী,  
দ্বাপর যুগেন্ত সহায় আমার শ্রীকৃষ্ণ চক্রধারী।  
চন্দ্রবংশ বীর অর্জুনসুত  
চিত্রাঙ্গদার গর্ভজাত - বীর বক্রবাহন;  
আমি তাঁর রকতর বংশলোচন।

ক্ষুমল-মৈরাং-আঙম-মাঙাং-লোবাং আদি নিংখৌচা,  
লিশিং লিশিং আমি জিপুত আছি ইমারে করিয়া সেমচা।।

মণিপুর ভূমে বিষ্ণুপুরে বিষ্ণুবিগ্রহ পাতেছি -  
বিষ্ণুভক্তি-ল সনাতনী ধরমে বৈষ্ণবতন্ত্রে পাহেছি।  
গীতা আমার জাতীয়গ্রন্থ  
শ্রীরাস আমার কৃষ্টির পন্থ  
ফুলমা লেহাউ আর তিলক-চন্দন  
বিশ্বপ্রেম-ও-শান্তিমা গেরুয়াভূষণ।

ক্ষত্র্য বর্ণর সামবেদী আমি,  
সামগীতি-মূর্ছনার সঙ্গীত জানি  
জানি নাছাও - নৃতিমূল খনিগ থৈবী-খম্বা,  
দৌবে-মানুবে অয়া অনা-অনী শ্রীধৃত পরলজা।

আঙম খগেন্দ্রর মবি কৃতেশ্বরী,  
গঙেইলো সতীত্ব যেমন মহেশ্বরী -  
সহ-মরণে পতিচিঁতা লগে সাক্ষী আছে সতী খোঁনাং  
সতীত্বর হাগে সাচাক-মিঙালে মহাসতী কৃতেশ্বরী নাঙ।



## ছোঁছুমারার প্রতিষেধক ব্যবস্থা

ডঃ সুকুমার সিংহ

ছোঁছুমারা আজিকালি সংক্রামক বা হাঁচুরাণি নুয়ারা কতহানলো ভুগতারা, অনেক সময় নুয়ারালো মরতারা, চিকিৎসা করাণি অকরলেও ভালো নাইতারা। ডিপথেরিয়া, ছপিংকাশি, ধনুস্তংকার, পলিও মায়েলাইটিস, লেইকুপ, টিউবারকুলসিস - এ ছয়হান নুয়ারা এতা প্রাণঘাতী নুয়ারা -দশগো নুয়ারা অইলে দুগ তিন গো আগ্তা নিয়ামপারা রূপা পায়সা তিংকরিয়া, মালকে বাপকে ইয়াম হীনপেইয়া ভালো অয়তারা - ভালো অয়লেউ স্বাস্থ্য হবা নাইতারা। এ নুয়ারা ছয়তা নানারকা ভারত সংকারে সরকারী হাসপাতালে বিনাপয়সায় হজক-আত প্রতিষেধক হিসাবে দিতারা। গিরিগিথানীর ছোঁছুমারারে মালকবাপকে তানুর নিজর নিজর ছোঁছুমারারে প্রতিষেধক টীকা দিউয়ানী থকর। প্রতি বুধবারে বিয়ানে ৯টাত্তো ১২ বাজি পেইয়া উপস্বাস্থ্যকেন্দ্র, প্রাইমারী স্বাস্থ্যকেন্দ্র, রাজ্যিক হাস্পাতাল এতাৎ প্রতিষেধক টীকা দিতারা। জরম অনার দিনেততো পাঁচ বছর পেইয়া এ প্রতিষেধক টীকা দিতারা।

প্রতিষেধক টীকা করণ নিয়ম তলে বয়স অনুযায়ী দেনা অইল।

বয়স	টীকা
০-২ সপ্তাহ	বিসিজি ও অপিভি
৬-৮ সপ্তাহ	অপিভি ও ডিপিটি
১২-১৪ সপ্তাহ	অপিভি ও ডিপিটি
১৮-২০ সপ্তাহ	অপিভি ও ডিপিটি
৮-৯ মাস	অপিভি ও মিজলস (লেইকুপ)
১৫-১৮ মাস	এম.এম. আর
১৮-২৪ মাস	অপিভি ও ডিপিটি/ডিটি
৪-৬ বৎসর	টিটি
১৬ বৎসর	টিটি

রাতি নাদেখতারা নুয়ারারকা প্রতিগো ছোঁরে জরমতো পাঁচ বৎসর বয়স পেইয়া -

ভিটামিন এ প্রতি ছয় মাসে খোরাক আহন করিয়া দশ খুরুম খোয়েইতারা।

বার রকত গারীগত কমইয়া জরম অয়তারা ছোঁরেও আয়রণ ফলিকা এসিড ট্যাবলেট (ছোট) বা ড্রপস ৫/১০ ফোটা দিনে আকরুম, খানার পিছেদে, প্রতিমাসে আক কুড়িদিন করিয়া একশদিনর কা বিনা পয়সায় হাসপাতাল - এতাৎত দিতারা।

পালস পলিও বুলিয়া পলিও মাইয়েলাইটিস নুয়ারা নানারকা ৫ বছর বয়স পেইয়া বিনামূল্যে হাসপাতালে বা ক্যাম্প করিয়া বা ঘরে ঘরে গিয়া খোয়েইতারা/মালক বাপকে উদ্যোগী অইয়া খোয়ানী থকর।





## হোমিওপ্যাথিক চিকিৎসা (প্রাথমিক চিকিৎসা)

### পিত্ত পাথরী (গলষ্টোন) মূত্রপাথরী (রিনেল ষ্টোন)

শ্রীহোম

আজিকালি ঘরে ঘরে পিত্ত পাথরী বা মূত্র পাথরী ন্যায়রার প্রাদুর্ভাব দেখিয়ার। বিশেষতঃ খানা পিনার অনিয়ম, অত্যাচার, আলিয়া-জিনা, অকর্মণ্যতা, কু-কর্ম, কু-অভ্যাস, কু-চিন্তা, ডিলেয়া ঘুমজানি, ডিলেয়া উঠানি অসামঞ্জস্য খানা-পিনা অতিমাত্রায় মুনি-জেলের যৌন-সম্বন্ধ এতাত পিত্ত পাথরী - মূত্র পাথরী দেহাদের।

আগেতে আমি হাণ্ডা আহনাং বা মাআহানাং আকেইচারা - তিতা, কহা, চহা, চামফুং, চিধু, খেইলাং। সেলকম, ঘি, দৈ, সেলকমল চামফুং পায়স খেইলাং। আমি হৌপাতর মা থাকিচলা, ইকাইথাপী, খবল, তিতারজল, গন্ধকল বেইনং ভাজা, হিং, কর্পূর, বড়ৈর, আম্বল, মনর আম্বল, তেতুলর আম্বল, গুমাইটর মেংপা, ডেফলর আম্বল, হেইনুর আম্বল খেইলাং। কাঁচা আদির টুমা মধুরল খেইলাং। পনার মচি, হরকাং মাছর মচি, হরকাং মাছর ভাজি হৌ, চেং হিজি, মাগুরা, পরম, বোয়াল এতা মিয়াম খেইলাং। লাঠি বিরণ, পানী বিরণ, বেরাপরা, হরিনারহিন, রাঙা আউ, আছাড়া খেইলাং। সজানা, ডেঙ্গা, পালৈ, আকচারা দ্বি চারা উছেই, তেরা খেইলাং। ফলর মা গাঙর-ঘরর হেইনৌ, খাটল, কমলা, কেহেম, আতাফল, বুবি, মন, লুকলুকি, আঠিয়া কলা, মনুয়া কলা, চাম্পা কলা, গেরা কলা, হাইল কলা, এতা খেইলাং। শেফালীপাতা, নিমপাতা, তুলসী পাতা, বাসক পাতা, পুলেই মালপী, চিরতাপাতা, নাকডাখনী, আকুকাম্পা, পিরিহৌ, আমুলি, হেইকিরি, আঙালা, বেল, তুতিফল, ডেপ, পানী সিঙ্গারেই খেইলাং। য়ান্নাম, ফাকপই, মিয়াংপা, ফাকিথম, রামধনিয়া, এতা তেং নেইয়া খেইলাং। চিড়া, কাপক, চাকা, খৈডুম, সেনা কাপক, নকুল, বাতাসা, খুরমা খেইলাং। রাতি ৯/১০ বাজিত ঘুমজিলাং। বিয়ানে ৪/৫ বাজিত উঠলাং। খানি বুজন এলে ভাত খেইয়া তুহম আহন দিলা।

উবাকা আমারং এ ন্যারা পানী কমছিল। না জনলাং।

এবাকা অন্যপ্রদেশর মাছ, আমার ফিসারীর মাছ, রসগোল্লা, কালাখন, চপ-কাটলেট, কুরকরে, ভুজিয়া, চিপস, ডালমুট, আইসক্রীম খানা অকরলাং এহানাং কি ন্যারা নেইতা?

আগেকার আমার উতা বেলেইয়া এলোপ্যাথিক খেইলাং। হোমিও প্যাথিক খেইলাং। এবাকা বার হারবেল, নেচুরেল খানা অকরলাং। কিন্তু আমার গাঙ ঘরর আগেকার খানা-পিনা জিনার রীতিনীতি বারো আনে নুইলাং। এবাকা স্বাস্থ্য বিধি দোয়ার মানুয়ে আমরে হিকেইতারা। আমার গৌড়িয়াহন আমার স্বাস্থ্য বিধি আছিল।

**পিত্তপাথরী :** এহানরে ইংরেজীত সংক্ষেপে Gall Stone বুলতারা। ডাক্তরে Gall Stone বা Billiary Calculus বুলতারা। Sonography, Scanning এ হিল ধরা পারের।

**হোমিও প্যাথিক লক্ষণ :** খানার দ্বি-তিন ঘণ্টা পিছে বেদনা (দোহানি) বাতর বারার বুকর আড়ছপার তলেংত অকরিয়া পেট গহাবিত, গজে বুকগর হাদিৎ, বাতর বারার লেম্পালে বাতর বারার আতে থার। যকৃতে বেদনা থার। রোগী ছটফট করে কাঁদের। গারীগ ইন্ডর, ঘামের, ইঙ ঘাম দেহাদের, জাকারেইয়া তাপ উঠের ১০২°-১০৩° পেয়া অর। খানা-পিনাত রুচি নেইয়র। গারীগ দুর্বল অর বজনি-ছাঙনি আহের। মিয়ামদিন অইলে - আহি, গারী, মুং আন্দুকা অর।

**হজক :** চেলিডোনিয়ম - Ø - ৪/৫ ফোটা, দ্বি-চামচ ঠাণ্ডা পানীলো দিনে ৩/৪ খুরুম।

ম্যাম্পি - Ø - ৪/৫ ফোটা দ্বি-তিন চামচ ঠাণ্ডা পানীলো দিনে ৩/৪ খুরুম

**কেলকেরিয়া কার্ক :** ৩০/২০০ - দিনে ৪/৫ মাত্রা দ্বি-তিন দিন। পিছেদে মাহানাং ২/৩ মাত্রা আকদিন করে। বালাঅইলেই বাদ দেনা।

**বার্বেরিস :** Q - ৫ ফোটা - দ্বি চামচ পানীত দিনে ৬/৭ খুরুম পয়লাকার দ্বি-তিন দিন। পিছে দিনে দ্বি-খুরুম। মাহান দেড়মাহা

পিছে দিনে আক খুরুম। নুয়ারা বালা অয়লে বাদ।

লাইকোপোডিয়াম : Q - ৩/৪ ফোটা দিনে ৩/৪ মাত্রা দ্বি-তিন চামচ ঠাণ্ডা পানীলো।

চায়না, মেছাপিপারেটা, সার্সপ্যারিলা, ডায়োসেকরিয়া, ইউনাইমিন কার্ডুয়াস মেরী এতাউ হজকদেনা য়াকরের।

**মূত্র - পাথরী :** এহনরে ইংরেজীত Kidney Stone, Renal Calculis বুলতারা, Urinary Bladder Stone ও বুলতারা। এহানৌ Sonography করলে ধরা পড়ের।

হোমিওপ্যাথিক লক্ষণ : বেদনা (দোহানি) কাকালিৎত অণুকোষ (ছলা) জাঙর মুদা, বুকগৎ, পিঠিহানাৎ, যারগা। গারীগ ঝাকারার বঙানি আহের, ঠাণ্ডাঘাম নিকুলেব। মূত্রথলীগ ভরি, মূত্রদোয়ার পেয়া, জ্বালা পুরা বেদনা করেব। তলপেটে বেদনা থার। কাকালী, লারিকটা, উডৎ জাঙর থরোয়া এতাত দোহানি থার।

হজক : (১) বার্কেরিস Q - ৪/৫ ফোটা দিনে ৪/৫ মাত্রা তিন চারি চামচ ঠাণ্ডাপানীলো নুয়ারা নাকমেছে পেইয়া।

(২) লাইকোপোডিয়াম - Q - ৪/৫ ফোটা দিনে ৪/৫ বার তিন চারি চামচ ঠাণ্ডা পানীলো নুয়ারা বালা নাছে পেয়া।

(৩) কেলকেরিয়া কার্ক : ৩০-২০০ দিনে ২/৩ মাত্রা ২/৩ দিন।

(৪) অ্যাসিড-ফস : ৬-৩০ - খানি আঁলে দিনে ২/৩ মাত্রা মা আহান খেইলে গারীগৎ পাংকাল বারো স্নায়ু সবল অইতয়।

(৫) সাবাল সেরু লেটা : Q - দিনে ৩/৪ খুরুম ৩/৪ ফোটা করে

(৬) কেনথারিস - Q - ৬-৩০ দিনে ৩/৪ খুরুম ৩/৪ গেমচ পানীলো।

কার্কভেজ - ৩০, ককুলাস ইণ্ডিকা - ৩০, অসমিয়ম - ৬-৩০, মেছাপিপারেটা - ৬ X, চিনিলাম সালফ - ৬ X - নাক্সভম, নেট্রাম কার্ক, অকসেলিক এসিড, আটিকা ইউরেনস Q জ্যাছরিয়া আরবোরিয়া, সার্সাপেরিলা, কেলি কার্ক, বার্কেরিস ভালগেরিস - ৬-৩০

(আইব সংখ্যাত ডায়েবেটিসর (বহুমূত্র-মধুমেহ) হজক থাইতয়)



## আয়ুৰ্বেদিক চিকিৎসা

অম্লপিত্ত বারো মূত্র পাথরী

কবিরাজ চন্দ্রবর্তী

অম্লপিত্ত :

খানা-পিনার অত্যাচার, অনিয়ম, বারো বিশৃঙ্খল সাংসারিক জীবন-জিনা, রাত্ৰি ডিলেয়া ঘুমজানি, বিয়ানে-ডিলেয়া উঠানি, আলিয়াপনা, এতা এতার সালেদে অম্লপিত্ত নুয়ারা অর। এহান আহান যকৎ (লিভার)র নুয়ারা। বিশেষকরে গল-ব্রাডার-প্যাংক্রিয়াসর কৰ্ম ব্যাঘাত অয়লে অর।

লক্ষণ :

বদহজম, খতাত চহা-কহা-তিতা উহার চেলনি, বুকদোহানি, গারী জ্বালা করানি, খানা-না-মনানি, বঙানি, গারী ঠুওনি, ভরি ভরি পাৰা অনি এতা লক্ষণ।

হজক :

১) রাত্ৰি গিলাচ আহান পানীত পরিস্কার শুকনা আঙলা ৪/৫ টুকরা, হরকতী ৩/৪ টুকরা, বহেরা ৩/৪ টুকরা ২ গ্রাম কটকী জিঙেইয়া গুড়িয়া থৈয়া বিয়ানে উতা ছকিয়া পানীছিটা হুদালা পেটে পিনা। হাপ্তা দশদিন পিলে নুয়ারা বালা ঐতে।

২) কাচা আঙলা আগ হিজিয়া তপ্তা ভাতল উটিয়া নিক্কা কত কামড় খেইলে মাআহান দ্বিমাহাত বালা ঐতে।

৩) নিক্কা রাত্ৰি ১০ গ্রাম চউল ভাজিয়া কাপ আহান পানীত জিঙেইয়া থৈয়া পিছেকার দিন বিয়ানে ঔ পানি উতা হুদা পেটে পিলে ৪/৫ দিনে বালা ঐতে।

৪) ২-৩ গ্রাম বাসকর বাকল, ৫ গ্রাম পদ্মগুলঞ্চ পাভা, ৫ গ্রাম কণ্টিকারীর পাতা কাপআহান তপ্তাপানীত রাত্ৰি জিঙেইয়া থৈয়া বিয়ানে হুদালা পেটে পিলে ৩/৪ দিনে বালা ঐতে।

পথ্য :

কাচকলা, খবল, পিরিহৌ পাতা মশলা না দিয়া রাখিয়া খানা।

মূত্র পাথরী :

খানা-পিনাতা, হজম নাইয়া, গারীগর সাংবিধানিক গঠন প্রক্রিয়ার সালেদে নানা রকম সিক্রিশনে হাবি প্রকার খানাপিনা পরিপাক নাইয়া, হবানেইতা রীতিমত মল-মূত্রাকারে দেহাত না নিকুললে এ নুয়ারা অর।

লক্ষণ :

লহি-করতে হীন, জ্বালা-দোহানি। কুক কিডনী, মূত্রস্থলী, মূত্রনালী, কাকালী, লারিকটা, উরৎ-আঠুএয়া জাঙর মুদা পেইয়া কামাডানি, দেহাদের।

হজক :

১) পাথর কুচি পাতার রস ৩/৪ চামচ করে বিয়ানে খানা। লহিত রকত থাইলে ২ চামচ দূরবাঘাসর রস তিলকরিয়া খেইলে বালা অর।

পথ্য :

মিছরীর সরবৎ বারো ঠাণ্ডা দৈ-মাঠা-ঘোল।

(আহের সংখ্যাত ডায়াবেটিসর হজক থাইতয়)

## চক্ চক্ বক্ বক্ ফুতিফালি ঘরদোয়ার -

আর, ডি।

১) টাইলস্ মোজাইক, পাককার ঘরর তল; কাচর দোয়ার খিড়কী

ক) এম'নিয়া চারি চামচ আককাপ পানীত গুলেইয়া ফুতি আহানলো তাক করিক।

খ) দোয়ার খিড়কীর কাচে আকচামচ এম'নিয়া আককাপ পানীত গুলেইয়া ফুতি আহানল ঘসিকা। পিছেদে পানীলো ধৈক বা তিঙা ফুতি হনলে পুছিক।

(দোয়ার খিড়কী খুলিয়া থৈবাং, হাতলো না ছকৈবাং)

২) পিতারেইর কল, তামার কল, সেঙ সেঙর কল :

আধা কাপ ভিনেগার এ খানার চামচর আক চামচ নুন তিলকরিয়া কলর গজে ফুতি আহানলো লাগেইক। হুকানা ফুতি



আহানলো ঘসিয়া তুলিক।

৩) ফুতির সাধারণ দাগ দূরেই করাণি :

হৌপাতর দাগ : যেকোন ডিটারজেন্ট, দাগর গজে তাপপ তাপপ ঘসিক যেকোনে হাবি-ফুতি-ফালি ধনা য্যাকরের সার্ব, এরিয়েল, নিরমা, হুইল, জিনকো, পাউডারল পানীত ধৈক। পিছে পানীয়া ক্লোরিনল জিঙেইয়া মিনিট আহান দুহান থৈয়া বারো ধৈয়া ছড়া দিক।

কালির দাগ (বল পয়েন্টর তাউ), থৌ, রঙ, আলকাতরা আদি - যেকোন রঙ পাতল করতারা সলিউশন, যেমন তারপিন, হাওয়া মেথিলেট স্পিরিট সূতা ফোটা আহানলো দাগহানর গজে লাগেইক। পিছে যেকোন হেভী ডিউটি ডিটারজেন্ট সলিউশনে জাবুরেইয়া থৈক। পিছে চিপিয়া চা-কাপর ১/৪ ভাগ পানীত ভাতখানার আক চামচ ক্লোরিং দিয়া জিঙেইয়া থৈক। খানি পিছে-ইঙ পানীল ধৈক।

(আহের সংখ্যাত চা-কফি, পেইন্ট, কব, ঝংগার ছুটানির সল্লা থাইতয়)





## জ্যোতিষৰ আহিত মানু

- 'দেবল'

**কুন্তৰাশি :** কুন্তৰাশিৰ মানু প্ৰায়েই বৰা-বালা, মাৰুপ-মাছাঙে উম, উচ্চাকাঙ্ক্ষী, সংস্কাৰ প্ৰিয়, আত্ম-সন্মানী, স্বমতাবলম্বী, বসন্ত, বিজ্ঞ, ভক্তিপৰায়ণ, মিতব্যয়ী, অন্তৰ সেও, পৰিশ্ৰমী, চিন্তাবিদ, তপস্বী অয়তারা। তনু নিৰ্জনে থানা মনেইতারা।

**জন্মস্থান বারো বাসস্থান :** কুন্তৰাশিৰ মানু জলা, জংলা, গোচরা, হৰা ফামেই ঘৰ কৰাশি মনেইতারা। সচরাচৰ নুয়া ভিটা-বাড়ী কৰতারা। শহৰেত গাঙ-দেশে থানা মনেইতারা। শহৰে ঘৰকৰলেউ গাছ-বিরুখ, বাড়ীখেতি কৰতারা। তনুৰতা পানীৰ অভাব নায়।

**দৈহিক গঠন :** মধ্যমাকৃতি, বাটুকা বকচলার বারাদে মিয়াম, গোল-গাল, বলী-পাংকাল, লিঙ, ফিবাম, মিয়ম-মাতাম হৰা। গৌৰ বৰ্ণ নাইলে উজ্জ্বল শ্যামবৰ্ণ নেই।

**স্বভাব চৰিত্ৰ :** কুন্তৰাশিৰ মানু সামাজিক অয়লেউ চুপ-চাপ থানা মনেইতারা। নিজৰ মতে চললে মানুৰ মতামত না মানানিউ নেই। কঙ্কুস, ধনপয়সা খৰবে চেকচিল। তৰে দৌদুক, তীৰ্থ, মন্দিৰ, শুভকাম আদিং সহায় কৰতারা। উচথাকে কানা মনেইতারা। লেইরাপা, ভিখাৰী, তলৰ-তলৰ মানুৰে বানা-নুংশি পেইতারা।

**স্বাস্থ্য :** নুয়াৰাপানী কম, আহিৰ ব্যাধি, চামৰ নুয়াৰা, পেটৰ-দাতৰ মূৰৰ নুয়াৰা অয়তারা। পিস্ত পাথৰী, মুত্ৰ পাথৰী, পেটে পানী জমানি, হাত-জাং-গাৰী ফোলা, জণ্ডিস, অয়তারা। স্বাস্থ্যবিধি মানিয়া দৈহিক অত্যাচাৰ, অনিয়ম না কৰলে, সারাজীৱন নুয়াৰা পানী নাউ অয়তারা।

**ধন-সাম্পাল :** অতি বৰা-বালা, বৰা-বালা বারো ডাঙৰীয়া মানুৰ সহায়, জুয়াখেলা-লটীয়া, আকস্মাৎ ধন প্ৰাপ্তিৰ যোগ থাৰ। ঘৰ-বাড়ী, খেতি-বাতি, কঠিন বস্ত্ৰৰ বেপাৰ, শিক্ষাদান, বন কাম, মৎস্য-চাৰ, মাটিৰ বেপাৰ, টুম নাৰ-না মাঙৰ ভাৰ-পজাংত ধন পেইতারা। সুদী-লগ্নী, কৰ্জ্জদেনা এতাং ধন-পয়সা আলৈয়া পানা হিন-পেইতারা।

**কৰ্ম ও কৰ্ম স্থান :** ইনসিউৱেন্স, ট্ৰাষ্ট, লগ্নী, ইলেকট্ৰিসিটি, ৱেলওয়ে, বিমান, খেতি-বাতি, ঘৰ-দোয়াৰ, ব্যবসা, শিক্ষাদান।

**ভাগ্য :** কুন্তৰাশিৰে ভাগ্যবান বা দৈববলে বলীয়ান মাতে নুয়াৰীয়াৰ। কঠোৰ পৰিশ্ৰমে নিজৰ ভাগ্য নিজে হংকৰতারা। জীৱনে উত্থান-পতন মিয়াম। তৰে বৰণৰ দিনৰকা বুলিয়া যেতাকৰিয়াউ খানিমানি জমেইতারা হনতে মানুৰাং আত না পাতিয়া চলিয়া বিতারাগা।

**আসক্তি :** জুয়াখেলা, মদ-গাঞ্জা-ভাঙ-তাস-ম্যাজিক। ইমা-ইন্দলৰ সঙ্গ মনেইলেউ মানুয়ে হবানেই মাতে নুয়াৰবা কৰে। সমাজে থাক নাঙ বারো স্বীকৃতি মনেইতারা।

**বিদ্যা :** কুন্তৰাশিৰ মানু উচ্চ শিক্ষা মনেইতারা। গুপ্তহস্য বিদ্যা, অস্ত্ৰ দৰ্শন, অনুভূতিমূলক জ্ঞানৰ চৰ্চা মনেইতারা। আসক্তি থানাৰ মিয়ামপাৰা মানু উচ্চ-শিক্ষা বঞ্চিত অয়তারা। মধ্যম শিক্ষাৰ মানু মিয়াম।

**দাম্পত্য জীৱন :** কথা কম, চিন্তা যাম, নিৰ্জনে, আকখুলা আকখুলী, কৰ্ম-প্ৰবণ, ভোগে অনাসক্তি, ৰুচিবান, অমিতব্যয়ী, স্বামাজিক, সংসাৰ-চিন্তক হনতে দাম্পত্যজীৱন প্ৰায়েই সুখময়, নিৰ্বিৰোধ থাৰ। গৃহিনী ভাবপ্ৰবন, স্বামী পৰায়না, সাংসাৰিকহনতে সংসাৰে শান্তি থাৰ।

**ছৌ-ছুমাৰা :** কম। মুনিছৌ ২/৩ গ। নিঙল আগ নাইলে নেই। সন্তান-সন্ততিহীন আছি। ছৌ-ছুমাৰা ঔ মাটিক ফৌন্তনি উহান নেই। অয়লেউ ছৌয়ে মালক বাপক নিঙ কৰতারা।

জীবন-যাত্রা : সহজ-সরল। অভাব-অনটন - নেই। কোলি-গালী দয়াদরবার নেই। চারিও বারার মানুষে যাকরতারা। সমাজে চিন্তারা।

অশুভ শাস্তি : শনিপূজা। কালীপূজা। সত্যনারায়ণ পূজা। লোহাৰ আংটি, এমেথিস্ট পিদানী, নিলুয়া রঙর ফুতি। ধলা বেড়ালার জড়। কালো গেইরে কালাই খোয়ানি।

সংখ্যা : ২, ৪, ৮ বর্জনীয়। জীবনর উল্লেখযোগ্য ঘটনা ৮, ১৭, ২৬, ৩৫, ৪৪, ৫৩, ৬২ বছর বয়স কিতাত অ থাইলে ৮ হ'ব।

কুন্তরাশির মানুরকা ১৪১১ সন হ'ব। গারী, ধন-সাম্পাল, কর্ম, হ'ব। ছৌরতাউ হ'ব। শত্রু কমেতায়। অভাব-অনাটন-নুয়ারাপানীর চিত্তর কারণ নেই। রাশি পাপ গ্রহ পীড়িত অয়লে গুণ-এতার উল্টা উহান অয়তয়।

মীন রাশি : মীন রাশির মানু সদানন্দময়, কঙালামন শান্তিকামী, উদার, আশাবাদী, একাগ্র তেজস্বী, ধীর-স্থির, জ্ঞানী, সত্যপ্রিয়, সংযমী, মেধাশক্তির অধিকারী, কর্ম বারো জ্ঞানযোগী। গীত-কাব্য, সাহিত্য-প্রেমী, দরদী, শান্তি প্রিয়, উদার, পরোপকারী, সমাজে মানতারা পণ্ডিত ব্যক্তি।

জন্মস্থান ও বাসস্থান : দৌ-দুক, আশ্রয়-মন্দির-তীর্থক্ষেত্র, পুণ্য সলিলা ঘাট, সাগর এতার কাদাবারাত জন্মস্থান বারো বাসস্থান অনা মিয়াম। উতাছাড়া ঘাট, বিল-বাদার-পুখুরীর কাদাতৌ থানা মনেইতারা। ঘরদোয়ার হবাক দিতারা, পায়-পরিস্কার।

দৈহিক গঠন : দেহাগ মজ্জুত, মঙ-ফিবাম-মাজা হ'ব। গারীগত -মেদ-মাউ-মাংস মিয়াম। গার ডাঙড়-পুরুট, মুর ডাঙড়, আন্দাজী মানু। চুল-কংতা-লাকতা হ'ব। উদর-সম-শরীর। রূপবান, গৌরবর্ণ, মনোরম আহি - মিত্বা-লাকতা হ'ব।

স্বভাব চরিত্র : আনন্দময়, আবেগময়, আশাবাদী, তিলেয়া থানা মনেইতারা, সামাজিক, ধর্মভীরু। দৌ-দুক-বামন-বৈষ্ণব, বুজন, শিক্ষিত মানুষে সম্মান করতারা। কর্মনিষ্ঠ, একাগ্রচিত্ত। হাদিতৌ কর্ম চঞ্চল। এলা অরেইয়া থাইতারা। মানুর হিন-দুক জারে নুয়ারতারা। সংসারেৎত মুক্তি বিছাড়তারা। ঝামেলা-ঝঞ্জাট, কোলি গালি এড়েইয়া থানা মনেইতারা। মানুর মেল বিছাড়তারা। দ্বি-স্বভাব।

স্বাস্থ্য : অনিয়ম, অত্যাচার নাইলে নুয়ারা পানী নেই। নুয়ারা পানী অয়লে, বাত শ্লেষ্মা, পিত্তশূল, মূত্রশূল, কফ, ফট-কুরু-ক্ষত, জাঙর-ফেলানী, হাদিহাদিৎ পেটফোলা থার। আহির দৃষ্টি হ'ব অয়লেউ পিছেদে চশামা লাগানিত পড়তারা। সায়নো সাইটিস, ডায়াবেটিস অনা সম্ভাবনা।

ধন-সাম্পাল : মীনরাশির মানুর বাপকলকেই নাঙফিটা মানু অয়তারা হানতে পিতৃ সম্পত্তিলো ধনবান অয়তারা। অবশ্যে নিজস্ব জ্ঞান-বিদ্যা-কর্ম-চেষ্টা বারো নিষ্ঠালো ধন-সুখ সম্পদ- হ'ব সহধর্মিনী লাভ করতারা। সংসারর অভাব অনাটন কম। ব্যবসা-বাণিজ্যৎত জ্ঞান-বুদ্ধি-বারো পরর সহায়লো ধন-পয়সা মিয়াম কামেইতারা। আচার্য্য, শিক্ষক, পণ্ডিত, গবেষক পদবাচ্য মিয়াম থায়তারা। শেষ জীবনে ধনপয়সা অর।

কর্ম ও কর্মস্থল : ঠকা-মিছা-ভেদ-ভাওনা, মানু দেহয়ানী না মনেইতারা হানতে পারামানে অধ্যাপনা, গবেষণা, শিক্ষকতা, ডাক্তর, ইঞ্জিনিয়ার, দার্শনিক অয়তারা। মনহান ধর্ম, নিষ্ঠা-নৈতিকতা-এলা-নাচা-পরোপকারী হানতে, শিক্ষাভূমি, দৌর লেইপাক, মনুষ্যবহুল, জ্ঞান-বহুল, কর্ম-মুখর, ফামে, মিয়ম থাইতারা। বেহা-বেপার-দালালীর কাম যুগৎ না পেইতারা। রাশিহান বুধ-শনি আধিপত্যে থায়েলে খেতি-বাতি, কৃষিকর্মউ করতারা তবে যুগৎ করে নুয়ার তারা।

ভাগ্য : পিতৃভাগ্যে বলীয়ান। পূর্বপুরুষর নাঙে মিয়াম চিন্তারা। দৈববলে বলীয়ান নাগে। আত্ম-কর্ম, নিষ্ঠা, একাগ্রতা, সামাজিক, পরোপকারী, জ্ঞানালোচনা করতারা হানতে মানুর পাংলাকে ভাগ্য হঙর। মানুষে বানা পেইতারা দেশে ঘরে সমাজে যাকরতারা, নাঙ থার হানতে কর্মজগতে শীর্ষস্থানে ফৌঅয়তারা। কর্ম সৌভাগ্য, বন্ধু সৌভাগ্য বারো পিতৃ-পুরুষর আশীর্বাদ পেইয়া ভাগ্যবান। নিজে সৌভাগ্যবান নাগে।

আসক্তি : সাহিত্য-কলা-গীত, জীবন দর্শন, সমাজ, পরোপকার, দৌ-দুক তীর্থ-ভ্রমণ, দেশ ভ্রমণ, পোষাক-আসাক, সহজ-সরল-



জীবন, কর্ম-বিদ্যাচর্চা। ভাগ্য পরীক্ষা। ধর্মপরায়ণা, সুশীলা, ঐশ্বর্যশালিনী, লজ্জাশীলা, নম্র, শিক্ষিতা, মানিনী, বিনয়ী, শিল্পকর্মবতী, জিতেদ্রিয় রমনীর সাহচর্য।

বিদ্যা : জ্ঞানযোগী, কর্মযোগী, পণ্ডিত, উচ্চ-শিক্ষিত, বিনয়ী। জ্ঞান প্রকাশে অনিচ্ছা। সংগীত, গীতিকাব্য, ভৌতিক বিদ্যা, ধর্মশাস্ত্র, চিকিৎসা শাস্ত্র, বিজ্ঞান এতাত অগ্রগামী। নুয়া নুয়া আবিষ্কার, নুয়া নুয়া কাম, সমাজ সংস্কার কাম ও বিদ্যাজ্ঞান।

দাম্পত্য জীবন : মীন রাশির মানুর দাম্পত্য জীবন সুখকর নাগৈ। পতি-পত্নীর ভিতরে সদায় খটমট লাগিয়া থার। তবে ডিভোর্স নার। কারণ পতি-পত্নী দ্বিযোগীয়ে অস্তুরে অস্তুরে অনুভূতিশীল বারো সহনুভূতিশীল।

ছৌ-ছুমারা : হবা। মুনিছৌ মিয়াম। জেলেইছৌ কম। জিপুতরাংতো সংসার শান্তিও নুঙেই থার। ছৌ-শিক্ষিত, চরিত্রবান।

জীবন-যাত্রা : সহজ-সরল, পরিপাটি, ঐলেউ সৌখীন। খানা-পিনা পোষাক-আশাক, চলন-ধরণ, আদি নিজস্ব-স্বকীয়তা বারো বৈশিষ্ট্য আহান থার। অভাব-অনটন, তাপ পীড়ন কম সুখী মাতানি পারিয়ার।

অশুভ শাস্তি : বিষুপূজা, শিবপূজা। বৃহস্পতি, চন্দ্র, শুক্রর জপ। মুক্তা, পোখরাজ, হোনা, রূপা, বেলর জড়, শ্বেত চন্দনর জড়।

সংখ্যা : ৩, ৭ উপকারী। পারলে ৬, ৯ বর্জ্জন করানি। ১৪১১ বছর এহান মীনরাশির মানুরকা হাবির বারাদে হবা। ধন-সাম্পালরকা অতি শুভ বছরহান। স্বদেশে-বিশেষে উন্নতি। চাকুরী প্রার্থী, বিদ্যার্থী, ব্যবসায়ী হাবিবরকা শুভ। গৃহ-নির্মান, সংস্কার, ধর্ম-কর্ম, এমারী অয়ত।

রাশিযদি, রাহু-শনি-মংগল-কেতু পাপপীড়িত নার উতা ঐলে সুকল ফলতয় অন্যথা গজে ইকরা ফলর মিয়াম ভাগ উল্টা ফল ফলতয়।

মেঘরাশি : মেঘরাশির মানু উচ আশাবাদী, স্বাধীন চেতা, কর্মমুখী, অধ্যবসায়ী, পরিশ্রমী, অভিমানী, বিরোধিতা সহ্য নার। ধনবান, লেইরাতা অতি কম বুললে যাকরের। মানুরে গণ্যতা খানি কম করতারা। সদায় হাবির গজে থানা মনেইতারা। তেলীয়ান। সেনাপতিপারা আত্মবল, সাহস, পরাক্রম।

জন্মস্থান ও বাসস্থান : গোচরা, জংলা, খানি উচ-মান্না, হুকানা ফাম, লেঙেয়া, রাঙামাটি, হিলুয়া, টিলা-টেঙারা পারা ফাম মিয়াম মনেইতারা। ছেয়া, চেপ্ চেপা ফাম আলি পেইতারা। ঘর-দোয়ার হবা। অন্ততঃ কাদাবারারতায় জিঙে নুয়ারবা করে হংকরতারা। মজ্জুত।

দৈহিক গঠন : মেঘ রাশির মানুর রঙ হরিয়র খৌপারা বারো জ্বির আঙুরা পারা রাঙা রাঙা। বটঠালা, বক্চলাগারী, ব্যায়াম করিয়া পরিপুষ্ট, দীঘল মেইথং, গাড় টিঙ লিঙ, নাক উচ, ওঠ ডাঙড় গাড়, চুল-বঠা, খানি উবা উবা, পোষ না মানের, লেম্পালেংত লারিকটাগ পেইয়া আকহান, ডাঙড়। গারীত চুল মিয়াম। মুর টকাল অয়তারা।

স্বভাব-চরিত্র : উগ্র, পররতা না হুনতারা, মাংলে জিঙতারা, আটাকেইলে, পাংকাল একেইতারা ছালপাংলে খুকম দিতারা। তবে পরিশ্রমী, অধ্যবসায়ী, আত্মনিষ্ঠ। স্বাধীনচেতা হানতে খনে হাসি খনে কাদানি থার। আত্ম মর্যাদা, পারিবারিক মর্যাদারকা জবর খটতারা। নিজর রুচি, মজ্জিমত কাম করে নুয়ারলে অতি হীন পেইতারা। মন মারিয়া থাইতারা।

স্বাস্থ্য : গারীগ হবা মজবুত, বকচলা, বলী, পাংকালপা, ব্যায়াম করিয়া পরিপুষ্ট। নুয়ারা পানী সচরাচর নেই। নুয়ারা পানী অয়লে অদধ পৌয়েইতারা। রকত পড়ানি, কাপা কাপি, জাঙ-আত বাগানি, পিত্তশূল, হৃদরোগ, মূত্রপাথরী, স্নায়ুর নুয়ারা এতা অর। অপারেশন সিলাই, রকত দেনা। মুর গরম হানতে চঞ্চল, জেদী। উতায় মানসিক ভারসাম্য হারার। হাম, বসন্ত, চর্মরোগ অয়তারা।

ধন-সাম্পাল : মেঘ রাশির মানু আককথাত হাবিব বরা-বালা। লেইরাপাতা কম। কলকজা, উদ্যোগ, গাড়ী-মটর-জাহাজ, খেতি-বাতি-খনি, ঘরবাড়ী, বেহা-বেপার হাবিব কর্মে পারদর্শি অয়তারা ধন কামেইতারা মেঘরাশির মানু আত্মবলে মনোবলে নিজ কর্মবলে ধনবান ঐতারা। ডাক্তর, ইঞ্জিনিয়ার, ঠিকাদার, ড্রাইভার, পরিচালক মিয়াম। কলকারখানা, ডাক্তরী, খেতি-বেতী

জবর মনেইতারা। মেঘ রাশির মানু অমিতব্যয়ী অয়লেউ লেইরা নাইতারা কারণ চারিত্রিক শৃঙ্খলা আহান তানুরতা আছে। তারো এ রাশিত লেইরাপাতা কম। দৈববল থাইলে অতি হ'বা।

কৰ্ম বারো কৰ্মস্থান : খেতিৰ লপুক, উদ্যোগ নগরী, শহর-গঞ্জ, জনবহুল ফাম, দেশ প্রদেশ -জিলার সদর এতাত কৰ্ম করিয়া থায়তারা। চাকুরী স্বাধীন প্রতিষ্ঠান করতারা। মানুর তলে, মানুর বশে থানা নুয়ারতারা হানতে নিজে নিজর কাম, প্রতিষ্ঠান নিজে হংকরিয়া উতা চালেইতারা।

ভাগ্য : মেঘ রাশির মানু ভাগ্যবান। আসুটা বুদ্ধি, নাকর দিশালো চলানি, পরর অধীন থানা নেই বুলিয়া ভগবানে হংকরে দিল হানতে, স্বাস্থ্য, শক্তি মনোবল, কৰ্মশক্তি বারো ভাগ্য নাদিয়া পারইতেতা। ওহানে মেঘরাশির মানু হাবি ভাগ্যবান।

আসক্তি : খানা-পিনা। উগ্র খাদ্য, মশালা মিয়ম, ঝাল, নুনটুকা। কাম-কাজ অন্যান্য হবানেই আশক্তি নেই।

বিদ্যা : মধ্যম বিদ্বানেত্ত অতি বিদ্বান। জগতে নাঙ ফিটা। চিকিৎসক, শৈল্যবিদ, প্রযুক্তি বিদ্যা, ইঞ্জিনিয়ারিং, ডাক্তরী, গবেষণা, ভূ-বিদ্যা, কৃষিবিদ্যা এতাং চোখাং।

দাম্পত্য জীবন : অতি সুখময়।

ছৌ-ছুমারা : মুনিছৌ জেলেই ছৌ মান্না মান্না। ২ঃ২; ১ঃ১। লেইরিক লেইছৌ বিদ্যাদে মিয়াম ছৌখাং নাইগে। মালক-বাপক ছৌছুমারারকা চিন্তা-ভাবনা করতারা।

জীবন যাত্রা : স্বচ্ছল। আটন-পিটন নেই। তবে শত্রু মিয়াম। বন্ধু কম। মানুয়ে নুঙেই না পেইতারা। মুঙে মাতে নুয়ারতারা। প্রভাব প্রতিপত্তি খাটেইয়া চলতারা।

অশুভ শাস্তি : নারায়ণর পূজা। বৃহস্পতি, রবি, মঙ্গলর জপ। শনি পূজা। রাহু-কেতুর ধ্যান।

সংখ্যা : ৩, ৬, ৯ শুভ। ২, ৪, ৮ পরিত্যাজ্য।

১৪১১ সন মেঘ রাশির মানুর কা অতি শাস্তি। নুয়ারা-পানী, মানসিক হীন-দুঃখ, অর্থনাশ, বন্ধু নাশ, স্বজন বিরোধ, দুর্ঘটনা, ভাগা-টুটা, রক্তপাত অন্যান্য আত্মিক নুয়ারা দেহা দিতে পারে। মোয়েই-জিপুতর স্বাস্থ্য উ হবা নেই। এতাহাবি দুখ জ্বালা যন্ত্রনার মাউ কিন্তু ধন-সাম্পালরকা হীন নাইতে।

মেঘরাশির জাতকর কা শনি, মংগল, রাহু হবা অয়া বৃহস্পতি, রবি, বুধ, শুক্র বারো চন্দ্র যদি কেন্দ্রকোনে বৈয়া শুভ সম্পর্ক শুভ দৃষ্টি দেব উতা অয়লে ধন-পয়সা বা সমাজে চুড়াগত কানি পারের। বারো এ গ্রহ এতা বিশেষ করে শনি, মংগল রাহু বিরূপ অয়া বহিলে পশুতো অধম ক্রোধী, দাঙ্কিক, চঞ্চল, কাপুরুষ, ভীৰু জীবন জিনা আহান পাতিয়া থায়তয়।

(আগামী সংখ্যাত জ্যোতিষর আহিত বৃষ, মিথুন, কর্কট রাশির মানুর বিচার থায়তয়)



# BISHNUPRIYA MANIPURI SAHITYA SABHA (BMSS), ASSAM

## SILCHAR

H.O. - RAMKUMAR BHAWAN, BHAKATPUR, SILCHAR - 788005, ASSAM

(Regd. No. 17323 of 1984-85)

**10th ANNUAL GENERAL CONFERENCE**, July 13, 2003

(Held at T.T.College, Silchar)

10th Annual General Conference, July 13, 2003

Time : 7 A.M. to 6 P.M.; Venue : T.T. College, Silchar

List of Newly Formed Executive Body of the Sahitya Sabha (BMSS)  
w.e.f. 16th July 2003 (Tenure for yrs)

### **CENTRAL COMMITTEE**

1. President : Shri Manindra Kr. Sinha, M.Sc. IFS (Retd.)  
(Retd. C.F., Assam)
2. Working President : Shri Gopendra Kr. Sinha, M.A., B.T. ACS  
(ADC, Cachar, Sil.)
3. Vice President : i. Shri Barindra Kr. Sinha, M.A., B.T., M.Ed, AES (Retd.)  
(Retd. Professor T.T. College, Silchar)  
ii. Shri Debadatta Sinha, B.A. (Retd. Govt. Teacher)  
iii. Shri Nishi Kanta Sinha, B.Sc. M.Ed. (Chincoorie)
4. General Secretary : i. Prof. Ashok Kr. Sinha, M.Tech, Ph.D.  
(G.S. Mgt.)  
ii. Prof. Arun Kr. Sinha, M.A., MPS, (AFS)  
(G.S. P & D.)  
iii. Shri Narendra Ch. Sinha (Retd. Govt. Official)  
(G.S. Org. - I)  
iv. Shri Mani Kanta Sinha, B.Sc., B.Ed.  
Head Master (G.S., Org.-II)  
v. Shri Anil Kr. Sinha, B.Sc. (Rengti), Retd. Govt Officer  
(G.S. Liaison & Finance)
5. Treasurer : Shri Ram Kumar Sinha (Bhakatpur), Retd. Govt. Official
6. Executive Members : i. Shri Surendra Kr. Sinha (Chandrapur), Retd. Govt. Official  
ii. Shri Gopal Ch. Sinha (Chandrapur)  
iii. Shri Shantobabu Sinha, M.Sc. (Tarapur), Lecturer  
iv. Shri Govinda Sinha, B.A., B.T., (Behara) Retd. Govt. Teacher  
v. Smt. Subhadra Sinha (Tarapur, Silchar)  
vi. Shri Arun Kr. Sinha, (W. Kachudharam) Govt. Teacher  
vii. Shri Manas Kr. Sinha, M.A. (W. Kachudharam)  
Principal, Dibyashram  
viii. Smt. Shanti Sinha (Narsingpur)  
ix. Smt. Monorama Sinha (Singari)

7. Internal Auditor : Shri Braja Gopal Sinha, Asstt. Accounts Officer, C.D.A.
8. Advisors :
  - i. Prof. Dr. Kali Prasad Sinha, M.A., Ph.D, D.Litt  
(Retd. Dean Assam University)
  - ii. Smt. Sukhajyoti Sinha, M.A. (Double) LL.B., B.T.  
(Retd. State Social Education Officer)
  - iii. Dr. Sukumar Sinha, MBBS, AHS  
(Retd. Joint Director)
  - iv. Prof. Bimal Krishna Sinha, M.Sc.  
(Retd. Vice-Principal, G.C. College)
  - v. Shri Indra Kr. Sinha, (Narsingpur), Retd. BDO
  - vi. Shri Gokulsena Sinha, (Singla) Retd. Head Teacher  
(Ex-President, BMSS)
  - vii. Prof. Brajendra Kr. Sinha, M.A.  
(Retd. Principal, SS College, Hailakandi)
  - viii. Shri Radhabenode Sinha (Bhakatpur)  
(Retd. Suptd. Polytechnic, Silchar)
  - ix. Prof. Namadeb Sinha, M.A. AES (Retd.)  
(Retd. Prof. Govt. College, Haflong)
  - x. Shri Birendra Kr. Sinha, B.A., B.T. (Retd. Govt. Teacher)

**List of Office bearers of Pargona Units (Anchalik Committee) of the Sahitya Sabha (BMSS)  
w.e.f. 16th July 2003 (Tenure for yrs)**

**ANCHALIK COMMITTEE**

1. Narsingpur Pargona : Shri Fulendra Kr. Sinha, (Retd. Govt. Officer, Agril.)  
Vice-President  
Shri Radha Kanta Sinha, (Retd. Govt. Official), Social Worker  
Secretary
2. Meherpur Pargona : Shri Jitendra Sinha, B.A., B.T. (Retd. H.M.) W. Kachudharam  
Vice-President  
Shri Ajit Sinha, Retd. Jr. Engineer (Rengti)  
Secretary
3. Birkampur Pargona : Shri Maipak Sinha, (Retd. Govt. Official) Behara  
Vice-President  
Shri Prakashananda Sinha  
Secretary
4. Jatrapur Pargona : Shri Sukumar Sinha, M.A., B.T. (Retd. Principal, H.S.) Old Katahal  
Vice-President  
Shri Amritlal Sinha, B.A. (Govt. Teacher) Dudhpur  
Secretary
5. Jafirbond Pargona : Shri Subash Sinha, M.A., B.T. (Principal, H.S.) Jafirbond, Halla  
Vice - President  
Shri Rohidas Sinha, Hailakandi  
Secretary



6. Singla Pargona : Shri Golap Sinha, Singla  
Vice - President  
Shri Debkumar Sinha, Bishnupur  
Secretary
7. Pratapgarh Pargona : Shri Saurindra Kr. Sinha, B.A., Govt Teacher (H.M.)  
Vice - President  
Shri Taranisen Sinha, Bilbari  
Secretary
8. Gauhati Region : Shri Birendra Kr. Sinha, (Retd. Dy. Secy. Assam) U. Hengrabari  
Vice - President  
Shri Binode Sinha, (Retd. Govt. Officer, nagaland) Bhangargarh, Ghy.  
Secretary
9. Upper Assam Region : (President) ..... to be selected  
Miss Manashi Sinha, M.A. (Prof.) tinsukia, Upper Assam  
Secretary
10. Mizoram Region : Prof. Dr. Nalini Kanta Sinha, M.A., Ph.D. (Prof. Mazoram Univ).  
Vice - President  
Shri Harendra Sinha, (Prof.) Lunglei, Mizoram  
Secretary
11. North Assam Region : Dr. Smriti Kr. Sinha, MCA, Ph.D. (Tezpur Univ) Tezpur  
Vice - President  
Secretary to be selected
12. Meghalaya Region : Prof. Kokilsena Sinha, M.A. (Prof. Ladykene College), Shillong  
Vice - President  
Secretary to be selected

Dated, Silchar  
The 13th July, 2003

Shri M.K. Sinha, IFS Retd.  
President, Sahitya Sabha (BMSS)

## রাধা-সেনা স্টুডেন্টস স্কলারশ্বিপ

ভারতের বিষ্ণুপ্রিয়া মণিপুরী সর্ব সাধারণের হারপোয়ানিরকা এ বিজ্ঞাপন এহান দেনা এল। রাধা-সেনা স্টুডেন্টস স্কলারশ্বিপ এহান ডঃ সুকুমার সিংহ, M.B.B.S., Retd. Joint Director, Assam গিরকে H.S.S.L.C বারো T.D.C. পাকরতারা বিষ্ণুপ্রিয়া মণিপুরী ছাত্র-ছাত্রীকে গিরকর রপিক স্বর্গীয় সেনা সিংহ, অরঃ প্রাপ্ত পেণ্টমাষ্টার বারো মালক স্বর্গীয় রাধারাণী দেবী চৌধুরাণীর স্মৃতিত বছরে বছরে ২০০৪ ইংরেজীত্ব দেনা এতৈ।

স্কলারশ্বিপ নিয়মাবলী :

ক) যোগ্যতা : ১) ছাত্র-ছাত্রী ভারতবাসী বিষ্ণুপ্রিয়া মণিপুরী অনা লাগতৈ।

২) ভারতবর্ষর যেকোন স্কুলর C.B.S.E বা S.E.B.A. অধীনর অনা লাগতৈ।

৩) HSLC পরীক্ষাৎ যেকোন শৃঙ্খলাত বিজ্ঞান, কলা, বাণিজ্য হারির গজে marks পেইয়া পাশ করানি লাগতৈ।

৪) H.S.S.L.C. পরীক্ষাৎ যেকোন শৃঙ্খলাত বিজ্ঞান, কলা, বাণিজ্য হারির গজে marks পেইয়া করানি লাগতৈ।

খ) স্কলার শ্বিপের সংখ্যা :

১) HSSLC ত দুহান - মুগিছৌ আগ বারো নিঙলছৌ আগ

২) T.D.C. ত দুহান - মুগিছৌ আগ বারো নিঙলছৌ আগ

গ) স্কলার শ্বিপের অঙ্ক :

১) H.S.S.L.C. ত রূপা ১০০ হান (রূপা আহৌ হান মাহনাত)

২) T.D.C. ত রূপা ১০০ হান (রূপা আহৌ হান মাহনাত)

ঘ) স্কলার শ্বিপের কাল :

১) H.S.L.C. ত দ্বি বছর

২) T.D.C. ত তিন বছর

ঙ) স্কলার শ্বিপ বাতিল : কোন সেমিষ্টার ফলাফল হোভা নাই।

চ) স্কলার শ্বিপ রূপা দেনার ধরণ : Cheque \ B. Draft এ মাহিলী / দ্বি-মাসিক / ত্রৈমাসিক। ছাত্র-ছাত্রী সুবিধা চেয়া। স্কলার শ্বিপের রূপা নেমার সময় Result Sheet জমা দেনা লাগতৈ।

ছ) স্কলার শ্বিপেরকা দরখাস্তর নিয়ম :

ক) স্কলার শ্বিপের নির্দ্ধারিত ফর্মে। ফটোস্টেট বা টাইপ কপি না চলতৈ।

খ) স্কলার শ্বিপ ফর্মের দাম রূপা ১০ (দশ) হান।

গ) নির্ভুল, পূর্ণ ফর্ম, পাসপোর্ট ফটো, পাশ করা স্কুল কলেজের নাম ভর্তি অছি স্কুল কলেজের নাঙ, Marks Sheet ডাঙরীয়া মানু দুগরাংতো চারিত্রিক সার্টিফিকেট, নিজর আতলো পূরণ করা পর্ম, পাশ সারটিফিকেট জমা দেনা লাগিত।

ঘ) নুয়া স্কুল কলেজে ভর্তি অনার মান আহানের ভিতরে অর্থাৎ ১৫/৮ র ভিতরে পূর্ণ ফর্ম জমা দেনা লাগতৈ।

স্কলার শ্বিপ ফর্ম পানার ঠিকানা

স্কলার শ্বিপ ফর্ম জমা দিনার ঠিকানা

স্কলার শ্বিপ রূপা পানার ঠিকানা

ডঃ সুকুমার সিংহ, M.B.B.S., Retd. H. Director

Konakpur Road, Silchar - 788005

Tel : 225399 (Silchar)

শিলচর

তাং ২/৪/২০০৪ ইং

বিজ্ঞাপন দাতা : ডঃ সুকুমার সিংহ

Form No. .... Year .....

**FORM OF APPLICATION FOR RADHA-SENA SCHOLARSHIP**

1. Name of Applicant : .....  
with full Address : .....
2. Name of Parents/Guardian : .....  
with full Address : .....
3. Name of the School/College last attended : .....
  - a. Subjects : .....
  - b. Marks obtained : Total Marks obtained : .....
  - c. Certificate from the School/College Authority Shri/Smti .....  
..... has passed out from this School. His/Her subjects  
were ..... in the last H.S.L.C./  
H.S.S.L.C. He is had obtained ..... marks in the last H.S.L.C./H.S.S.L.C. of year  
2004.

Date Signature & Seal

Principal/Head Master

4. Name of the school/College now admitted .....
  - a) Subjects taken .....
  - b) Certificate from the School/College authority  
Shri/Smti ..... had taken admission in this  
School/College in the 1st year HSSLC/1st yr T.D.C. in Arts/Science/Commerce during the year  
2004.

Date

Signature & Seal  
Principal/Head Master

5. Applicant's Declaration  
I, Shri/Srimati ..... swear in the Name of God and  
state that the information furnished above are true and correct to the best of my knowledge and  
belief.

Date

Signature

6. Guardian/Parents Declaration  
I, Shri/Shrimati ..... father/mother/Guardian  
of Shri ..... reading in HSSLC/TDC hereby declare that  
in the event of discontinuation of money he/she had drawn so far as scholarship.

Signature  
Address

## পত্ৰিকাৰূনৰ নলয়ৰূবলী

- ১) তিন মাহলয়া বনুগপ্ৰলয়া মণলপুৰী সূহলত সৰূ পত্ৰলকা, অসূম, প্ৰতল তিন মাহত নলকুলতৈ।  
(বৈশূখ, হূণ, কূৰ্তলক, মূখ - এপ্ৰল, জুলূহ, অক্টুবর, জনুয়ূরী)
- ২) লেখক গলরলগলথানীয়ে ইকরূ প্ৰবন্ধ, গল্প, উপন্যূস, কবলত, নূটক ইতূাদল নলজর কপল থৈয়ূ পলরল্ধূর কৰে ডাঙড় অখরে চেৰ পলঠল অকহনূত ইকরলয়ূ দলয়ূ পেঠলনল লূগতৈ। জমূ ঐতৈ লেখূ ফলরং দেনূ নূহতৈ।
- ৩) বলতকলত লেখূ, সমূজর ভেদূ-ভেদ মূলক লেখূ, রূজনীতল মূলক লেখূ, সন্মূন হূনলকর লেখূ গ্ৰহণযূগ্য নূগৈ। লেখূর মতূমতূর কূ, লেখূর গজে কূন প্ৰকর মূমলূর কূ পত্ৰলকূর পলরল্চালক মণুলী বূ সন্সূপূদক মণুলী দূয়ী নূগৈ।
- ৪) পত্ৰলকাহূনূত প্ৰকূশলত লেখূর বূনূন পদ্ধতল সন্সূপূদকর মতূনূসূরে ঐতৈ।
- ৫) কৃষ্টল কলূর গজে ইকরূ, সৃষ্টলকূমী সূহলত, অগ্ৰূধলকূর পেহতৈ। উঠে অহলতূরূ লেখকরে উংসূহলত করূনল ঐতৈ।
- ৬) পত্ৰলকা বেছূনীর এজেণ্টরে শতকরূ দশ হূন রূপূ কমলশন দেনূ ঐতৈ।
- ৭) হূবল রকমর মূমলূ মূকদমূ, শলচর অদূলতূর অওতূত বল্চর ঐতৈ।
- ৮) পত্ৰলকা সংখূ অূহূনূর দূম - কূপূ ২০ হূন (অককূড়লহূন) বহুকেরীয়ূ মূণুল ৮০ টকূ। ডাকযূগে পত্ৰলকা দলয়ূ পেঠলনলরকূ সংখূ অূহূন লেহে অতলরলকূ রূপূ ৫ হূন দেনূ লূগতৈ।

### যূগূয়ূগূর ঠলকূনূ বূরূ পত্ৰলকা প্ৰূপ্তলর স্থূন :

- ১) শ্ৰীমূনীন্দ্ৰ কূমূর সলংহ, অূহ,এফ,এছ (অবসরপ্ৰূপ্ত) চেয়ূরমেন, বূৰ্ড অব মেনেজমূন্ট, রূজগড় রূড, ওবেষ্ট বূহলেন-১২, গুৰূহূটল-৭৮১০০৭, ফোন - ০৩৬১-২৫১৪০৪১
- ২) শ্ৰীগূগূপেন্দ্ৰ কূমূর সলংহ, এ.চল.এচ (অবসরপ্ৰূপ্ত), মুখূ সন্সূপূদক, চলংকূড়ল রূড, নলউভকতপূর, শলচর-৭৮৮০১২, ফোন - ০৩৮৪২-২৬৪৮৪৪
- ৩) শ্ৰীমণলকূন্ত সলংহ, বল.এচ.চল. পলরল্চালক (প্ৰ্চূর) সূরদূমণল লেন, টলকূরবল্ধল, শলচর-৭৮৮০০৪, ফোন - ০৩৮৪২-২৬৬৮৭৭
- ৪) শ্ৰীসূরেন্দ্ৰ কূমূর সলংহ, সচলব (বূগলজূ), কূঠূল রূড, জলরূ পয়ন্ট লেন, শলচর-৭৮৮০০৫, ফোন- ০৩৮৪২-২৪১১৪০
- ৫) শ্ৰীভূনূ সলংহ, ফরেষ্ট রেঞ্জূর, তূরূপূর, শলচর-৮, ফোন - ২৬৮৩৬৩

### পত্ৰলকা প্ৰূপ্তলর স্থূন


- ১) শ্ৰীনরেন্দ্ৰ চন্দ্ৰ সলংহ, সল্ধূরী, শলচর- ৭৮৮০০৭
- ২) শ্ৰীফুলেন্দ্ৰ কূমূর সলংহ, ডূটলরগ্ৰূম, কূবূগগঞ্জবূজূর - ৭৮৮১২১, ফোন-২৫২০৭৪
- ৩) শ্ৰীসূভূষ সলংহ, বূপলরবন্দ, হূহলকূান্দল, ফোন - ০৩৮৪৪-২৪১৬৪৪
- ৪) শ্ৰীমূহপাক সলংহ, মূহনপূর, বল্ধ্ৰমপূর
- ৫) শ্ৰীজগদীশ সলংহ, অধূক্ষ, মডেল হূহয়ূর সেকেন্ধূরী স্কুল, পূথূরকূান্দল-৭৮৮৭২৪, ফোন- ০৩৮৪৩-২৫৫৪৩০
- ৬) শ্ৰীনলশলকূন্ত সলংহ, হূহলকূান্দল ফোন - ০৩৮৪৪-২২৩০৪৪
- ৭) শ্ৰীসূরীন্দ্ৰ কূমূর সলংহ, গূকলল, পূথূরকূান্দল, ফোন - ০৩৮৪৩-২৫৫৩৪৯
- ৮) শ্ৰীপূয়েন্দ্ৰ কূমূর সলংহ, থলনবন্দ, পূথূরকূান্দল
- ৯) শ্ৰীরূম গূপূল সলংহ, বুরূঙ্গূ, পূথূরকূান্দল
- ১০) শ্ৰীগূপূলধন সলংহ - লূয়ূহলর পূরূ
- ১১) শ্ৰীসূধনূ সলংহ, রূজবূড়ী, ধূৰ্মনগর, ত্ৰলপূর
- ১২) শ্ৰীহন্দ্ৰকূন্ত সলংহ, কৈলূসহর, ত্ৰলপূর, ফোন - ০৩৮২৪-২৩২১৫১
- ১৩) শ্ৰীঅক্ষয় রূজকূমূর, কনভেন্টরূড, হূফলং, ফোন-০৩৬৭৩-৩৬৬৪৮
- ১৪) শ্ৰীবীৰেন্দ্ৰ কূমূর সলংহ, নলজরূপূরপথ, হেঙেরূবূরী, গুৰূহূটল-৩৬, ফোন-০৩৬১-২৩৩২৩৭৬
- ১৫) শ্ৰীহূরূজ সলংহ, পূঞ্জূবূরী, গুৰূহূটল, ফোন - ০৩৬১-২২৩৩০৬০৭
- ১৬) শ্ৰীরনূজলং সলংহ, থূনূপূরূ, গুৰূহূটল, ফোন - ০৩৬১-২৫৩১৪৭০
- ১৭) শ্ৰীবলজয়কৃষ্ণ সলংহ, শূপ্তলপূর, ফোন - ২৫২০৬১







# PHALEI



Orion Tower, G.S. Road, Christian Basti, Guwahati - 781005  
Shop No. 19, Mezzanine Floor  
Telephone : 2340204

Centre of Handloom, Handicraft & Garments  
Outlet of North-East Women's Welfare Society- Assam  
&

The only Library of the Bishnupriya Manipuri Language Books, Periodicals,  
Journals, Magazine and News papers.

## ফলেই

শাখা দোকান

রাজগড় রোড, ওবেষ্ট বাইলেন - ১২, (কুণ্ডলনগরপথ) ঘর নং ৪৭,  
গুৱাহাটী-৭, ফোন - ২৫১৪০৪১

উত্তর-পূব ভাৰতে বিষ্ণুপ্ৰিয়া মণিপুৰী হস্ততাত-বস্ত্ৰশিল্পৰ একমাত্ৰ দোকান  
আসাম, বাংলা, মণিপুৰ, নাগালেণ্ড, মিজোৰাম, অৰুণাচল, উড়িষ্যা, উত্তৰ প্ৰদেশ, হৰিয়ানা, কাশ্মীৰ, হেণ্ডলুম বাৰো  
হেণ্ডিক্ৰেফটৰ নিৰ্ভৰযোগ্য দোকান।

১৯৯৬ ইংৰাজীত্ৰ জাতীয় সেৱাত ব্ৰতী আছে।

North-East Women's Welfare Society - Assam

বাৰো

বিষ্ণুপ্ৰিয়া মণিপুৰী ঠাৱৰ লেইবিক-লেইছো, পত্ৰ-পত্ৰিকাৰ একমাত্ৰ গ্ৰন্থাগাৰ।

বিষ্ণুপ্ৰিয়া মণিপুৰী সাহিত্য সভা পত্ৰিকা ফলেইত পেইতাঙাই।

সম্ভাষা - প্ৰকাশক - বেছেকুৱা - সেৱাৰী

পৰিচালক  
ফলেই

Culture Handloom, Habit Handloom  
Support poor women weavers of the North-East

&

Culture Writings, Habit Reading  
Support Mother Tongue, Serve the people

Management  
Phalei



## PHALEI



Orion Tower, G.S. Road, Christian Basti, Guwahati - 781005

Shop No. 19, Mezzanine Floor

Telephone : 2340204

Centre of Handloom, Handicraft & Garments  
Outlet of North-East Women's Welfare Society- Assam

&

The only Library of the Bishnupriya Manipuri Language Books, Periodicals,  
Journals, Magazine and News papers.

## ফলেই

শাখা দোকান

রাজগড় রোড, ওবেষ্ট বাইলেন - ১২, (কুণ্ডিলনগরপথ) ঘর নং ৪৭,

গুৱাহাটী-৭, ফোন - ২৫১৪০৪১

উত্তর-পূব ভাৰতে বিষ্ণুপ্ৰিয়া মণিপুৰী হস্ততাত-বস্ত্ৰশিল্পৰ একমাত্ৰ দোকান  
আসাম, বাংলা, মণিপুৰ, নাগালেণ্ড, মিজোৰাম, অৰুণাচল, উড়িষ্যা, উত্তৰ প্ৰদেশ, হৰিয়ানা, কাশ্মীৰ, হেণ্ডলুম বাৰো  
হেণ্ডিক্ৰেফটৰ নিৰ্ভৰযোগ্য দোকান।

১৯৯৬ ইংৰেজীৱ জাতীয় সেৱাত ব্ৰতী আছে।

North-East Women's Welfare Society - Assam

বাৰো

বিষ্ণুপ্ৰিয়া মণিপুৰী ঠাৱৰ লেইবিক-লেইছৌ, পত্ৰ-পত্ৰিকাৰ একমাত্ৰ গ্ৰন্থাগাৰ।

বিষ্ণুপ্ৰিয়া মণিপুৰী সাহিত্য সভা পত্ৰিকা ফলেইত পেইতাঙাই।

সম্ভাষা - প্ৰকাশক - বেছেকুৱা - সেৱাৰী

পৰিচালক

ফলেই

Culture Handloom, Habit Handloom  
Support poor women weavers of the North-East  
&

Culture Writings, Habit Reading  
Support Mother Tongue, Serve the people

Management  
Phalei